

ಯೋಹಾನನು ಬರೆದ ಪ್ರಕಟಣೆ ಯೋಹಾನನೇ ಲೀಖ್ಯೋತೆ ಪ್ರಕಾಶಿತ್ ವಚನ್ ಮಾಲುಮ್ ಕರಾನು

ಪ್ರಕಾಶಿತ್ ಪುಸ್ತಕ್ ನವಿ ಒಪ್ಪಂದಾನು ಪುಸ್ತಕ್ ಹುಯಿರುಸ್. ಆ ಪುಸ್ತಕ್ ಅಪೊಸ್ತಲ ಯೋಹಾನಧಿ ಲೀಖಾಯು. ಖ್ವರ್ತಿಮ ಕ್ರಿಸ್ತನಿ ಪೈದಾಖ್ಲನಿ ಖ್ವಮಾರ್ 95 ವರಖ್ವಮ ಲೀಖ್ತಿರುಸ್. 1:1 ಇನೆ ಯೋಹಾನಿ ಸುವಾರ್ತೆ ಅಜು ತೀನ್ ಚಿಟ್ಟಿ ಹುಯಿರೀತೆ ಪಹಿಲಿ ಬೇನಿ ಅಜು ತೀನ್ನಿ ಯೋಹಾನಬಿ ಲೀಖಿರಾಖ್ಯೊಸ್. “ಯೋಹಾನ ಯೇಸುನೊ ಪ್ಯಾರ್ನೊ” ಕರೀಬಿ ಬೊಲೈಲೇಸ್. ಯೋಹಾನ 13:23.

ಆ ಪ್ರಕಾಶಿತ್ ಪುಸ್ತಕ ಇನೆ ಯೇಸುಕ್ರಿಸ್ತನಿ ಸುವಾರ್ತೆ ಪೈಲಾವನಖ್ವಾಜಿ ಪತ್ಮೋಸ್ ಕರಿ ಟಾಪನ ಕೊಂಡೈರ್ದವಾನಿ ವಖ್ವತ್‌ಮ ಪ್ರಕಾಶಿತ್ 2:3.

ಯೋಹಾನನೇ ಪ್ರಕಾಶಿತ್ ಪುಸ್ತಕ ಲೀಖ್ಯೋತೆ ಶನಕತೊ ಪಥಾವಾಳಾನ ಯೇಸುಕ್ರಿಸ್ತಮ ವಿಶ್ವಾಸಿ ಹುಯಿನ್ ರ್ದವಾನಖ್ವಾಜಿ ಅಜು ಯೇಸು ಪಾಳ್ಳು ಆವ್‌ಶೆಕರಿ ಬೋಲಾನು ವೇಳ್ ಖನ್ನೆ ಅಯಿಗಿಕರಿ ಯೋ ಭರೋಖ್ವೊ ದೈವಾನಖ್ವಾಜಿ ಹುಮ್ಮಖ್ವೊ ದೈವಾನು ಹುಯಿರುಸ್ 1:3—22:7 ಇನೆ ಮ್ಹಾಮೂಲಿ ಅಖ್ವಾ ಕ್ರಿಸ್ತ ವಿಶ್ವಾಸಿಯೊನ ಅಜು 28.3 ವಚನ್‌ಮ ದೇಖೈತೆ ತಿಮ್ ಬರೋಬರ್‌ನಿ 7 ಸಬೆನ ಲೀಖಸ್. ಯೋಹಾನನೇ ಇನೆ ಲೀಖ್ಯೋತೆ ಪ್ರವಾದನೆ ಹುಯಿರುಸ್ ಕರಿ ಬೋಲಸ್ 1:3 ಅಜು ಇನೆ ದೇಖ್ಯೋತೆ ವಿಚಾರ್ನ್ ಬೋಲಾನಖ್ವಾಜಿ ಆ ಪುಸ್ತಕ್‌ಮ ಅಖ್ವು ಕೈಏಕ್ ಪೋಟಿನ ಲೀಖಿ ವತಾಳ್ಳೊ. ಆ ಪುಸ್ತಕ ಜೂನಿ ಒಪ್ಪಂದನಿ ಥೋಡಿ ಭಾಗ್‌ನಿಮತ್ ಲ್ಲಾ. ಬರೋಬರ್‌ಧಿ ಬೋಲ್ವುಕತೊ ಜೆಕರ್ಯ 6:1-8 ಖ್ವಾತ್ ತುತ್ಪೂರಿ ಅಜು ಖ್ವಾತ್ ಕಟೋರೊ ಅಖ್ವು ದೇವ್ವೆ ಈಜಿಪ್ಟ್‌ನ ನಿಶತ್ ದೈವಾನ ಮೋಕ್ಲಾಯುತೆ ಖ್ವಾತ್ ಖ್ವತಾಪ್ಪಿನ ವತಳಾನಿತರ ಹುಯಿರುಸ್. ವಿಮೋಚನ 7:9 ಪ್ರಕಾಶಿತ್ ಪುಸ್ತಕ ಹಗಾಮ್ನ ಖ್ವರ್ತಿನಿ ಬಾರೇಮ ವಾತೆಬೋಲಸ್. ಇನ

ಯೇಸು ಜುತಿಲೇಸ್, ಅಜ್ಜು ಇನ ಉಪ್ಪರ್ ಕೋಣ್ ವಿಶ್ವಾಸ್ ರಾಖಿಸ್ತಿ ಇವ್ಣೆ ಇನಿಜೋಡ್ಲ ಹರ್ಹಮೇಶ ಜಿವ್ವುಕ್ಶೆ.

ಆ ಪುಸ್ತಕ ಯೇಸು ಒಗ್ಗಿಸ್ ವಳ್ಳಾವಸ್ ಕರಿ ಬೋಲಾನು ಅಪ್ಪುನ ಹೊಷಾರಿ ಕರಸ್ ಅಜ್ಜು ಭರೋಖೊಬಿ ದೈವಾದೆ.

ಕಾಡಿದೇಖೊ

1. ಯೋಹಾನನೆ ಆ ಪ್ರವಾದನೇನಿ ದರ್ಶನ್ ಕಿನೇಥಿ ಲೀಲಿದೊ ಕರಿ ಬೋಲ್ತೊಹುಯಿನ್ ಶುರುಕರಸ್. 1:1-20
2. ಯೋ ನೇರಾಥಿ ಯೇಸುಭಣಿಥು ಆಯೊತೆ ಸಂದೇಶ್ಚ 7 ಸಬೇವನ್ ದೇಸ್. 1:1—3:22
3. ಇನಕೇಡೆಥು ಯೋ ಖ್ವಾತ್ ಮುದ್ರಾನಿ ಬಾರೇಮ ಬೋಲಿವತಾಳಸ್. 4:1—8:5 ಅಜ್ಜು 7 ತುತ್ತೂರಿನಿ ಬಾರೇಮ ಬೋಲ್ತೊಜ್ಜಾಸ್. 8:6—11:19
4. ಇನಕೇಡೆಥು ಯೋಹಾನ 7 ಮುಡ್‌ಕ್ಯಾನು ಮಹಾ ಅರ್ಝುನ್ ವಿರೋದ್ ಪಖ್ವೊಲಡ್ಕಾನಿ ಜಂಗ್‌ನಿ ಬಾರೇಮ ಬೋಲಸ್. 12:1—14:20
5. ಇನಬಾದ್ಲ ಯೋ ಇಂಫಾರಾಥಿ ಭರೈರುತೆ ರಾಘಾನ 7 ಸಮಾಚಾರ್‌ನಿ ಬಾರೇಮ ಲೀಖಸ್. 15:1—16:18
6. ಇನಕೇಡೆಥು ಯೋಹಾನನೆ ಸೊರ್ಗನು ದೇವ್ ಇನ ವಹೇರನ್ಯಾನ ವಿರೋದ್ ಕಿಮ್ ಜೂತಸ್ ಕರಿ ಬೋಲಾನು ಬೋಲಿವತಾಳಸ್. 17:1—20:15
7. ಖ್ವರ್ತಿಮ ಯೋ ಕಡೇಶಿಮ ಒಳಿಯಾವತೆ ನವಿ ಸೊರ್ಗ ಅಜ್ಜು ನವು ಜಗತ್ ಆವ್‌ಶೇತೆ ಇನಿ ಬಾರೇಮ ಬೋಲಿ ಓತಾಳಸ್. 21:1—22:21

¹ ಯೇಸು ಕ್ರಿಸ್ತನಿ ಪ್ರಕಾಶಿತ್ ವಚನ್ ಒಗ್ಗಿಸ್‌ಮ ಫಾಲ್ವುತೆ ಬಾರೇಮ ಯೋ ಇನ ದಾಸಖ್ವಾರನ ವತಾಳನಖ್ವಾಜೆ ಆ ಖ್ವಾರು ದೇವ್‌ಥಿ ದೆವಾಯುತೆ. ಯೇಸು ಇನ ದೂತನ ಮೋಕ್ಲಿನ್ ಇನೇಥಿ ಆ ಖ್ವಾರಿವಾತ್ತ್ ಯೋಹಾನ ಮಾಲುಮ್ ಕರಾಯೊ.

² ಯೋಹಾನನೆ ದೇವ್ನಿ ವಚನ್ನಿ ಬಾರೆಮಾಬಿ, ಯೇಸು ಕ್ರಿಸ್ತನೆ ಬೋಲ್ಯೊತೆ ಸಾಕ್ಷಿನಿ ಬಾರೆಮಾಬಿ, ಇನೆ ದೇಖ್ಲೊತೆ ಖ್ವಾರು ಖ್ವಮ್‌ಜಾಡವಾಳೊಹುಯಿನ್ ಸಾಕ್ಷಿ ಬೋಲ್ಯೊ.

3 ಆ ಪ್ರವಾದಾನೆನಿ ವಚನ್‌ಖ್ವಾರು ಫಡವಾಳೂಬಿ ಖ್ವಮ್‌ಜವಾಳೂಬಿ ಅಜು ಅನಾಮ ಲೀಖೈರುತೆ ಇನಲೀನ್ ಘಾಲವಾಳು ಕೆತ್ತೇಕ್ಕಿ ಧನ್ಯರ್ ಹುಯಿರ್ಲ್ವಾಸ್, ಶನಕತೊ ಆ ಖ್ವಾರು ಘಾಲನೊದನ್ ಖನ್ನೆ ಏಗು.

ಖ್ವಾತ್ ಸಬೆನ ಖ್ವಲಾಮ್

4 ಯೋಹಾನನೆ ಏಷ್ಯಾ ತಬರ್‌ಖಾಮ ರ್ಲ್ವಾಳಿ ಖ್ವಾತ್ ಸಬೆನ ಶಾತ್ ಲೀಖುಕರಾಸ್‌ಕತೊ, ರ್ಲ್ವಾಳೊ ಅಜು ಅಗ್ಗಳ್‌ಫೋತೆ, ಖ್ವಾಮ್ಪೆ ಆವವಾಳೊ, ಇನೇಥಿ ಅಜು ಇನು ಸಿಂಹಾಸನ್ನ ಖ್ವಾಮ್ಪೆಲ್ಲಾತೆ ಖ್ವಾತ್ ಆತ್ಮಥಿ ಅಜು ಯೇಸು ಕ್ರಿಸ್ತಥಿ ವಾರ್‌ಖೊಬಿ ಸಮಾಧಾನ್‌ಬಿ ಮಳಾದೆ.

5 ಯೇಸು ವಿಶ್ವಾಸ್‌ನಿ ಸಾಕ್ಷಿ ಹುಯಿರ್‌ಹೊಸ್, ಮರ್ಯುಹುಯಾಮಥು ಪಹಿಲೆ ಉರೈತೆ ಧರ್ತಿನ ರಾಜಾವೊ ಮಾಲಿಕ್ ಹುಯಿರ್ಲ್ವವಾಳೊ ಯೇಸು ಕ್ರಿಸ್ತಥಿ ತುಮುನ ವಾರ್‌ಖೊಬಿ ಶಾಂತಿಬಿ ಮಳಾದೆ. ಅಪ್ಪುನ ಪ್ಯಾರ್‌ಕರವಾಳೊ ಇನು ಪವಿತ್ರ ಲೋಯಿಥಿ ಅಪ್ಪುನ ಪಾಪ್‌ಥಿ ಫೋಡಾಯೊ.

6 ಅಪ್ಪೆ ದೇವ್ ರಾಜ್ಯವಾಳಹುಯಿನ್ ಇನೊ ಬಾ ಹುಯಿರ್‌ಲೊತೆ, ದೇವ್‌ಖ್ವಾಜೆ ಯಾಜಕರ್ ಬಣಾಯೊತೆಯಿನ ಜಗ್‌ಜಮಾನಮಾಬಿ ಮಹಿಮೆ ಶಕತ್ ರ್ಲ್ವಾದೆ ಆಮೆನ್.

7 “ದೇಖೊ ಯೋ ವಾದ್‌ಳಾನ ಜೋಡೆ ಆವಾಳೊ ಹುಯಿರೊಸ್, ಹರೇಕ್ನೊ ಡೋಳೊ ಇನ ದೇಕ್‌ಷೆ ಇನ ಭೋಕ್ಕುಹುಯುಬಿ ಇನ ದೇಕ್‌ಷೆ” ಆ ಜಗತ್‌ನು ಅಖ್ಪು ಖೂಮ್‌ವಾಳು ಅಂದ್ರೋಖ್ತ್ ಕರ್ತೆ. ಒಹೊ ಇಮ್ಮಸ್ ಉಷೆ ಆಮೆನ್.

8 “ಮೇಸ್ ಪಹಿಲೋಬಿ, ಖ್ವರ್ತಿಬಿ” ರ್ಲ್ವಾಳೊ ಅಜು ಅಗ್ಗಳ್‌ಫೋತೆ ಖ್ವಾಮ್ಪೆ ಆವವಾಳೊ, ಮಹಾನ್ ಶಕತ್‌ವಾಳೊ ಕರಿ ದೇವ್ ಹುಯಿರ್‌ಲೊತೆ ಪ್ರಭು ಬೋಲಾಸ್.

ಕ್ರಿಸ್ತನು ದರ್ಶನ

9 ಯೋಹಾನಕರಿ ಮೆ ಕ್ರಿಸ್ತಮ ತುಮಾರೊ ಬೈ ಹುಯಿರೋಸ್. ಅಪ್ಪೆ ಹಿಡಿಕ್ ಯೇಸುನಖ್ವಾಜೆ ಖ್ವತಾಪ್ಪಿಮಾಬಿ, ರಾಜ್ಯಮಾಬಿ, ಖ್ವಮಾಳಮಾಬಿ

ವಾಟೋಲೀರಾಖ್ಯಾಸ್, ಮೆ ದೇವ್ನಿ ಸಮಾಚಾರ್‌ನಾಬಿ ಯೇಸುನಿ ಬಾರೇಮ ಸಾಕ್ಷಿ ದೈವಾನಖ್ವಾಜೆ ಪತ್ಮೋಸ್ ಟಾಪಾಮ ಥೊ.

10 ಮೇ ಪ್ರಭುನ ದನ್ತ್ ಪವಿತ್ರಾತ್ಮಾ ಭರೈನ್ ಮಾರ ಪೀಟ್ ಪಾಲ್ಲಳ್ ಮೋಟಿ ಅವಾಜ್ ಏಕ್ ಖ್ವಮಜ್ ಪಡ್ಕುಯೋ ತುತ್ತೂರಿನಿ ಆವಾಜ್‌ನಿಮತ್ ಥೊ.

11 ಯೋ ಅವಾಜ್‌ನೆ, ತೂ ದೇಖಾನು ಏಕ್ ಪುಸ್ತಕ್‌ಮ ಲೀಖಿನ್ ಎಫೆಸ, ಸ್ಮರ್ನ್, ಪೆರ್ಗಮ, ಥುವತ್ಯೆರ, ಸಾದಿಸ್, ಫಿಲಿಡೇಲ್ಫಿಯ, ಲವೊದಿಕೀಯ, ಕರಿ ಖ್ವಾತ್ ಸಬೆವ್‌ನ ಮೋಕಲ್ನುಕರಿ ಬೋಲ್ಯು.

12 ಮಾರ ಜೋಡೆ ವಾತೆ ಬೋಲುಕರ್ತುಧೂತೆ ಅವಾಜ್ ಕಿನುಕರಿ ದೇಖಾನ ಮೇ ಪೀರೆ ಫರೈನ್, ಫರಾನಿ ವಖ್ವತ್‌ಮ ಖ್ವಾತ್ ಖ್ವೊನ್ನಾನು ದೀವೊ ಮ್ಹೇಲಾನುಖಮ್ ದೇಖೊ.

13 ಯೋ ದಿವಳ್ಳಿನ್ ಇಚ್‌ಮ ಅದ್ವಿನ ಛಿಯ್ಯಾನಿತರ ರ್ವಾಳನ ದೇಖೊ ಇನೆ ಝುಗೊ ಫೆರಾಖಿನ್ ಖ್ವೊನ್ನಾನ ಪಟಾನ ಛಾತಿಪರ್ ಭಾಂದಿರಾಖೊಥೊ.

14 ಇನ ಮಾಥಾನು ಕೇಖ್ ಧೋಳು ಖ್ವತ್ವರಾನಿ ಫೋಣಿಬಿ ಬರಪ್‌ನಿ ಫೋಣಿಬಿ ಧೋಳುಫಟ್ ಥೊ.ಇನೊ ಡೋಳೊ ಆಗ್‌ನಿ ಝುಲ್‌ಪಟ್‌ನಿತರ ಥೊ.

15 ಇನ ಭೇ ಪಂಜ ಕೋಲ್‌ಮಿಮ ಬಳಿಹುಯು ತಾಂಬಾನಿ ಫೋಣಿಬಿ ಇನು ಅವಾಜ್ ರಂಚಾವತೆ ಪಾಣಿನ ಘೂಂಜ್‌ನಿ ಅವಾಜ್‌ನಿತರಬಿ ಥು.

16 ಇನ ಖಾವಹಾತ್ಮ ಖ್ವಾತ್ ತಾರೊ ಧರೈರೂಥು. ಇನ ಬಾಕಮಾಥು ಬೇಮ್ವೊಡಾನಿ ತಲ್ವಾರೆ ನಿಕ್ಕುಕರ್ತಿಥಿ ಇನು ಮ್ಹೊಡು ಧೊಪಾರ್‌ಮ ಶಕಥಿ ಉಜಾಖ್ ದೇಸ್ತೆ ಚಾಂದ್‌ನಿಫೋಣಿ ಥು.

17 ಮೇ ಇನ ದೇಖಾನಿವಖ್ವಾತೆ ಮರೈಹುಯಾನಿಫೋಣಿ ಇನ ಗೋಡಾನ ಖ್ವಾಮ್ಣೆ ಪಡ್ಕುಯೋ ಇನ ಖಾವಹಾತ್ಮ ಮಾರಪರ್ ಮ್ಹೇಲಿನ್, ಡರ್‌ನಕೊ ಮೇಸ್ ಪಹಿಲೆನೊ ಖ್ವರ್ತಿನೊಬಿ.

18 ಕೆದೇಬಿ ಜಿವ್ತು ರ್ವಾಳೊ ಹುಯಿರೊಸ್, ಮರೈಹುಯೊಥೊ. ಕತೋಬಿ ದೇಕ್ ಜಗ್‌ಜಮಾನಮಾಬಿ ಜಿವ್ತು ರ್ವಾಳೊ ಹುಯಿರೊಸ್. ಮರಣ್

ಅಜ್ಜು ಪಾತಾಳ್ವ ಬೀಗಾನು ಕೀಲಿ ಮಾರಕನ ಛಾ.

19 ಇನಖ್ವಾಜೆ ತೂ ದೆಖಾವನು ಖ್ವಾರುಸ್, ಹಮ್ಗೆ ಚಾಲುಕರಾತೆ ಖ್ವಾರುಸ್ ಅಗ್ಗಳ್ ಚಾಲಾನು ಅಖ್ವಾಸ್ನ ಲೀಖ್.

20 ಮಾರ ಖಾವಹಾತ್ಮ ತುನೆ ದೇಖೊತೆ ಖ್ವಾತ್ ತಾರವ್ವ ಅಜ್ಜು ಖ್ವಾತ್ ಖ್ವೊನ್ನಾನು ದಿವಳ್ಳಿನು ಖಂಬಾನು ಮತ್ಲಬ್ ಬೋಲಿವತಾಳುಸ್, ಯೋ ಖ್ವಾತ್ ತಾರೊ ಕತೊ ಖ್ವಾತ್ ಸಬೇನು ದೂತರ್, ಯೋ ಖ್ವಾತ್ ದಿವಳ್ಳಿನು ಖಂಬಖ್ವಾರು ಕತೊ ಯೋ ಖ್ವಾತ್ ಸಬೆಖ್ವಾರಿ ಹುಯಿರ್ದೀಸ್.

2

ಎಫೆಸ ಸಬೆವಾಳನ ಸಂದೇಶ್

1 ಎಫೆಸಮ ಛಾತೆ ಸಬೆನ ದೂತಾನ ಆಮ್‌ಲೀಕ್, ಖ್ವಾತ್ ತಾರವ್ವ ಇನ ಖಾವಹಾತ್ಮ ಧರಿಲೀನ್ ಖ್ವಾತ್ ಖ್ವೊನ್ನಾನು ದಿವಳ್ಳಿನ ಖಂಬಾನ ಇಚ್‌ಮ ಚಾಲುಕರಾವಾಳೊ ಶಾತ್ ಬೋಲುಕರಾಸ್ ಕತೊ,

2 ತಾರು ಕಾಮ್‌ಖ್ವಾರು ಅಜ್ಜು ಮಿನ್ಹತ್‌ಬಿ ಖ್ವಮಾಳನುಬಿ ಮೇ ಮಾಲುಮ್ ಕರಿರಾಖ್ಯೊಸ್. ತೂ ಖರಾಬ್ ಅದ್ಮಿನ ಖ್ವಮಾಳಿಷ್ ಕೊಯ್ಚಿ ಅಪೊಸ್ತಲರ್ ಕಾಹೆತೆಬಿ ಇವ್ವುನ ಅಪೊಸ್ತಲರ್‌ಕರಿ ಬೋಲೈಲ್ಯವಾಳು ತೂ ಪರ್ಖಿನ್ ಇವ್ವುನ ಝೂಟುಕರಿ ಮಾಲುಮ್‌ಕರಿಲಿದೊ.

3 ತೂ ಧೀರ್‌ವಾಳೊ ಹುಯಿನ್ ಮಾರ ನಾಮ್‌ಖ್ವಾಜೆ ಖ್ವತಾಪ್ಪಿನ ಖ್ವಮಾಳಿನ್ ಲಡ್‌ಕೊಕೊಂತೆ ಧೋತೆ ಮನಮಾಲುಮ್.

4 ಕತೋಬಿ ತಾರಪರ್ ಅಪ್‌ರಾದ್ ಬೋಲಾನು ಛಾ ಅಗ್ಗಳ್ ಮಾರಪರ್ ಧೀತೆ ಪ್ಯಾರ್ ಹಮ್ಗೆ ಕೊಯ್ಚಿ.

5 ಇನಖ್ವಾಜೆ ತೂ ಕಿಚ್ಚಾಡು ಲಡ್ಕಿರ್ದೊಸ್‌ಕಿ, ಇನ ತಾರಿ ಖ್ವಿಯಾಲ್ಮಲ್ಯಾಪ್. ದೇವ್‌ಭಣಿ ಮನ್‌ಫರೈನ್ ತೂ ಅಗ್ಗಳ್ ಕರುಕರ್ತೊಧೋತೆ ಕಾಮ್‌ಖ್ವಾರುಸ್ ಕರ್, ತೂ ನಾ ಮನ್‌ಫರಾಯೊತೊ ಮೆ ಅಯಿನ್ ತಾರು ದಿವಳ್ಳಿನ ಖಂಬಾನ ಇನು ಝುಗೊಕಂಡು ಕಾಡಿನಾಖಿಷ್.

6 ಕತೋಬಿ ಅಲ್ಫು ಏಕ್ ತಾರಾಮ ಛಾ. ಯೋ ಶಾತ್‌ಕತೊ ಮೇ ವಹೇರ್‌ಕರಾನು ನಿಕೋಲಾಯನ ಕಾಮ್ನ ತೂಬಿ ಜಿನುಕು ವಹೇರ್ ಕರುಕರಸ್.

7 ದೇವ್ನುಆತ್ಮನೆ ಸಬೆಖ್ವಾರಾನ ಬೋಲಾತೆ ಇನ ಕಾನ್‌ರ್ದವಾಳು ಖ್ವಮ್‌ಜಾದೆ. ಕೋಣ್ ಜೂತಾಸ್ಕಿ ಇನ ದೇವ್ನ ಸೋರ್ಗಾಮ ಛಾತೆ ಜಾನ್ನ್ ಝಾಡ್‌ಣ ಪಂಡಾನ ಖಾವಾನ ಹುಕುಮ್ ದಿಶ್.

ಸ್ಕೂರ್ ಸಬೆವಾಳನ ಸಂದೇಶ್

8 ಸ್ಕೂರ್‌ಮ ಛಾತೆ ಸಬೆನ ದೂತಾನ ಅಮ್‌ಲೀಕ್, ಶುರುವಾತ್‌ಬಿ ಖ್ವರ್ತಿಬಿ ಹುಯಿರ್ದಾವಳೊ, ಮರಿಜೈನ್ ಪಾಲ್ಟೊ ಜಿವ್ವೊ ಉರೀನ್ ಆಯೊಹುಯೊ ಬೋಲಾಸ್ ಶಾತ್‌ಕತೊ

9 ಮೇ ತಾರು ಖ್ವತಾಪ್ಪಿ ಅಜ್ಜು ಗರೀಬ್‌ರ್ದವಾನುಬಿ ಮಾಲುಮ್ ಕರಿರಾಖ್ಯೊಸ್, ಕತೋಬಿ ತೂ ಶೌಕಾರಸ್ ಹುಯಿರ್ದೊಸ್. ಅತ್ರೇಸ್‌ಕಾಹೆತೆ ಯೆಹೂದ್ಯರ್ ಕರಿ ಬೋಲೈಲ್ಯವಾಳು ಇವ್ಣೆಸ್ ತಾರಿ ಬಾರೇಮ ದೂಷಣೆ ಬೋಲಾನು ಮಾಲುಮ್. ಇವ್ಣೆ ಯೆಹೂದ್ಯರ್ ಕಾಹೆ, ಶೈತಾನ್ನ್ ಸಬೆನಾ ಮಂದಿರ್‌ವಾಳು ಹುಯಿರ್ದೊಸ್

10 ತುನ ಹುವಾನು ಖ್ವತಾಪ್ಪಿನಖ್ವಾಜಿ ನಕೊ ಡರಿಶ್. ಹಂದೇಕ್ ತುಮುನ ತರೀಪ್ಪಕರಾನ ಶೈತಾನ್ನ್ ತುಮಾರಮ ಥೋಡಾನ ಜೇಲ್‌ಮ ಫಾಲ್ನು ಕರಿ ಛಾ ಅಜ್ಜು ದಖ್ ದನ್‌ಲಗು ತುಮುನ ಖ್ವತಾಪ್ಪಿರಿಷೆ. ತು ಮರಾಲಗು ವಿಶ್ವಾಸ್‌ನ ಯೋಗ್ಯಹುಯಿರೆ, ಮೇ ತುನ ಜಾನ್ನ್ ಕಿರೀಟ್‌ನ ದೆವಾಳೊ ಛೊ.

11 ದೇವ್ನುಆತ್ಮನೆ ಸಬೆಖ್ವಾರಾನ ಬೋಲಾತೆ ಇನ ಕಾನ್‌ರ್ದವಾಳು ಖ್ವಮ್‌ಜಾದೆ. ಜೂತವಾಳನ ಬೇನಿ ಮರಣ್‌ಥು ಶನು ಗಲತ್ ಕೋಲುಷೇನಿ.

ಪೆರ್ಗಮಾನು ಸಬೆವಾಳನ ಸಂದೇಶ್

12 ಪೆರ್ಗಮಾನು ಸಬೆನ ದೂತನ ಅಮ್‌ಲೀಕ್; ಬೇ ಮ್ಹೋಡಾನು ಚಾಲ್ತಿ ತಲ್ವಾರ್‌ನ ಧರಿರಾಖವಾಳೊ ಶಾತ್ ಬೋಲಾಸ್‌ಕತೊ,

13 ತೂ ಜಿವ್ವುಕ್ಕರುಕರಾತೆ ಝಗೊ ಮಾಲುಮ್ ಕರಿರಾಖ್ಯೊಸ್, ಯೋ ಶೈತಾನ್ನ್ ಸಿಂಹಾಸನ್ನ್ ಝಗೊ ಹುಯಿರ್ದೊಸ್. ತೂ ಮಾರ

ನಾಮ್ನ ಘಟ್ಥಿ ಧರಿರಾಖ್ಯೊಸ್. ಶೈತಾನ್ನ್ ಘರ್ ಹುಯಿರೊಡ್ತೆ ತಾರ ಖ್ವಯೇರಮ ಮನ ವಿಶ್ವಾಸ್‌ವಾಳೊ ಸಾಕ್ಷಿ ಹುಯಿರೊಡ್ತೆ ಅಂತಿಪ ಮರೈಜ್ಜಾವನಿ ವಖ್ವೆತೆಬಿ ಮಾರಾಮ ಮಿಲ್ಲಾಣ್ಯೊಡ್ತೆ ವಿಶ್ವಾಸ್ ಧಖೆಲ್ಯೊಕೊಯ್ನಿ.

14 ಥೋಡಿ ವಾತೆನಿ ಬಾರೇಮ ತಾರ ಭಣೀಧು ಮಾರಕನ ಅಪ್‌ರಾದ್ ಛಾ. ಮೂರತ್ ಬಲಿಕರಾತೆ ರಾಲ್ಹಾನ ಖಾವಮಾಬಿ ವ್ಯಬಿಚಾರಮಾಬಿ ಇಸ್ರಾಯೇಲ್‌ವಾಳು ಧೊಕ್‌ಡೈನ್ ಪಟ್ಕಾವ್‌ಣು ಕರಿ ಬಿಳಾಮನೆ ಬಾಲಕನ ಶಿಕಾಡ್ಯೊತೆ ಖರಾಬ್ ಬೋಧನೆನ ಧರಿಲ್ಯಾವಳು ತಾರಾಮ ಛಾ.

15 ಇಮ್ಮಸ್ ನಿಕೋಲಾಯನ ಶಿಕಾಡನಿಘೋಣಿ ಚಾಲವಾಳುಬಿ ತುಮಾರಮ ಛಾ.

16 ಇನಖ್ವಾಜೆ ತೂ ಮನ್ ನಾ ಫರಾಯೊತೊ ಮೇ ಒಗ್ಗಿಸಮ ತಾರಕನ ಐನ್ ಮಾರ ಮ್ಹೋಡಮಾಥು ಆವಾಳಿ ತಲ್ವಾರ್‌ಧಿ ಇವ್ವಪರ್ ಜಂಗ್ ಭೀಡಿಪ್.

17 ದೇವ್ನುಆತ್ಮನೆ ಸಬೆಖ್ವಾರಾನ ಬೋಲಾತೆ ಇನ ಕಾನ್‌ರ್ದವಾಳು ಖ್ವಮ್‌ಜಾದೆ. ಕೋಣ್ ಜೂತಾಸ್ತಿ ಇನ ಲಪಾಡಿರಾಖ್ಯೊಸ್ತೆ ಮನ್ನ ಕರಿ ಖಾಣನ ದಿಶ್. ಅತ್ರೇಸ್ ಕಾಹೆತೆ ಮೆ ಇನ ಏಕ್ ಧೋಳ ಬಂಡಾನ ದಿಶ್, ಯೋ ಬಂಡಾಪರ್ ನವು ನಾಮ್ನ ಟಕೈನ್‌ಲೀಖ್ಪಿಷ್ ಯೋ ನಾಮ್ ಲೀರಾಖವಾಳನ ಮಾಲುಮ್ ಪಡ್‌ಶೆ, ಪಣ್ಣಿ ಯೋ ಬಿಜು ಕಿನಾಬಿ ಮಾಲುಮ್ ಕೋಪಡ್ವೇನಿ.

ಧುವತ್ಯೆರಾನು ಸಬೆವಾಳನ ಸಂದೇಶ್

18 ಧುವತ್ಯೆರಾಮ ಛಾತೆ ಸಬೇನು ದೂತಾನ ಅಮ್‌ಲೀಕ್, ಆಗ್‌ನಿ ಝುಲ್‌ಪಟ್‌ನಿತರನ ಡೋಳಾ, ಝುಮ್ಕಾಸ್‌ತೆ ತಾಂಬಾನಿತರನೊ ಪಂಜ ರ್ದವಾಳೊ ದೇವ್‌ನೊ ಛಿಯೊ ಶಾತ್ ಬೋಲಾಸ್‌ಕತೊ,

19 ತಾರ ಕಾಮ್ ಅಖ್ವಾನಾಬಿ, ತಾರಿ ಪ್ಯಾರ್‌ನಾಬಿ, ವಿಶ್ವಾಸ್‌ನಾಬಿ, ಚಾಕ್ರಿನಾಬಿ ಅಜ್ಜು ಖ್ವಮಾಳನುಬಿ ಮೇ ಮಾಲುಮ್ ಕರಿರಾಖ್ಯೊಸ್.

ಅತ್ರೇಸ್ ಕಾಹೆತೆ ತಾರು ಹಮ್ಕೆನು ಕಾಮ್‌ಖಾರು ತಾರ ಅಗ್‌ಲ್ಯ ಕಾಮ್‌
ಖಾರ್‌ಧಿಬಿ ಊಚು ಹುಯಿರ್ಟ್‌ಕರಿ ಮಾಲುಮ್.

20 ತಾರ ಭಣೀಧು ಮಾರಕನ ಅಪ್‌ರಾದ್ ಏಕ್ ಛಾ. ಯೆಜೆಬೇಲ್
ಕರಿ ಆ ತಯೇಡ ಇನುಯೋಸ್ ಪ್ರವಾದಿನಿಕರಿ ಬೋಲಿಲಿನ್,
ವ್ಯಬಿಚಾರ್ ಕರೇಜಾಯ್‌ಕರೀಬಿ ಮೂರತ್ನ ಅರ್ಪಣ್ ಕರಾನ ರಾಲ್ಫನ
ಖಾಯೆಜಾಯ್ ಕರೀಬಿ ಮಾರ ದಾಸರ್ನ್ ಬೋಧನೆ ಕರೀನ್
ಯೋ ಇವ್ಣುನ ಝೂಟಿ ಮಾರಗ್‌ಮ ಚಲವ್‌ಕರಿತೋಬಿ ತೂ ಇನ
ಭಿರಾಖ್ಯೊಕೊಂತೆ ಹುಕುಮ್ ದ್ಯವಾಳೊ ಹುಯಿರ್ಟ್‌.

21 ಯೊ ಹೈರಿತೆನ ವ್ಯಬಿಚಾರ್‌ನ ಮ್ಹೇಲಿನ್ ಮನ್‌ಫರೈನ್ ದೇವ್‌ಭಣಿ
ಫರಾನ ಮೇ ಯೋ ತಯೇಡಾನ ಗಡುದಿದೊ ತೋಬಿ ದೇವ್‌ಭಣಿ
ಫರಾನ ಇನ ಮನ್ ಕೊಆಯುನಿ.

22 ಹಂದೇಕ್ ಯೋ ಹುಯಿರ್ಟ್‌ತೆ ಬಿಲ್ಹಾವ್ಣಪರ್ ಪಡಿರ್ಟ್‌ಪನಿ
ಫೋಣಿ ಕರೀಶ್, ಅಜು ಇನಿ ಜೋಡ್‌ವ್ಯಬಿಚಾರ್ ಕರವಾಳು ಪಶ್ಚತ್ತಾಪ್
ಕರೀನ್ ದೇವ್‌ಭಣಿ ಫರಿನ್ ಮ್ಹೇಲ್ಯುನಾತೊ ಇವ್ಣುನ ಘಣು ಖ್ವಿತ್‌ಪ್ಪಿಮ
ಪಡಾನಿಫೋಣಿ ಕರಿಶ್.

23 ಯೋ ಹುಯಿರೀತೆ ಇನ ಲಡ್ಕಾವ್‌ನ ಮಾರಿನಾಖಿಶ್. ತದೆ ಮೆ
ಅದ್ವಿ ಖ್ವಾರನ ದಿಲ್ನ ಮಹಿ ತರೀಪ್ಪ ಕರಾವಾಳೊ ಕರಿ ಖ್ವಾರಿ ಸಬೇವ್‌ನ
ಮಾಲುಮ್ ಪಡ್‌ಶೆ. ತುಮಾರಮ ಹರೇಕ್‌ನಾಬಿ ಇವ್ಣು ಇವ್ಣು ಕಾಮ್‌
ಕಿಮ್ಕಿ ತಿಮ್ಕನ್ ಪ್ರತಿಫಲ್ ದಿಶ್.

24 ಕತೋಬಿ ಧುವತ್ಯೆರಾಮ ರ್ವಾಳ, ಬಿಜ್‌ಖ್ವಾರನ ಮೇ
ಬೋಲಾನು ಶಾತ್‌ಕತೊ, ತುಮೆ ಇನು ಶಿಕಾಡನಿತರ ಚಾಲ್ಯಾಕೊಯ್ನಿ
ಶೈತಾನ್ನ್ ಖ್ವರ್ತಿನು ಗಪ್ಲತ್‌ಖ್ವಾರು ಕೋಣ್ ಕೋಣ್ ಮಾಲುಮ್
ಕೋಕರ್‌ಯಾಂತೆ ರ್ವೆಸ್ಕಿ ಇವ್ಣುನ ಬೋಲಾನು ಶಾತ್‌ಕತೊ ಮೇ
ಬಿಜೇಕ್ ವಜನ್ ತುಮಾರಪರ್ ಕೋನಾಖಿಷ್‌ನಿ.

25 ಕತೋಬಿ ತುಮೆ ಲೀರಾಖ್ಯಾಸ್ತೆ ಇನಾಸ್ ಮೇ ಆವಲಗು ಘಟ್‌ಧಿ
ಧರರಾಖೊ.

26 ಕೋಣ್ ಜೂತಿನ ಆವಾಸ್ಕಿ ಅಜು ಮನ ಪಸಂದ್‌ನು
ಕಾಮ್‌ಖಾರು ಖ್ವರ್ತಿನು ಚಲಾವಸ್ಕಿ, ಇನ ಮೇ ಮಾರ ಬಾಧಿ ಲಿದೋತೆ

ಅದಿಕಾರ್ನಿ ಫೋಣಿಸ್ ಅದ್ವಿಪರ್ ಅದಿಕಾರ್ನ ದಿಶೆ.

27 ಯೋ ಲೋಡಾನ ಲಠೇಥಿ ಇವ್ವುನ ಚಲಾವಾಷೆ, ಮಾಟಿನು ಮಟ್ಟಿ ಪುಟಿಭಾವಾನಿಮತ್ ಇವ್ವು ತಾವಿತ್ ಟುಟಿಜಾಷೆ.

28 ಮೆ ಇನ ಉಜಾಳು ದೆಖಾಡನ ಶುಕ್ಕರ್ನ್ ದಿಶೆ.

29 ದೇವ್ನ ಆತ್ಮನೆ ಸಬೆಖ್ವಾರಾನ ಬೋಲಾತೆ ಇನ ಕಾನ್ ರ್ವಾಳು ಖ್ವಮ್ ಭಾದೆ.

3

ಸಾರ್ವಿಸ್ ಸಬೆವಾಳನ ಸಂದೇಶ್

1 ಸಾರ್ವಿಸ್ ಮ ಛಾತೆ ಸಬೆನ ದೂತನ ಅಮ್‌ಲೀಕ್: ದೇವ್ನ ಖ್ವಾತ್ ಆತ್ಮಾನ ಅಜ್ಜು ಖ್ವಾತ್ ಶುಕ್ಕರ್‌ನ ಲೀರಾವಾಳು ಯೋ ಬೋಲಸ್ ಶಾತ್‌ಕತೊ, ತಾರು ಕಾಮ್‌ಖ್ವಾರು ಮನ ಮಾಲುಮ್ ಛಾ. ಜಿವ್ವೊಕರಿ ನಾಮ್ ತುನ ರ್ವಯುತೋಬಿ, ತೂ ಮರ್ರ್ಯೊಹುಯೊ ಹುಯಿರೊಸ್.

2 ಹೊಷಾರ್ ಹೂ ಮರಾನಿ ಹಾಲತ್ಮ ಛಾತೆಯಿನ ಧೀಪತ್ ದೇ. ಶನಕತೊ ಮಾರ ದೇವ್‌ಖ್ವಾವ್ಣೆ ತಾರ ಕಾಮ್‌ಖ್ವಾರಾವ್ಣೆ ಏಕ್‌ತೋಬಿ, ಪೂರಹುಯುಕರಿ ಮನ ದೆಖಾಯುಕೊಯ್ಣಿ.

3 ಇನಖ್ವಾಜೆ ತೂ ಲೀರಾಖ್ಯೊಸ್ತೆ ಬೋಧನೆನ ಯೋ ಖ್ವಮ್‌ಜ್ಯೊತೆ ಪರಕ್ಖ್ ಖ್ವಯಾಲ್ಮ ಲೈನ್ ಇನ ಬಚ್ಚಾಡಿಲೆ, ಮನ್ ಫರಾವೊ, ದೇವ್‌ಭಣಿ ಫರಿಜಾ, ತೂ ಹೊಷಾರ್ ನಾಹುಯೋತೊ, ಚೋರ್ ಆವಾನಿಫೋಣಿ ಆಯಿಶ್. ಮೇ ಖಿವಿ ವಖ್ವತ್‌ಮ ತಾರಕನ ಏಶ್‌ಕರಿ ಬೋಲಾನು ತುನ ಮಾಲುಮ್‌ಪಡ್‌ಶೇಸ್ ಕೊಯ್ಣಿ.

4 “ತುಮಾರು ಸಬೆನ ಮಳಿರ್ನ್ವಸ್ತೆ ಥೋಡ ಭಣ ಸಾರ್ವಿಸ್‌ನು ಬೀಜೂಬಿ ಪವಿತ್ರ ಛಾ. ಅವ್ಣೆ ಇವ್ವು ಲುಂಗ್ವಾನ ಗಂಧು ಕೋಕರಿರಾಖ್ಣಿನಿ. ಅವ್ಣೆ ಯೋಗ್ಯರ್ ಹುಯಿರ್ವಿಷೇತೆ ಇನಖ್ವಾಜೆ ಥೋಳು ಲುಂಗ್ವಾನ ಫೇರಿನ್ ಮಾರ ಜೋಡ್ವು ಚಾಲ್‌ಷೆ.

5 ಜೀತ್ ಲ್ಯವಾಳೊ ಥೋಳ ಲುಂಗ್ವಾನ ಫೇರ್‌ಶೆ. ಜಾನ್ವ ಹಕ್‌ವಾಳಾನಿ ಪುಸ್ತಕಮಾಥು ಇನ ನಾಮ್ ಮೇ ನೂಫಿಶ್‌ಕೊಂತೆ ಯೋ ಮಾರೊ

ಕರಿ ಮಾರ ಬಾನ ಖ್ವಾಮ್ಜೇಬಿ ಇನ ದೂತವ್ವ ಖ್ವಾಮ್ಜೇಬಿ ಮಾನವಾಳೊ ಹುಯಿರ್ದೇಶ್,

6 ದೇವ್ನುಆತ್ಮನೆ ಸಬೆಖ್ವಾರಾನ ಬೋಲಾತೆ ಇನ ಕಾನ್‌ರ್ದವಾಳು ಖ್ವಾಮ್ಜಾದೆ.

ಫಿಲಿಡೇಲ್ವಿಯ ಸಬೆವಾಳನ ಸಂದೇಶ್

7 ಫಿಲಿಡೇಲ್ವಿಯಾಮ ಛಾತೆ ಸಬೆನ ದೂತನ ಅಮ್‌ಲೀಕ್: ಪರಿಶುದ್ಧಬಿ, ಖ್ವಾಚೊಹುಯಿರ್ದವಾಳೊಬಿ, ದಾವೀದನು ಬೀಗಾನು ಕೀಲಿ ಲೀರಾವಾಳೋಬಿ, ಕಿನೇಥೀಬಿ ನಾ ಮೂಚನಹೋಣುತೆ ಇಮ್ ಕಾಡವಾಳೊ, ಖೆವಾಥೀಬಿ ಉಖ್ವಾನ ನಾ ಹೋಣುತೆ ಇಮ್ ಮೂಚಾವಾಳೊ ಹುಯಿರೋತೆ ಶಾತ್ ಬೋಲಾಸ್‌ಕತೊ,

8 ತಾರು ಕಾಮ್‌ಖ್ವಾರು ಮನ ಮಾಲುಮ್ ತುನ ಛಾತೆ ಶಕತ್ ಥೋಡು ರ್ದಯುತೋಬಿ ತುನೆ ಮಾರ ನಾಮ್ನ ಧಕೇಲೊಕೊಂತೆ ಮಾರಿ ವಚನ್ ಬಚಾಡ್ಲೊತೆ ಇನಖ್ವಾಜೆ ಹಂದೇಕ್ ತಾರಖ್ವಾಮ್ಜೆ ಏಕ್ ಬಾಕಲ್ನ ಉಖ್ವಿರಾಖೊಸ್. ಕೋಣೆಬಿ ಇನ ಮೂಚ್‌ಪೆ ಕೊಯ್ನಿ.

9 ಖ್ವಮಜ್! ಯೆಹೂದ್ಯರ್‌ಕರಿ ಝೂಟೊ ಬಡೈಮಾರಿನ್ ಥೋಡುಜಣು ಶೈತಾನ್ ಸಬೆನಾ ಮಂದಿರಾಮ ರ್ದವಾಳು ಹುಯಿರ್ದಸ್. ಯೋ ಅದ್ಮಿಖ್ವಾರು ತಾರಖ್ವಾಮ್ಜೆ ಆಯಿನ್ ತಾರ ಗೋಡಾಪರ್ ಆಡ್‌ಪಡನ್ ಖ್ವಲಾಮ್ ಕರಾನಿಫೋಣಿ ಕರೀಶ್. ಮೇ ಪ್ಯಾರ್ ಕರ್ದೊತೆ ಅದ್ಮಿ ತುಮೇಸ್‌ಕರಿ ಬೋಲಾನು ತದೆ ಇವ್ಣೆ ಮಾಲುಮ್ ಕರಿಲಿಶೆ.

10 ಮಾರಿ ವಚನ್ ತುನೆ ಚಲಾಯೊತೆ ಇನಖ್ವಾಜೆ ಧರ್ತಿಮ ಜಿವ್ಣುಕರವಾಳ ಖ್ವಾರಸ್ ತರೀಪ್ಪ ಕರಾನಖ್ವಾಜೆ ಅಖ್ವಾ ಜಗತ್ಪರ್ ಆವಾನಯುತೆ ಕರಣ್ ಶೋದನೆನ ದನ್ಮ ಮೇ ತುನ ಆಖ್ವೊರೊ ಕರಾವಾಳೊ ಹುಯಿನ್ ಬಚಾಡಿಶ್.

11 ಮೇ ಒಗ್ಗಿಸ್‌ಮ ವಳ್ಳಾವುಸ್. ತಾರಿ ಕಿರೀಟ್ ಕೋಣೆಬಿ ನಾ ಛಿನಾವ್ಣುತೆ ಇಮ್ ತುನೆ ಲೀರಾಖೊಸ್ತೆ ಇನ ಘಟ್ ಧರಿರಾಕ್.

12 ಖಿವೊ ಜೂತಾಸ್ಕಿ ಇನ ಮಾರ ದೇವ್ನ ಮಂದಿರ್‌ಮ ಆಧಾರ್‌ನು ಖಂಬುಕರಿನ್ ಭೀರಾಖಿಷ್. ಯೋ ಕದೇಬಿ ಹಿಜ್ಜಾಥು ಧಕ್‌ಷೇಸ್ ಕೊಯ್ನಿ. ಅತ್ರೇಸ್ ಕಾಹೆತೆ ಮಾರ ದೇವ್ನ ನಾಮ್ನ ಅಜ್ಜು ಮಾರ ದೇವ್ನ ಖ್ವಿಯೇರನ್ ನಾಮ್ ಇನಾಪರ್ ಲೀಖಿಶ್. ನವು ಯೆರೂಸಲೇಮಸ್ ಯೊ ನಂಗರ್. ಯೋ ಖ್ವಿಯೇರ್ ಮಾರ ದೇವ್‌ಕಂಥು ಸೊರ್ಗಮಾಥು ಉತ್ರಿ ಆವಾಶೆ. ಮಾರು ನವುನಾಮ್ ಇನಾಪರ್ ಲೀಖಿಶ್.

13 ದೇವ್ನ ಆತ್ಮನೆ ಸಬಿಖ್ವಾರಾನ ಬೋಲಾತೆ ಇನ ಕಾನ್ ರ್ವಾಳು ಖ್ವಿಮ್‌ಜಾದೆ.

ಲವೊದಿಕೀಯನ ಸಬೆವಾಳನ ಸಂದೇಶ್

14 ಲವೊದಿಕೀಯಮ ಛಾತೆ ಸಬೆನ ದೂತನ ಲೀಕ್, ವಿಶ್ವಾಸ್ ಯೋಗ್ಯಬಿ, ಖ್ವಾಚಿ ಸಾಕ್ಷಿಬಿ, ದೇವ್ನಿ ಬಣಾವಟ್ನಿ ರಾಜ್ ಹುಯಿರೋತೆ 'ಆಮೆನ್' ಕರಿ ರ್ವಾಳೊ ಶಾತ್ ಬೋಲಸ್‌ಕತೊ,

15 ತು ಕರನ್ಯೊತೆ ಕಾಮ್‌ಖ್ವಾರು ಮನ ಮಾಲುಮ್ ಛಾ. ಮೇ ಶಾತ್ ಆಖ್ವೊ ಕರುಸ್ ಕತೊ, ತೂ ರಂಡು ಕಾಹೆ ನತರ್ ಗರಮ್ ಕಾಹೆ ತು ರಂಡು ನತರ್ ಗರಮ್ ರ್ವಾಯೋಹೊತ್ಸೊ ಅಛ್ವು ಥು.

16 ಕತೋಬಿ ತೂ ಗರಂಬಿ ಕಾಹೆತೆ ರಂಡೂಬಿ ಕಾಹೆತೆ ಅಂಡಚೇತು ರ್ವಾಯೊತೊ ತುನ ಮಾರ ಬಾಕಮಾಥು ಥೂಕಿದಿಶ್.

17 ತೂ ತಾರಿ ಬಾರೇಮ ಮೇ ಶೌಕಾರ್ ಧನ್‌ದೌಲತ್ಸೊ ಶನಾಮಬಿ ಟುಸ್‌ಟಿನಾರ್ವಾಳೊ ಕರಿ ಬೋಲಿಲೇಸ್. ಕತೋಬಿ ತೂ ಖಲಿ ಖರಾಬ್ ಹಾಲತ್ ಪಡಿರ್ವಾಳೊ. ಖರಾಬ್ ನಶೀಬ್‌ನೊ ಅನಾದಿ, ಅಂಧೊ ಉಫಾಡೊ ಹುಯಿರೋಸ್ ತು ಕರಿ ಮಾಲುಮ್ ಕೋಕರನ್ಯೊತೆ ಛಾ.

18 ತೂ ಶೌಕಾರ್ ಹುವಾನ ಆಗ್‌ಮ ನಾಖಸ್ತೆ ಖೊನ್ನಾನಾಬಿ ಖ್ವಿರಮ್‌ನ ಕಾರಣ್ ಹುಯಿರನ್ಯೊತೆ ತಾರು ಉಫಾಡಾನ ದೆಖಾವ್ಣನಾತೆ ಫೆರಾನಖ್ವಾಜೆ ಧೋಳ ಲುಂಗ್ವಾವ್‌ನಾಬಿ ಡೋಳೊದೆಖಾವನಖ್ವಾಜೆ ತುಮಾರ ಡೋಳಾವ್‌ನ ಲಗಾಡನಖ್ವಾಜೆ ಅಂಜಣ್‌ನಾಬಿ ಮಾರೇಥಿ ಲೀಲೇವ್ಣಕರಿ ಮೇ ತುಮೂನ ಅಕ್ಕಲ್ ಬೋಲುಕರುಸ್.

19 ಮೇ ಕಿನಕಿನ ಪ್ಯಾರ್ ಕರೂಸ್ಕಿ ಇವ್ವುನ ಗುರ್ಕವುಸ್ ಅಜು ನಿಶತ್ ದೆವುಸ್. ಇನಖ್ವಾಜೆ ತೂ ಹೊಷಾರ್ಥಿ ರಕ್ಷೆ. ಮನ್ ಫರೈನ್ ದೇವ್‌ಭಣಿ ಫರಿಜಾ.

20 ಹಂದೇಕ್ ಖ್ವಾಪ್ಪೆ ಭೀರಿನ್ ಬಾಕಲ್ ಖಟ್‌ಕಟಾವ್ ಕರುಸ್, ಕೋಣ್‌ತೋಬಿ ಮಾರಿ ಆವಾಜ್‌ನ ಖ್ವಮ್‌ಜಿನ್ ದರ್ರ್ವಾಜು ಕಾಡ್ಯತೊ, ಮೇ ಮಹಿ ಐನ್ ಇನ ಜೋಡೆ ಖಾಣು ಖೈಶ್. ಯೊ ಮಾರಿ ಜೋಡ್ಡೆ ಖಾಣು ಖಾಶೆ.

21 ಮೇ ಜೂತಿನ್ ಮಾರ ಬಾನಿ ಜೋಡ್ಡೆ ಸಿಂಹಾಸನ್‌ಮ ಬೆರೂತೆ ತಿಮ್ಮನ್ ಜೂತಹುಯಾನ ಮಾರ ಜೋಡೆ ಸಿಂಹಾಸನ್‌ಮ ಬೇಖ್ವಾನಿ ಅಧಿಕಾರ್ ಮೇ ದಿಶ್.

22 ದೇವ್ವುಆತ್ಮನೆ ಸಬೆಖ್ವಾರಾನ ಬೋಲಾತೆ ಇನ ಕಾನ್ ರ್ವವಾಳು ಖ್ವಮ್‌ಜಾದೆ.

4

ಸೊರ್ಗಮ ಆರಾದನೆ

1 ಇನಪಾರ್ ಮೆ ದೇಖಾನಿವಖ್ತೆ ಸೊರ್ಗಾಮ ನಿಕ್ಕಿರಂತ್ ಏಕ್ ದರ್ರ್ವಾಜು ದೆಖಾಯು. ಪಹಿಲೆ ವಾತೆ ಬೋಲ್ಬುಧೂತೆ ಅವಾಜ್ ಪಾಲ್ತು ತುತ್ತೂರಿನಿತರ ಬೋಲಾನಿತರ ಮನ ಖ್ವಮಜ್‌ಪಡ್ಕು ಯೋ ಅವಾಜ್ “ಹಜ್ಜಾ ಲ್ಲಡಿಆವ್ ಅಗ್ಗಳ್ ಚಾಲ್‌ಶೇತೆ ಖ್ವಾರು ತುನ ವತಾಳಿದೆವುಸ್” ಕರಿ ಬೋಲ್ಬು.

2 ತುರಂಥಿಸ್ ಮೇ ಆತ್ಮಾನ ಕಬ್‌ಜಮಾಥೊ, ತದೆ ಹಿಜ್ಜಾ ಪರ್‌ಲೋಕ್‌ಮ ಏಕ್ ಸಿಂಹಾಸನ್ ಥೀ.ಯೋ ಸಿಂಹಾಸನ್‌ಪರ್ ಏಕ್‌ಬಣೊ ಬೆರೋಥೊ.

3 ಬೆರೊಹುಯೊ ಡೋಳಾವ್‌ಮ ಚಾಂದ್‌ನು ಉಜಾಖ್ತ್ ಪದ್ಮರಾಗಮಣ್‌ನಿತರ ದೆಖವ್‌ಕರ್ತೊ.ಸಿಂಹಾಸನ್ನ ಅಶ್‌ಪಿಶ್ ಹರ್ರ್ವಾನಿಮತ್ ದೆಖವ್‌ಕರ್ತುಧೂತೆ ಆಕಾಶ್ ಧೂಣ್‌ಥಿ.

4 ಅತ್ರೇಸ್ ಕಾಹೆತೆ ಸಿಂಹಾಸನ್ನ ಅಶ್‌ಪಿಶ್ ಚಾರ್‌ಉಪ್ಪರ್ ವೀಖ್ತ್ ಸಿಂಹಾಸನ್‌ಖ್ವಾರಿಥಿ. ಯೋ ಸಿಂಹಾಸನ್‌ಪರ್ ಧೋಳು ಪೆರ್ವಾಖ್ತ್

ಫೇರುಹುಯು ಚಾರ್ ಉಪ್ಪರ್ ವೀಖ್ವೊಜ್ಜಣು ಶಾಣು ಬೇರೂಡು. ಇವ್ವ ಮಾಧಪರ್ ಖೊನ್ನಾನಿ ಕಿರೀಟ್ ಘಲ್ಟಿರ್ದೀಧಿ.

5 ಸಿಂಹಾಸನ್‌ಧು ವಿಜ್ಞಳಿ ಖಡ್ಕಾನು ಘಲಾರನು ಅವಾಜ್ಞ ಭಾರ್ ಅವಕರ್ತುಧು. ಯೋ ಸಿಂಹಾಸನ್ನ ಖ್ವಾಮ್ವೆ ಖ್ವಾತ್ ದಿವಳ್ಳಿ ಲಾಗುಕರ್ತಿಧಿ, ಯೋ ದಿವಳ್ಳಿಖ್ವಾರು ದೇವ್ನು ಖ್ವಾತ್ ಆತ್ಮವ್ ಹುಯಿರುಧು.

6 ಅತ್ರೇಸ್ ಕಾಹೆತೆ ಸಿಂಹಾಸನ್ನ ಖ್ವಾಮ್ವೆ ಫಟಕ್ಕಿನಿತರ ದೆಖಾವನು ಶಿಖ್ವಾನು ದರ್ರ್ಯಾವ್ ರ್ವವಾನಿಘೋಣಿ ದೆಖಾಯು. ಸಿಂಹಾಸನ್ನ ಚಾರ್ ಬಾಜುಮಾಬಿ ಚಾರ್ ಜೀವಿ ಧೂ. ಇನಖ್ವಾಮ್ವೆಪೀರೆ ಕೈಯೆಕ್ಕಿ ಡೋಳಾಧ.

7 ಪಹಿಲು ಜೀವಿ ಶುಂಭಾನಿತರ ಧು, ಬೇನು ಜೀವಿ ಘುಳಿನಿತರ ಧೂ. ತೀನ್ನ ಜೀವಿನು ಮೋಡು ಅದ್ವಿನಿತರ ಧು, ಚಾರ್ ಜೀವಿ ಉಡಂತು ಗರದ್‌ನಿಘೋಣಿ ಧು.

8 ಯೋ ಚಾರ್ ಜೀವಿ ಎಕೇಕೆನ ಲೋಲೋ ಫಾಕ್ವಿ ಧು. ಅಶ್‌ಪಿಶ್‌ಬಿ ಮಹಿಬಿ ಘಣು ಡೋಳಖ್ವಾರುಧು, ಆ ಜಿನಾವರ್ ಖ್ವಾರು ರಾತ್‌ದನ್ ಆರಾಮ್‌ಕೊಂತೆ ದೇವ್ ಹುಯಿರ್ದಾವಳೊ ಪ್ರಭು ಪರಿಶುದ್ಧ ಪರಿಶುದ್ಧ ಪರಿಶುದ್ಧ ಯೋ ಸರ್ವಶಕ್ತನೊ ಅಗ್ಗಳ್ ಧೋತೆ, ಹಮ್ಮೆ ಛಾತೆ, ಅವಾಳೊಛಾತೆ ಕರಿ ಬೋಲುಕರ್ತುಧು.

9 ಜಗ್‌ಜಮಾನಮಾಬಿ ಜಿವೊರ್ದೀನ್ ಸಿಂಹಾಸನ್‌ಪರ್ ಬೆರೊರ್ದವಾಳಾನ ಯೋ ಜೀವಿ ಮಹಿಮ, ಮರ್ಯಾದಿ ಧನ್ಯವಾದ್ ಕರುಕರ್ತುಧು.

10 ಯೋ ಚಾರ್ ಉಪ್ಪರ್ ವೀಖ್ವೊ ಜ್ಜಣು ಶಾಣುಖ್ವಾರು ಸಿಂಹಾಸನ್‌ಪರ್ ಬೆರೊರ್ದವಾಳಾನ ಗೋಡಾಪರ್ ಆಡ್‌ಪಡಿನ, ಇವ್ವ ಕಿರೀಟ್ಟು ಸಿಂಹಾಸನ್ನ ಖ್ವಾಮ್ವೆ ನಾಖಿನ್, ಜಾನ್ನದೇವ್‌ನ ಕದೇಬಿ ಆರಾದನೆ ಕರ್ತುಹುಯಿನ್

11 ಹಮಾರೊ ಪ್ರಭು ಹುಯಿರ್ದೊತೆ ದೇವ್, ತೂ ಮಹಿಮೆನಾಬಿ ಮಾನ್ ಮರ್ರ್ಯಾದಿನಾಬಿ ಶಕತ್ವ ಲೀಲಾವನ ಯೋಗ್ಯಹುಯಿರೋಸ್, ಶನಕತೊ ಹರೇಕ್ಷ ಉಬ್‌ಜಾಯೋತೆ ತೂಸ್, ಅಖ್ವೊಬಿ ತಾರೀಸ್ ಖ್ವೊಜ್ಞಾಧಿಧು. ಅಜ್ಜು ತಾರೀಸ್ ಖ್ವಿಯಾಲೊಧಿ ಬಣಾವಟ್ ಹುಯು ಕರಿ

ಬೋಲ್ತುಹುಯಿನ್ ಆರಾದನೆ ಕರುಕರ್ತುಡು.

5

ಪುಂಗ್‌ಳಿ ಅಜು ಮೇಂಡು

1 ಮೇ ಸಿಂಹಾಸನ್‌ಪರ್ ಬೆರಹುಯಾನ ಖಾವಹಾತ್ತ್ ಏಕ್ ಪುಂಗ್‌ಳಿನ ದೇಖ್ಚೊ, ಇನ ಮಹಿನಿ ಬಾಜೂಮ ಅಜು ಫಾದರ್ಲಿ ಬಾಜೂಮ ಲೀಖ್ಚಿರೊಡು, ಯೋ ಖ್ವಾತ್ ಮುದ್ರಾಧಿ ಮುದ್ರೊ ಮರೈರೊಡ್ಲೊಡು.

2 ಅತ್ರೇಸ್ ಕಾಹೆತೆ ಏಕ್ ಶಕತ್ನೊ ದೇವ್‌ದೂತನೆ ಊಚಿ ಅವಾಜ್‌ಧಿ ಚಿಕ್ರಿನ್ “ಆ ಮುದ್ರಾವ್ಣ ಪೋಡಿನ್, ಪುಂಗ್‌ಳಿನ ಛೋಡಾನ ಕೋಣ್ ಯೋಗ್ಯ್?” ಕರಿ ಬೋಲಾವ್‌ಕರ್ತೊಡೊ.

3 ಕತೋಬಿ ಯೊ ಪುಂಗ್‌ಳಿನ ಛೋಡಾನರ್ಲ್ವೊ ಇನಾಮ ದೇಖಾನರ್ಲ್ವೊ ಪರ್‌ಲೋಕ್‌ಮ ರಲ್ವೊ ಧರ್ತಿಪರ್‌ರ್ಲ್ವೊ ಪಾತಾಳ್‌ರ್ಲ್ವೊ ಕಿನೇಥೀಬಿ ಕೊಹುಯನಿ

4 ಪುಂಗ್‌ಳಿನ ಕಾಡನರ್ಲ್ವೊ ದೇಖಾನರ್ಲ್ವೊ ಯೋಗ್ಯ್ ಹುಯಿರ್ಲ್ವಾವಳೊ ಏಕ್ ಜಣುಬಿ ಕೊಮಳ್ಳುನಿಕರಿ ಮೇ ಘಣು ಕುಡಾಪಕರೀನ್ ರೋವ್‌ಕರ್ತೊಡೊ.

5 ಶಾಣಾವ್‌ಮ ಏಕ್ ಜಣಾನೆ ಮನ, “ರೋವ್‌ನಕೊ ಯೂದಖೂಮ್ಮ ಪೈದಹುಯೊತೆ ಶುಂಭಾ ದಾವೀದನೊ ಖಾನ್‌ದಾನ್‌ವಾಳೊ ಹುಯಿರೋತೆ ಏಕ್ ಜಣೊ ಜೂತಿರ್ಲ್ವಾವಾಳೊ ಲ್ಹಾ. ಯೊ ಖ್ವಾತ್ ಮುದ್ರಾವ್ಣ ಪೋಡಿನ್ ಆ ಪುಂಗ್‌ಳಿನ ಛೋಡ್‌ಶೆ” ಕರಿ ಬೋಲ್ಚೊ.

6 ಸಿಂಹಾಸನ್‌ಬಿ ಚಾರ್ ಜೀವಿಬಿ ಥೂತೆ ಝಗೋಕನಾಬಿ ಅಜು ಶಾಣುಖ್ವಾರು ಥೂತೆ ಝಗೋನ ಇಚ್‌ಮ ಏಕ್ ಮೇಂಡಾನ ಭಿಯುರ್ಲ್ವಾನು ದೇಖ್ಚೊ. ಯೋ ಹಮ್ಚೆ ತದೇಸ್ ಬಲೀನಖ್ವಾಜಿ ರಕ್ಟೀಖ್ವಿಯ್ ರಲ್ವಾವನಿತರ ದೆಖವ್‌ಕರ್ತುಡು. ಯೋ ಮೆಂಡಾನ ಚೆಲ್ಕಾನ ಖ್ವಾತ್ ಶಿಂಗ್ಡು ಖ್ವಾತ್ ಡೋಳಾವ್‌ಡು. ಆಖ್ವಾರು ಧರ್ತಿಪರ್ ಮೋಕ್‌ಲೈರ್ಲ್ವೊಡು ದೇವ್‌ನ ಖ್ವಾತ್ ಆತ್ಮಹುಯಿರುಡು.

7 ಯೋ ಮೇಂಥಾನು ಚೆಲ್ಕುಅಯಿನ್ ಸಿಂಹಾಸನ್‌ಪರ್ ಬೆರೊರ್ದವಾಳಾನ ಖಾವಹಾತ್ಮಧು ಯೊ ಪುಂಗ್‌ಳಿನ ಮಾಂಗಿಲಿದೊ.

8 ಪುಂಗ್‌ಳಿನ ಮಾಂಗಿಲ್ಕವಾನಿ ವಖ್ಡತೆ ಯೋ ಚಾರ್ ಜೀವಿ 24 ಜಣು ಶಾಣುಖ್ವಾರು ಮೇಂಥಾನು ಚೆಲ್ಕು ಹುಯಿರ್ದವಾಳನ ಪಗ್‌ಪರ್ ಆಡ್‌ಪಡ್ಕು ಹರೇಕ್‌ಜಣಕನ ಹಾತ್ಮ ಖ್ವಾರಂಗೊಬಿ ಖ್ವಾಲರ್ಯಾನು ಡಪ್ಪಾರ್‌ಧಿ ಭರೈರ್ದೊತೆ ಖ್ವೊನ್ನಾನಿ ಡಾಕ್ಟಿಬಿ ಥು. ಯೊ ದೇವ್ನು ಅದ್ವಿನು ಪ್ರಾರ್ಥನೆ ಹುಯಿರ್ದೊ

9 ಇವ್ಣೆ ನವುಗೀಡ್ ಬೋಲ್ತುಹುಯಿನ್ ಪುಂಗ್‌ಳಿನ ಮಾಂಗಾನ, ಇನ ಮುದ್ರಾನ ಫೋಡಾನ ತೂ ಯೋಗ್ಯ ಹುಯಿರೊಸ್ ತೂ ರ್‌ವೀಖ್ವಿಯಾಜ್ಯೆನ್ ಬಲಿದಾನ್‌ಹುಯಿನ್ ತಾರ ಲ್ವೊಯಿಧಿ ಹರೇಕ್ ಖೂಮ್, ಬೋಲಿ, ದೇಖ್ವಾವಾಳಾನ, ಅಖ್ವಾಸ್ ಭಾತ್ತ್ ಅದ್ವಿಖ್ವಾರಾನ ದೇವ್‌ಖ್ವಾಜೆ ಮೋಲ್‌ಲೀರಾಖ್ವೊಸ್.

10 ಇವ್ಣುನ ಅಪ್ಪ ದೇವ್‌ಖ್ವಾಜೆ ರಾಜ್ಯಕರಿನ್ ಯಾಜಕರ್ ಕರಿನ್ ಬಣಾಯೊ, ಇವ್ಣೆ ಜಮೀನ್‌ಪರ್ ರಾಜ್ ಭಲಾವ್‌ಜೆ”.

11 ಇನಪಾರ್ ಇನು ಸಿಂಹಾಸನ್ನು ಚಾರ್ ಜೀವಿ ಅಜ್ಜು ಸಬೆನ ಶಾಣಾವ್ನ ಅಶ್‌ಪಿಶ್ ಭಿಯುಡೊತೆ, ಕೈಯೆಕ್ಕಿ ಜಣು ದೇವ್‌ದೂತರ್ದ್ ಅವಾಜ್‌ನ ಖ್ವಮ್‌ಜೊ. ಇವ್ಣು ಗಣ್ಣಿ ಲಾಖೋಲಾಕ್‌ಬಿ ಕರೋಡೊ ಕರೋಡೋಬಿ ಥು. ಬಿಜ್ಜುಪಾಳ್ತು ದೇಖಾನಿ ವಖ್ಡತೆ ದೇವ್ನ ದೂತರ್ ಭಿಯುಡು.

12 ಆ ದೇವ್‌ದೂತರ್‌ನೆ ಜೋರಾನಿ ಅವಾಜ್‌ಧಿ, “ಖೂನಿ ಹುಯಿಗೋತೆ ಮೇಂಥಾನು ಚೆಲ್ಕು ಅದಿಕಾರ್‌ನಾಬಿ, ಧನ್‌ದಾಲತ್ನಾಬಿ, ಅಕ್ಕಲ್‌ನಾಬಿ, ಶಕತ್‌ನಾಬಿ, ಮರ್ಯಾದಿನಾಬಿ, ಮಹಿಮೆನಾಬಿ, ಧನ್ಯವಾದ್‌ನ ಲ್ವಾವಾನ ಯೋಗ್ಯ ಹುಯಿರೊಸ್” ಕರಿ ಗೀಡ್ ಬೋಲ್ಕು.

13 ಅತ್ರೇಸ್ ಕಾಹೆತೆ ಆಬ್‌ಮಾಬಿ ಜಮೀನ್‌ಮಾಬಿ ಧರ್ತಿನ ಹೇಟೆಬಿ ದಲ್‌ದರ್ದ್ಯಾವ್‌ಮಾಬಿ ಉಬ್‌ಜೂತೆ ಅಖ್ವು ಅಮ್ ಬೋಲ್ಕುಕಿ, “ಸಿಂಹಾಸನ್‌ಪರ್ ಬೆರೊರ್ದವಳನಾಬಿ ಮೇಂಥಾನು ಚೆಲ್ಕು ಹುಯಿರ್ದವಳನಬಿ, ಧನ್ಯವಾದ್, ಮರ್ಯಾದಿ, ಮಹಿಮೆ,

ಖ್ವಾರಿಅದಿಕಾರ್, ಜುಗ್ಗಮಾನಮಾಬಿ ರ್ವಾವಾದೆ.” ಕರಿ ಬೋಲಾನು ಮೆ ಖ್ವಮ್‌ಜೊ.

¹⁴ ಯೋ ಚಾರ್ ಜೀವಿ “ಆಮೆನ್” ಕರಿ ಬೋಲ್ಯು ಶಾಣುಖ್ವಾರು, ಆಡ್‌ಪಡೆನ್ ಆರಾದನೆ ಕರ್ಯ್.

6

ಮುದ್ದೊಖ್ವಾರು

¹ ಮೇಂಡಾನು ಚೆಲ್ಕು ಹುಯಿರಾವಳೊ ಯೋ ಖ್ವಾತ್ ಮುದ್ರಾನ ಪೋಡಾನಿವಖ್ವಾತ್ ಮೇ ದೇಖ್ಚೊ ಅಜ್ಜು ಯೋ ಚಾರ್ ಜೀವಿಮ ಏಕ್ ಜೀವಿ ಫಲಾರನಿತರಾನೊ ಗಳೇಥಿ “ಆವ್”! ಕರಿ ಬೋಲಾನು ಖ್ವಮ್‌ಜೊ.

² ಮೇ ಹಿಜ್ಜಾ ದೆಖಾನಿವಖ್ವಾತ್ ಏಕ್ ಧೋಳೊ ಘೋಡೊ ದೆಖಾಯೊ. ಇನಾಪರ್ ಬೆರೊಹುಯೊ ಹಾತ್ಮ ಏಕ್ ಧೂಣ್ ಧರಾಖ್ಯೊ. ಇನ ಏಕ್ ಕಿರೀಟ್‌ಬಿ ದೆವೈರಲ್ವೊ. ಯೋ ವಹೇರಲ್ಯಾನ ಹರಾವವಾಳೊ ಹುಯಿನ್ ಜೂತಾನಖ್ವಾಜೆ ನಿಕ್‌ಳ್ವೊ.

³ ಮೇಂಡಾನು ಚೆಲ್ಕು ಹುಯಿರಲ್ವಾವಳನೆ ಬೇನು ಮುದ್ರಾನ ಪೋಡಾಖ್ವಾತ್ ಬೇನು ಜೀವಿ “ಆವ್”! ಕರಿ ಬೋಲಾನು ಖ್ವಮ್‌ಜೊ.

⁴ ತದೆ ಲಾಲ್‌ರಂಗ್‌ನೊ ಬಿಜೇಕ್ ಘೋಡೊ ನಿಕ್ಕಿ ಆಯೊ. ಇನಾಪರ್ ಸವಾರಿ ಕರವಾಳನ ಭಮೀನ್‌ಪರ್ಥು ಸಮಾಧಾನ್ ಕಾಡಿನಾಖನ ಅದಿಕಾರ್ ದೆವಾಯು. ಅನೇಥಿ ಅದ್ವಿ ಏಕ್‌ಥಿಏಕ್ ಖೂನಿಕರಾವಳು ಹುಯು. ಅಜ್ಜು ಯೋ ಸವಾರಿನ ಮೋಟಿಖ್ವಿ ಏಕ್ ತಲ್ವಾರ್‌ಬಿ ದೆವಾಯು.

⁵ ಮೇಂಡಾನು ಚೆಲ್ಕು ಹುಯಿರಲ್ವಾವಳೊ ತೀನ್ ಮುದ್ರಾನ ಪೋಡಾಖ್ವಾತ್, ತೀನ್ ಜೀವಿ ಆವ್‌ಕರಿ ಬೋಲಾನು ಖ್ವಮ್‌ಜೊ. ತದೆ ಮೇ ದೇಖಾಖ್ವಾತ್ ಹಿಜ್ಜಾ ಮನ ಕಾಳೊ ಘೋಡೊ ದೆಖಾಯೊ. ಇನಾಪರ್ ಬೆರೊರಲ್ವಾಳಾನ ಹಾತ್ಮ ತರಾಜ್ ಥು.

⁶ ಇನಾಪರ್ ಚಾರ್ ಜೀವಿನ ಇಚ್ಛಾ ಥು ಏಕ್ ಭಣಾನಿ ಅವಾಜ್ ನಿಕ್ಕಾನಿಘೋಣಿ ಖ್ವಮ್‌ಜೊ. ಏಕ್ ಪೈಶಾನ ಏಕ್ ಶೇರ್ ಘವ್, ಅಜ್ಜು

ಏಕ್ ದನ್ನಿ ಕೂಲಿ ತೀನ್ ಶೇರ್ ಬಾಝೊ, ಕತೋಬಿ ತೇಲ್ನ ಅಝು ದ್ರಾಕ್ಷಿನ ರಖ್ವನ್ ಖರಾಬ್‌ನಕೋಕರ್” ಕರಿ ಬೋಲ್ಯು.

7 ಮೇಂಠಾನು ಚೆಲ್ಕುಹುಯಿರ್ದವಾಳನೆ ಚಾರ್ನ್ ಮುದ್ರಾನ ಫೋಡಾನಿವಖ್ವತೆ; ಚಾರ್ನ್ ಜೀವಿ “ಆವ್”! ಕರಿ ಬೋಲಾನು ಖ್ವಮ್‌ಜೊ.

8 ತದೆ ಮೇ ದೇಖಾನಿವಖ್ವತೆ ಹಿಜ್ಜಾ ಬೂದ ರಂಗ್‌ನೊ ಘೋಡೊ ರ್ದವಾನು ದೇಖ್ಲೊ ಯೋ ಘೋಡಾಪರ್ ಬೆರೊರ್ದವಾಳೊ ಸವಾರಿನು ನಾಮ್ ಮರಣ್. ಇನ ಪೀಲೆ ಪಾತಾಳ್‌ಕರಿ ಬೋಲವಾಳೊ ಆಯೊ. ಇವ್ಣುನ ಜಮೀನ್ನು ಚಾರ್ನ್ ಏಕ್ ಭಾಗ್‌ಪರ್ ಅದಿಕಾರ್ ದೆವಾಯು. ಜಂಗ್‌ಥಿಬಿ, ಕಾಳ್ಕುಕಾಳ್ ದನ್‌ಥಿಬಿ, ರೋಗ್‌ಥಿ ಅಝು ಜಗತ್‌ಪರ್ ಛಾತೆ ಝಾಡಿನ ಜಾನ್ವರ್‌ಥಿಬಿ ಅದ್ಮಿವ್‌ನ ಮಾರಾನ ಅದಿಕಾರ್ ದೆವಾಯು.

9 ಇನೆ ಪಾಚ್‌ನ ಮುದ್ರಾನ ಫೋಡಾನಿವಖ್ವತೆ; ದೇವ್ ವಚನ್ನಖ್ವಜೀಥಿಬಿ, ಇವ್ಣುನ ರ್ದವಾನು ಬರೋಬರ್‌ನಿ ಸಾಕ್ಷಿನ ಖ್ವಜೀಥಿಬಿ, ಮರಾವಳನು ಆತ್ಮಖ್ವಾರು, ಬಲಿಪೀಠ್‌ನ ಹೇಟ್ ರ್ದವಾನು ದೇಖ್ಲೊ.

10 ಇವ್ಣೆ ತೂಸ್ ಪ್ರಭು, ಪರಿಶುದ್‌ಬಿ ಖ್ವಾಚೋಬಿ ಹುಯಿರ್ದವಾಳೊ. ಹಮಾರ ಲ್ಹೊಯಿನ ರಂಚ್ಯತೆ ಧರ್ತಿನ್ ಅದ್ಮಿಖ್ವಾರಾನ ಬಿಜು ಕಬ್ಲಗು ನ್ಯಾವ್‌ಫೇಡಾವ ಕೊಯ್ತೀಬಿ, ನ್ಯಾವ್‌ನು ತೀರ್ಪ್ ಕರಾಕೊಂತೇಬಿ ನಿಶತ್ ದೇಸ್ ಕೊಂತೆ ರ್ಲೇಸ್? ಕರಿ ಮೋಟಿ ಅವಾಝ್‌ಥಿ ಚಿಕ್‌ರಲ್ಯ.

11 ತದೆ ಇವ್ಣಾಮ ಅಖ್ವಾಸ್ ಜಣಾನ ಏಕೇಕ್ ಧೋಳೊ ಝುಗ್ಲೊ ದೆವಾಯು. ಅಝು ಥೋಡಿ ವಖ್ವತ್ ಟಿವೈರ್ದೇಣುಕರಿ ಯೋ ಆತ್ಮವ್‌ನ ಖ್ವಮ್‌ಜಾಡ್ಲ್ಯ. ತುಮಾರಿನಿತರ ಖೂನಿ ಹೋಣುತೆ ಭೈಯೇಮ ಥೋಡುಜಣು ಅಝು ಜೋಡ್ನ್ ಚಾಕ್ರಿ ಕರಾವಳನಿ ಗಣ್ತಿ ಪೂರ ಹುವಾಲಗು ಅರಾಮ್‌ಥಿ ರ್ಲೇವ್ಣುಕರಿ ಇವ್ಣುನ ಬೋಲಾಯು.

12 ಯೋ ಮೇಂಠಾನು ಚೆಲ್ಕು ಲ್ಹೋನು ಮುದ್ರಾನ ಫೋಡಾನು ಮೇ ದೇಖ್ಲೊ ತದೆ ಮೋಟು ಭೂಕಂಪ್ ಹುಯು. ಚಾಂದ್ ಕಾಳು ಘುಂಗ್‌ಡಿನಿಮತ್ ಕಾಳೊಹುಯಿಗೊ. ಅಝು ಅಖ್ಲೊಯೇಕ್

ಚಂದರ್‌ಮೊ ಲ್ಹೋಯಿನಿತರ ಲಾಲ್ ಹುಯಿಗೊ.

13 ಅಂಜೀರ್‌ನ ಝಾಡಾನ ತುಘಾನ್ನೊ ವ್ಹಾಯಿರಾನು ಮಾರ್ ಪಡೆನ್ ಇನು ಪಕಾವಕೊಂತೆ ಪಂಡುಖ್ಹಾರು ಝಟ್‌ಕಾವನಿ ಘೋಣಿ ಆಬ್‌ಥು ಶುಕ್ಕರ್‌ಖ್ಹಾರು ಜಮೀನ್‌ಪರ್ ಝಟ್‌ಕೈನ್ ಪಡ್ಕು.

14 ಆಕಾಶ್ ಪುಂಗ್‌ಳಿನಿತರ ಲಪ್‌ಟೈನ್ ಡೋಳೇಫಿ ಲಪಿಗಯು. ಹರೇಕ್ ಪಹಾಡ್ ಅಜು ಟಾಪುಖ್ಹಾರು, ಇನಿ ಇನಿ ಝಗೋಥು ಖ್ಹರ್ಕಿಗಯು.

15 ತದೆ ಜಮೀನ್ನು ರಾಜವ್‌ಖ್ಹಾರು, ಅಖ್ಬೊಸ್ ಅದಿಕಾರಿ, ಡಂಡೆನೊ ಘಲ್ಲೊಖ್ಹಾರು, ಶೌಕಾರ್‌ಖ್ಹಾರು, ಘಣು ಶಕತ್‌ವಾಳುಖ್ಹಾರು, ಬಿಜುಖ್ಹಾರು ಅದ್ಮಿಗುಲಾಮ್‌ಖ್ಹಾರು, ಛುಟ್ಕಾರ್‌ನು ಅದ್ಮಿಖ್ಹಾರು ಪಹಾಡ್ನಿ ಘವಿಮಾಬಿ, ಬಂಡಾನಿ ಚಿಪಾಟ್ನಿಖೀಂಡಿಮ ಲಪಿಗಯು.

16 ಇವ್ಣೆ ಅಮ್ ಬೋಲ್ಕುಕಿ, ಪಹಾಡ್ನಾಬಿ ಬಂಡಾನಿ ಚಿಪಾಟ್‌ಬಿ ಹಮಾರಪರ್ ಲಡ್ಕಿಜಾವೊ, ಸಿಂಹಾಸನ್ನ ಉಪ್ಪರ್ ಬೆರೊರ್ದವಾಳಾನ ಮೇಂಠಾನಚೆಲ್ನ ಖೀಘ್‌ಮಾಥು ಹಮುನ ಛುಕಾವ್!

17 ಶನಕತೊ ಇನೊ ಭಯಂಕರ್ ಇರಾದೊ ಐಗು. ಇನಖ್ಹಾವ್ಣೆ ಭಿರಾವನ ಕಿನ ಹಾತ್ ಉಷೆ? ಕರಿ ಬೋಲ್ಕು.

7

ಇಸ್ರಾಯೇಲ್‌ನು ಏಕ್‌ಲಾಕ್ ಚಾರ್‌ಉಪ್ಪರ್ ಚಾಳಿಖ್ವ್ ಹಜಾರ್ ಅದ್ಮಿ

1 ಆ ಹುಯಿಜಾವದಿನ್ ಚಾರ್‌ಜಣ ದೇವ್ನು ದೂತರ್ ಜಮೀನ್ನು ಚಾರ್ ರುಕ್‌ಮ ಭೀರಿನ್ ಜಮೀನ್‌ಪರ್‌ರ್ದವೊ, ದರ್ರ್ಯಾವ್‌ಪರ್‌ರ್ದವೊ, ನತರ್ ಖೆವ ಝಾಡಪರ್‌ರ್ದವೊ ವ್ಹಾಯಿರೊ ನಾವಾಗ್ಣುತೆ ತಿಮ್ ಜಮೀನ್ನು ಚಾರ್‌ದಿಕ್ವು ವ್ಹಾಯಿರಾನ ಭೀರಾಖಿರಾಖನು ದೇಖ್ಲೊ.

2 ಅತ್ರೇಸ್ ಕಾಹೆತೆ ಬಿಜೇಕ್ ದೇವ್‌ದೂತನೆ ಜಿವ್ಣೊ ಜಾನ್ನೊ ಯೋ ದೇವ್ ಮುದ್ರಾನ ಧರಿಲೀನ್ ದನ್‌ನಿಕ್‌ಳಾ ಭಣೀಥು ಆವಾನು ದೇಖ್ಲೊ. ಅನೆ ಯೋ ಜಮೀನ್ನಾಬಿ ದರ್ರ್ಯಾವ್‌ನಾಬಿ ಖಿರಾಬ್ ಕರಾನಿ ಹುಕುಮ್

ಲೀರಾಖ್ಯಾತೆ ಯೋ ಚಾರ್‌ಜಣ ದೂತರ್‌ ಬುಲಾವೊ ಹುಯಿನ್ ಅಮ್ ಬೋಲ್ಯೊಕಿ;

3 “ಹಮೆ ಹಮಾರ ದೇವ್ ದಾಸರ್‌ ತಾಳ್ವಪರ್‌ ಮುದ್ರೊ ಮಾರ್‌ವಲಗೂಬಿ ಜಮೀನ್ನರ್‌ವೊ, ದರ್‌ವ್ಯಾರ್‌ವೊ, ಝಾಡಾವ್‌ವರ್‌ವೊ, ನಾಶ್‌ ನಾಕರ್‌ ಕರಿಬೋಲ್ಯೊ.

4 ಮುದ್ರೊ ಮರೈಲಿದುತೆ ಇವ್ಣಿ ಗಣ್ಣಿ ಮನ ಖಮಜ್‌ಮ ಆಯುಕಿ ಏಕ್‌ಲಾಕ್‌ ಚಾರ್‌ಲುಪ್ಪರ್‌ ಚಾಳೀಖ್‌ಹಜಾರ್‌ ಇಸ್ರಾಯೇಲರ್‌ ಹರೇಕ್‌ ಖೂಮ್ಮ ಮಳಿಹುಯು ಹುಯಿರ್‌ವ್ವು.

5 ಯೂದನಿ ಖೂಮ್ಮ ಮುದ್ರೊ ಮರೈರ್‌ವಾಳು ಭಾರಹಜಾರ್‌, ರೂಬೆನ್ನಾ ಖೂಮ್‌ವಾಳಮ ಭಾರಹಜಾರ್‌, ಗಾದ್‌ ಖೂಮ್‌ವಾಳಮ ಭಾರಹಜಾರ್‌,

6 ಅಸೇರನ ಖೂಮ್‌ಧು ಭಾರಹಜಾರ್‌, ನಫ್ತಾಲಿನ ಖೂಮ್‌ಧು ಭಾರಹಜಾರ್‌, ಮನಸ್ಸೆನ ಖೂಮ್‌ಧು ಭಾರಹಜಾರ್‌,

7 ಸಿಮೆಯೋನ್ನ ಖೂಮ್‌ಧು ಭಾರಹಜಾರ್‌,ಲೇವಿನ ಖೂಮ್‌ಧು ಭಾರಹಜಾರ್‌, ಇಸ್ಸಾಕಾರ್‌ ಖೂಮ್‌ಧು ಭಾರಹಜಾರ್‌,

8 ಜೆಬುಲೋನ್ನ ಖೂಮ್‌ಧು ಭಾರಹಜಾರ್‌, ಯೋಸೇಫ್‌ನ ಖೂಮ್‌ಧು ಭಾರಹಜಾರ್‌, ಬೆನ್ಯಾಮೀನ್ನ ಖೂಮ್‌ಧು ಮುದ್ರೊ ಮರಾಯುಹುಯು ಭಾರಹಜಾರ್‌ ಜಣುಧು.

ಹರೇಕ್‌ ಜಗ್‌ಜಾತ್‌ನು ಅದ್ವಿನು ಮೋಟಿ ಭೀಡ್‌

9 ಆ ಹುವಾನ ವಾರ್‌, ಹಂದೇಕ್‌ ಕಿನೇಥೀಬಿ ಗಣಿಕರಾನ ಕೊಹುವಾನಿತೆ ಎತ್ರೆ ಅದ್ವಿಯೇವ್‌ನು ಭೀಡ್‌ ಸಿಂಹಾಸನ್ನ ಖ್ವಾಪ್ಪೆ ಅಜು ಮೇಂಡಾನ ಖ್ವಾಪ್ಪೆಬಿ ಬಿಯುರ್‌ವಾನು ದೇಖ್ಯೊ ಇವ್ಣೆಖ್ವಾರು ಹರೇಕ್‌ ಜಗ್‌ಜಾತ್‌ನುಬಿ, ಖೂಮ್‌, ಬೋಲಿ ಬೋಲಾವಳು ಹುಯಿರ್‌ವ್ವು. ಇವ್ಣೆ ಧೋಳ ಝಗ್ಗೊ ಫೇರಿಲಿನ್ ಇವ್ಣ ಹಾತ್ಮ ಖಜೂರಸ್ತೆ ಡಾಳಿ ಧರಿಸ್ತೊ.

10 “ಇವ್ವೆ ರಕ್ಷಣೆ ಕರಿ ಬೋಲಾನು ಸಿಂಹಾಸನ್ ಪರ್ ಬೆರೊರ್ದಾವಳೊ ಅಪ್ಪೊ ಪ್ರಭುನ ಅಜ್ಜು ಮೇಂಡಾನುಚೆಲ್ಕು ಹುಯಿರ್ದವಾಳನ ಮಳೆಹುಯು ಕರಿ ಊಚಿ ಅವಾಜ್ ಥಿ ಚಿಕ್ ರ್ಲ್ಯ.

11 ಇವ್ವೆಖ್ವಾರು ಸಿಂಹಾಸನ್ನ ಅಶ್ ಪಿಶ್ ಭಿಯೊಡ್ಲ. ಶಾಣುಖ್ವಾರು ಅಜ್ಜು ಚಾರ್ ಜೀವಿಬಿ ಹಿಜ್ವಾಡ್ಲ. ದೇವ್ನ ದೂತರ್ ಸಿಂಹಾಸನ್ನ ಖ್ವಾಪ್ಪೆ ಘಡ್ ಗ್ಯಾಟೀಕಿನ್ ಆರಾದನೆ ಕರ್ತುಹುಯಿನ್,

12 ಆಮೆನ್, ಧನ್ಯವಾದ್, ಮಹಿಮೆಬಿ, ಅಕ್ಕಲೆಬಿ, ಗೌರವ್, ಮರ್ಯಾದಿ, ಶಕತ್ ಅಜ್ಜು ತಾಖತ್ ಬಿ ಅಪ್ಪ ದೇವ್ ಜಗ್ಗಮಾನಮಾಬಿ ರ್ದವಾದೆ, ಆಮೆನ್ ಕರಿ ಬೋಲ್ಯ.

13 ತದೆ ಶಾಣಾವಾಮ ಏಕ್ ಜಣೊ, “ಧೋಳು ಝುಗ್ಗೊಖ್ವಾರು ಫೇರಿರಾಖ್ಯತೆ ಆದ್ತಿಖ್ವಾರು ಕೋಣ್! ಅವ್ವೆ ಕಿಜ್ವಾಡ್ಲ ಆಯುಕರಿ ಪುಲ್ಲಾಯು. ತದೆ ಗುರೂಜಿ ಇವ್ವೆ ಕೋಣ್ ಕರಿ ತುನಾಸ್ ಮಾಲುಮ್ ಕರಿ ಬೋಲ್ಯೊ.

14 ತದೆ ಏಕ್ ಪ್ರಭುನೆ, “ಆ ಅದ್ತಿಖ್ವಾರು ಘಣು ಮೋಟಿ ಖ್ವತಾಪ್ಪಿ ಲೀನ್ ಆಯುಹುಯು. ಇವ್ವೆ ಮೇಂಡಾನ ಚೆಲ್ಕಾನ ಲೋಯಿಥಿ, ಇವ್ವೆ ಝುಗ್ಗಾನ ಧೋಯಿನ್ ಕೋರು ಹುಯಿರುಸ್.

15 ಇನಖ್ವಾಜಿ ಇವ್ವೆ ಹಮ್ಮೆ ದೇವ್ ಸಿಂಹಾಸನ್ನ ಖ್ವಾಪ್ಪೆರ್ದೀನ್, ಇನ ಮಂದಿರ್ ಮ ರಾತ್ ದನ್ ಆರಾದನೆ ಕರುಕರಸ್, ಸಿಂಹಾಸನ್ ಪರ್ ಬೆರೊರ್ದವಾಳೋಸ್ ಇವ್ವುನ ಆಖ್ವಾರೊ ಹುಯಿರ್ದೊಸ್.

16 ಬಿಜ್ಜು ಕೆದೇಬಿ ಇವ್ವುನ ಭುಕ್ ರ್ದವೊ, ಲೋಖ್ ರ್ದವೊ ಕೋಲುಪೇನಿ,

17 ಶನಕತೊ ಸಿಂಹಾಸನ್ನ ಇಚ್ ಮ ಛಾತೆ ಬಲೀನ ಮೇಂಡಾನು ಚೆಲ್ಕು ಹುಯಿರ್ದವಾಳೊ ಇವ್ವುನ ಕುರುಬನಿತರ ರ್ದೀನ್ ಜಾನ್ನು ಪಾಣಿನು ಚಿಜ್ ಭಾರಕನ ಚಲೈಲಿಜಾಪೆ ಅಜ್ಜು ದೇವ್ ಇವ್ವ ಡೋಳಾನು ಆಂಝುಖ್ವಾರು ನೂಫಿನಾಕ್ಷೆ ಕರಿ ಬೋಲ್ಯ.

ಖ್ವಾತ್‌ನೊ ಮುದ್ರೊ

1 ಮೇಂಡಾನುಚೆಲ್ಲ್ಯ ಹುಯಿರ್ದಾವಳನೆ ಖ್ವಾತ್‌ನೊ ಮುದ್ರಾನ ಪೋಡಾನಿವಖ್ವಾತ್; ಖ್ವಾಮಾರ್ ಆಧ ಘಂಟಾಲಗು ಸೊರ್ಗಾಮ ಶೊಪೊಹುಯ್ಕು.

2 ತದೆ ದೇವ್ ಖ್ವಾಮ್ಚೆ ಭಿಯುತೆ ಖ್ವಾತ್ ದೇವ್‌ದೂತರ್‌ನ ಮೇ ದೇಖ್ಚೊ ಇವ್ಚುನ ಖ್ವಾತ್ ತುತ್ತೂರಿಯೆ ದೆವಾಯು.

3 ಇನಪಾರ್ ಬಿಜೇಕ್ ದೇವ್‌ನೊ ದೂತ ಆಯೊ ಯೋ ಖ್ವೊನ್ನಾನಿ ಖ್ವಾಲರ್ಯಾನಿ ಡಾಕ್ಟಿ ಧರಿಲೀನ್ ಚಾಚರ್‌ಕನ ಆಯಿನ್ ಭೇಯೊ ಸಿಂಹಾಸನ್ನ ಮುದ್ರಾನು ಖ್ವೊನ್ನಾನ ಚಾಚರ್‌ನ ಉಪ್ಪರ್ ಅದ್ಮಿಖ್ವಾರ್ ಪ್ರಾರ್ಥನೆಥಿ ಸಮರ್ಪಣ್ ಕರಾನಖ್ವಾಜೆ ಇನ ಘಣು ಡಪ್ಕಾರ್ ದೆವಾಯು.

4 ತದೆ ಖ್ವಾಲರ್ಯಾನು ಧುವೊ ದೇವ್‌ದೂತರ್‌ನ ಹಾತ್ಮಧು ನಿಕ್ಕಿನ್, ದೇವ್ ಅದ್ಮಿವ್‌ನು ಪ್ರಾರ್ಥನೆನಿ ಜೋಡ್ ಮಳಿನ್ ದೇವ್‌ಕನ ಉಡಿಗಯು.

5 ಆ ನಾಹುಯಿನ್ ಯೋ ದೇವ್‌ನೊ ದೂತ ಡಾಕ್ಟಿನ ಲೀನ್ ಚಾಚರ್‌ನಿ ಆಗ್‌ಥಿಯಿನ ಭರಿನ್ ಜಮೀನ್ ಉಪ್ಪರ್ ಫೇಕ್ಚೊ ತದೆ ಘಲಾರಿನ್ ಘಂಜಿನ್, ಮೋಟಿಅವಾಜ್, ವಿಭ್‌ಳಿ ಖಡ್‌ಕಿ, ಭೂಕಂಪ್ ಹುಯು.

ತುತ್ತೂರಿ ಖ್ವಾರು

6 ಖ್ವಾತ್ ತುತ್ತೂರಿಯೇವ್ ಧರಿರಾಖ್ಯತೆ ಖ್ವಾತ್‌ಚ್ಚೊ ದೇವ್‌ನೊ ದೂತರ್ ಪೂಕಾನ ತಯಾರ್‌ಹುಯು.

7 ಪಹಿಲೊ ದೇವ್ ದೂತಾನೆ ಇನು ತುತ್ತೂರಿನ ಪೂಕಾನಿವಖ್ವಾತ್ ಲೋಯಿ ಮಳಿಹುಯು ಗಾರಾನೊ ಪಾಣಿಬಿ, ಆಗ್‌ಬಿ, ಜಮೀನ್‌ಪರ್ ರಂಭಾಯು. ಜಮೀನ್ ತೀನ್‌ಮಾನು ಏಕ್‌ಭಾಗ್ ಬಳಿಗಯು. ಝಾಡವ್‌ಮ ತೀನ್‌ಮಾನು ಏಕ್‌ಭಾಗ್ ಬಳಿಗಯು. ಹರೈ ಘಾಖ್ವಾಅಖ್ಯ ಬಳಿಗಯು.

8 ಬೇನೊ ದೇವ್‌ದೂತನೆ ಇನು ತುತ್ತೂರಿನ ಪೂಕ್ಚೊ ತದೆ ಆಗ್‌ಥಿಲಾಗುಕರಾತೆ ಮೋಟೊ ಪಹಾಡ್‌ನಿತರನು ಏಕ್ ರಾಟ್ರು

ದರ್ರಾವ್‌ಮ ಫೇಕ್ಟಿಗಯು.ತದೆ ದರ್ರಾವ್‌ಮ ತೀನ್‌ಮಾನು ಏಕ್‌ಭಾಗ್ ಲ್ಲೋಯಿ ಹುಯಿಗು.

9 ದರ್ರಾವ್‌ಮಾನು ಜೀವಿಮ ತೀನ್‌ಮಾನು ಏಕ್‌ಭಾಗ್ ಮರಿಗಯು ಬಿಜು ಜಹಾಜ್‌ಮಾನು ತೀನ್‌ಮಾನು ಏಕ್‌ಭಾಗ್ ನಾಶ್‌ಹುಯಿಗಯು.

10 ತೀನ್ನೊ ದೇವ್ ದೂತನೆ ಇನಿ ತುತ್ತೂರಿನ ಪೂಕ್ಯೊ; ತದೆ ಥಿಟಂಬನಿತರ ಬಳುಕರಾನು ಏಕ್ ಮೋಟೊ ಶುಕ್ಕರ್ ಆಬ್‌ಪರ್ ಅಜು ನದ್ದಿನು ಅಜು ಪಾಣಿನು ರ್ಪುಲನು ತೀನ್‌ಮಾನು ಏಕ್‌ಭಾಗ್ ಪರ್ ಪಡ್ಕು.

11 ಆ ಶುಕ್ಕರ್‌ನು ನಾಮ್ ಝಾರೇಲಿ. ತದೆ ಪಾಣಿನು ತೀನ್‌ಮಾನು ಏಕ್‌ಭಾಗ್ ಝಾರ್‌ಹುಯಿಗು. ಬಿಜು ಯೊ ಪಾಣಿ ಪೀದೂತೆ ಕೈಏಕ್ ಜಣು ಮರಿಗಯು, ಶನಕತೊ ಯೊ ಝಾರ್ ಹುಯಿರುಡು.

12 ಚಾರ್‌ನ್ನೊ ದೇವ್‌ನೊ ದೂತನೆ ತುತ್ತೂರಿನ ಪೂಕ್ಯೊ, ತದೆ ಚಾಂದ್‌ನು ತೀನ್‌ಮ ಏಕ್‌ಭಾಗ್, ಇಮ್ಮಸ್ ಚಂದರ್‌ಮಾನು ಅಜು ಶುಕ್ಕರ್‌ಮಾನು ತೀನ್‌ಮಾನು ಏಕ್‌ಭಾಗ್‌ನ ಖರಾಬ್‌ಹುಯಿನ್ ಅಂಧಾರು ಹುಯಿಗು. ಇನಖ್ವಾಜೆ ದನ್ಮ ತೀನ್‌ಮಾನು ಏಕ್‌ಭಾಗ್ ಉಜಾಳುಕೊಂತೆ ಅಂಧಾರು ಹುಯಿನ್, ರಾತ್ನಿ ಫೋಣಿಸ್ ಹುಯಿಗು*.

13 ಇನಪಾರ್ ಮೆ ದೇಖ್ತೊತೊ ಏಕ್ ಗರದ್ ಆಸ್ತಾನ್ನ ಇಚ್‌ಮ ಉಡ್ತುಫಂಡ್‌ತೂಡು. ಯೊ ಅವಾಜ್ ಮನ ಖ್ವಮಜ್‌ಪಡ್ಕು ಅಜೂಬಿ ಧೂತೆ ತೀನ್‌ಜಣು ದೇವ್‌ದೂತರ್ ತುತ್ತೂರಿನ ಪೂಕಾಖ್ತರ್ ಜಮೀನ್‌ಪರ್ ಜಿವ್ವುಕರವಾಳ ಅಖ್ವಾನ ಖರಾಬ್, ಖರಾಬ್, ಖರಾಬ್‌ಕರಿ ಊಚಿ ಅವಾಜ್‌ಥಿ ಚಿಕ್ರಾನು ಖ್ವಮ್‌ಜ್ಯೊ.

9

1 ಪಾಚ್ಚೊ ದೇವ್ ದೂತನೆ ತುತ್ತೂರಿನ ಪೂಕಾನಿವಖ್ತೆ; ಆಬ್‌ಥು ಜಮೀನ್‌ಪರ್ ಪಡ್ಕೂತೆ ಏಕ್ ಶುಕ್ಕರ್ ದೇಖ್ತೊ ಇನ *ಪಾತಾಳ್ನು ಬಾವ್ತಿನು ಬೀಗಾನು ಕೀಲಿ ದೆವಾಯು.

* 8:12 8:12 ಚಾಂದ್‌ಮನು ತೀನ್‌ಮ ಏಕ್‌ಭಾಗ್ * 9:1 9:1 ಖರಾಬ್ ಆತ್ಮವನ್ ಖ್ವರ್ತಿನ ತೀರ್ಪ್‌ನ ದನ್‌ಲಗು ರಾಖನ ಭಾಂದಿಹುಯಿ ಝಗೊ

2 ಇನೆ ನರಕ್‌ನಿ ಬಾವ್ವಿನ ಕಾಡಾದಿನ್ ಬಾವ್ವಿಮಾಧು ಆಯುತೆ ಧುವೊ ಮೋಟಿ ಕೋಲ್‌ಮಿನು ಧುವಾನಿತರ ಉಪ್ಪರ್ ಆಯು. ಬಾವ್ವಿನ ಧುವ್ವಾಧಿ ಘಾಂದ್‌ಬಿ, ಆಸ್‌ಮಾನ್‌ಬಿ, ಕಾಳುರೈಟ್ ಹುಯಿಗು.

3 ಧುವ್ವಾಮಾಧು ಚಿಡ್ಡೊಖ್ವಾರು ಜಮೀನ್‌ಪರ್ ನಿಕ್ಕಿಆಯು. ಜಮೀನ್‌ಪರ್ ಛಾತೆ ವಿಲ್ಪಿಯೇನಿ ಪರಕ್ ಇನ ತಾಖತ್ ದೆವಾಯು.

4 ಜಮೀನ್‌ಪರ್ ಛಾತೆ ಫಾಖ್‌ನ್ ರ್ವೊ ಪಂಡು ಫಲ್ವ ರ್ವೊ, ರ್ವೂಡನ ರ್ವೊ, ನಾಶ್‌ನಾಕರ್‌ನ್‌ತೆ, ತಾಳ್ವಪರ್ ದೇವ್‌ನೊ ಮುದ್ರೊಕೊಂತೆ ಅದ್ಮಿವ್‌ನಖಲಿ ನಾಶ್‌ಕರ್‌ನ್‌ಕರಿ ಯೊ ಚಿಡ್ಡಾವ್ವ ಹುಕುಮ್‌ಹುಯು.

5 ಇವ್ವುನ ನಾ ಮಾರ್‌ನ್‌ತೆ ಪಾಚ್ ಮಹಿನ ಲಗೂಬಿ ಖ್ವತಾವ್ವುಕರಿ ಅದಿಕಾರ್ ಮಳ್ಳು ಯೊ ಅದ್ಮಿಖ್ವಾರನ ಹುಯೊತೆ ಅಜ್ಜ ವಿಲ್ಪಿ ಅದ್ಮಿನ ಕಲ್ಪಾನಿತರಾಸ್ ಧು.

6 ಯೊ ಪಾಚ್ ಮಹಿನಾಮ ಅದ್ಮಿಖ್ವಾರು ಮರ್‌ವಾನ ಹರಖ್ವೆಷೆ ಕತೋಬಿ ಯೊ ಪೂರ ಕೊಲುಷೇನಿ. ಅದ್ಮಿಮರಾನಿ ವಾಟ್ ಡೂಂಡ್‌ಷೆ, ಕತೋಬಿ ಮರಣ್ ಇವ್ವೇಧಿ ಲಪಿಜಾಷೆ.

7 ಯೊ ಚಿಡ್ಡಾವ್ವು ರೂಪ್ ಜಂಗ್‌ನ ತಯಾರ್ ಕರಾಖನು ಘೋಡಾವ್‌ನು ರೂಪ್‌ನಿತರ ಧು. ಇವ್ವ ಮುಡ್‌ಕ್ಯಾವ್‌ಪರ್ ಖೊನ್ನಾನಿ ಕಿರೀಟ್‌ನಿತರಾಬಿ, ಇನು ಮ್ಹೋಡುಖ್ವಾರು ಅದ್ಮಿವ್‌ನ ಮ್ಹೋಡಾನಿತರಾಬಿ ಧು.

8 ಇನು ಕೇಖ್ವೆ ತಯೇಡಾನ ಕೇಖ್ವೆನಿತರಾಬಿ ದಾತ್ ಶುಂಭಾನ ದಾತ್‌ನಿತರಾಬಿ ಧು.

9 ಯೊ ಅಖ್ವಾನಿ ಶರೀರ್‌ನ ಖ್ವಾರ್ನು ಕವಚ್‌ಧು. ಇವ್ವು ಫಾಕ್ಡಿಯೇನು ಅವಾಜ್ ಜಂಗ್‌ನ ನಾಖ್ವಾತೆ ರಥ್‌ನ ಘೋಡಾನ ಅವಾಜ್‌ನಿತರ ಧು.

10 ವಿಲ್ಪಿಯೇನ ರ್ವೊಸ್ತೆತಿಮ್ ಇವ್ವುನ ಡೊಂಡೋಬಿ, ಕಾಟೋಬಿ ಧು. ಅದ್ಮಿವ್‌ನ ಪಾಚ್ ಮಹಿನಲಗೂಬಿ ಖರಾಬ್ ತಾಖತ್ ಇವ್ವ ಡೋಂಡವ್‌ಮಸ್ ರ್ವೊಶೆ.

11 ಪಾತಾಳ್‌ನೊ ಮುಖ್ಯ ಹುಯಿರ್ದೊತೆ ದೂತಾಸ್ ಯೊ ಚಿಡ್ಡಾವ್ವ ರಾಜ್ ಹುಯಿರೋಥೊ. ಇನ ಹಿಬ್ರು ವಾತೇಮ ಅಬದ್ದೋನ್ ಕರೀಬಿ,

ಗ್ರೀಕ್ ಬೋಲಿಮ ಅಪೊಲ್ಲುವೋನ ಕರೀಬಿ ನಾಮ್‌ಧು.

12 ಪಹಿಲು ಖತ್ರ ಖತಮ್‌ಹುಯಿಗು. ದೇಕ್ ಬಿಜ್ಜೂ ಬೇನು ವದೇಖ್‌ಖ್ವಾರು ಇನ ಪೀರೇಸ್ ಆಯು.

13 ಛೋನೆ ದೇವ್‌ನೊ ದೂತನೆ ತುತ್ತುರಿನ ವಜಾಡನಿ ವಖ್ವೆತೆ ದೇವ್‌ಕನ ಥೂತೆ ಖ್ವೊನ್ನಾನು ಚಾಚರ್‌ನ ಶಿಂಗ್ಡಾವ್‌ಧು ನಿಕ್‌ಳ್ವೊತೆ ಏಕ್ ಅವಾಜ್‌ನ ಖ್ವಮ್‌ಜೊ.

14 ಛೋನೆ ದೇವದೂತ ಯೊ ತುತ್ತುರಿನ ಧರಿರಾಖ್ವುಥೂತೆ ದೇವ್ವ ದೂತಾನ, “ಯೂಫ್ರಟಿಸ್ ಕರಿ ಮೋಟಿ ನದ್ದಿಕನ ಭಾಂದಿರಾಖ್ವೊತೆ ಚಾರ್‌ಜಣ ದೇವ್ವ ದೂತರ್ ಛೋಡಿನಾಕ್” ಕರಿ ಬೋಲ್ಯು.

15 ತದೆ ಅದಮ್‌ಜಮಾನಮ ತೀನ್‌ಮಾನು ಏಕ್‌ಭಾಗ್ ಅದ್ವಿನ ಸಂಹಾರ್ ಕರಾನಖ್ವಾಜೆ ಯೋಸ್ ವರಖ್ವೆ ಯೋಸ್ ಮಹಿನೊ, ಯೋಸ್ ದನ್, ಯೋ ವಖ್ವತ್‌ನಖ್ವಾಜೆ ತಯಾರ್‌ಥಾತೆ ಯೊ ಚಾರ್‌ಜಣ ದೇವ್ವ ದೂತರ್ ಛೋಟ್ಯಾರ್ ಕರಾಯು.

16 ಇನು ಘೋಡಾನು ಶಿಪಾಯ್ತಿ ಗಣ್ತಿ ವೀಖ್ವೆ ಕರೋಡ್‌ಕರಿ ಮನ ಖ್ವಮಜ್‌ಪಡ್ಕು.

17 ಮೇ ದರ್ಶನ್‌ಮ ದೇಖ್ವೊತೆ ಘೋಡಾವ್‌ಬಿ ಅಜು ಇನಪರ್‌ಲ್ಯ ಸವಾರಿನ ಬಾರೇಮ ಬೋಲಾನು ಕಿಮ್‌ಧು ಕತೊ, ಸವಾರಿವ್‌ನು ಕವಚ್‌ನು ರಂಗ್ ಆಗ್‌ನಿತರ ಲಾಲ್, ಧುವ್ವನಿತರಾನು ನೀಲು, ರಂಜಕ್‌ನಿತರ ಪೀಳು ಥು. ಘೋಡಾವ್‌ನು ಮುಡ್‌ಕ್ಯು ಖ್ವಾರು ಶುಂಭಾವ್‌ನ ಮುಡ್‌ಕ್ಯಾನಿ ಘೋಣಿ ಥು. ಅಜು ಇನ ಮ್ಹೋಡೇಮ್ಮಿ ಆಗ್ ರಂಜಕ್ ಧುವ್ವೊ ನಿಕ್‌ಳ್ವು.

18 ಯೋ ಅಖ್ವಾನ ಮ್ಹೊಡಾಮಾಧು ನಿಕ್‌ಳ್ವೊತೆ ಯೊ ಆಗ್, ಧುವ್ವೊ, ರಂಜಕ್, ಕರಿ ಬೋಲಾನು ತೀನ್ ಖ್ವತಾಪ್ಪಿಣಿ ಜಮೀನ್‌ಪರ್‌ನು ಅದ್ವಿನು ತೀನ್‌ಮಾನು ಏಕ್‌ಭಾಗ್ ಮರ್ಯೆಗಯು.

19 ಯೊ ಅಖ್ವಾ ಘೋಡಾನಿ ತಾಖತ್ ಯೋಅಖ್ವಾನ ಮ್ಹೊಡಾಮಾಬಿ, ಡೋಂಡಾಮಾಬಿ ಥು. ಇನು ಡೋಂಡೋಅಖ್ವು ಮುಡ್‌ಕ್ಯು ರ್ವವಾಳು ಹುಯಿನ್ ಖ್ವಾಪ್‌ನಿತರ ಥು. ಇನೇಥಿಸ್ ಖರಾಬ್ ಉಷೆ.

20 ಆ ಖ್ವತಾಪ್ಪಿಥಿ ಮರೈಕೊಂತೆ ಬಚಿರೈವಳು ಅದ್ಮಿಖ್ವಾರು ಇವ್ವೇಸ್ ಕರಿಲಿದುಧೂತೆ ಮೂರತ್ಅಖ್ವಾನ ಮ್ವೇಲಿನ್ ದೇವ್‌ಭಣಿ ಫರೈಕೊಯ್ನಿ. ಇವ್ವೆ ಭೂತ್ ಪಿಶಾಚಿಖ್ವಾರಾನು ಆರಾದನೆನಾಬಿ ಬಿಜು ಮ್ವೊನ್ನು, ರೂಪು, ತಾಂಬು, ಬಂಡೊ, ಝಾಡ್ ಆಸ್ ಅಖ್ವಾಥಿ ಬಣಾವಟ್ ಹುಯಿನ್ ದೇವ್‌ಕೊಂತೆ, ಖ್ವಮ್‌ಭಾಕೊಂತೆ, ಚಾಲಕೊಂತೆ ರೈವಾನ ಮೂರತ್‌ನ ಪೂಞಾನ ಕೊಮ್ಮೆಲ್ಲೊನಿ.

21 ಆನಾಹುಯಿನ್ ಇವ್ವೆ ಚಲಾವ್ತುಧೂತೆ ರೈಖ್ವಾನು, ಜಾದುಜಮ್‌ಕರ್, ಪಾಪೇಲು ಕಾಮ್, ವೈಬಿಚಾರ್‌ನ, ಚೋರ್‌ಚ್‌ಖಾಟ್ ಆ ಅಖ್ವಮಾಥು ಏಕ್‌ಬಿ ಮ್ವೇಲಿನ್ ದೇವ್‌ಭಣಿ ಫರೈಕೊಯ್ನಿ.

10

ತಾಖತ್ನೊ ದೇವ್ವೊದೂತ ಅಜ್ಜು ಪುಂಗಳಿ

1 ಅನಪಾರ್ ತಾಖತ್‌ವಾಳೊ ಹುಯಿರೋತೆ ಬಿಜೇಕ್ ದೇವ್‌ನೊ ದೂತ ಸೊರ್ಗಾಥು ಉತ್ತಿನ್ ಆವಾನು ಮೇ ದೇಖ್ವೊ ಇನೆ ವಾದ್‌ಳಾನ ಫೇರಿರಾಖ್ವೊಥೊ. ಇನ ಮುಡ್‌ಕ್ಯಾನ ಉಪ್ಪರ್ ವಾದ್‌ಳಾನಿಧೂಣ್ ಥು. ಇನು ಮ್ವೊಡು ಚಾಂದ್‌ನಿತರ ಇನ ಗೋಡ ಆಗ್ನ ಖಮ್‌ನಿತರ ಥಾ.

2 ಅಜ್ಜು ಇನ ಹಾತ್ಮ ಉಧ್‌ಥಿಹುಯಿ ಏಕ್ ಪುಂಗಳಿಥಿ. ಇನೆ ಖಾವಗೋಡಾನ ದರೈವ್ವ ಉಪ್ಪರ್‌ಬಿ ಡಾವಗೋಡಾನ ಜಮೀನ್‌ಪರ್‌ಬಿ ಮ್ವೇಲಿನ್,

3 ಶುಂಭಾ ಘಲಾರಸ್ತೆ ತಿಮ್ ಮೋಟಿ ಆವಾಜ್‌ಥಿ ಚಿಕ್‌ರೈಚಿ, ಚಿಕ್ರಾನಿ ವಖ್ವೆತೆ ಖ್ವಾತ್ ಘಲಾರ್‌ಬಿ ಏಕ್‌ಏಕ್‌ಥರ ಅವಾಜ್ ದಿದು.

4 ಯೋ ಘಲಾರ್‌ಖ್ವಾರು ಬೋಲಾನು ಮೆ ಲೀಖ್ವುಕರಿ ಥೊ. ಕತೋಬಿ, “ಯೋ ಖ್ವಾತ್ ಘಲಾರ್‌ಖ್ವಾರು ಬೋಲ್ವುತೆಯಿನ ತೂ ನಾಲೀಖ್ವುತೆ ಗಪ್ಪತ್ ರಾಕ್‌ಕರಿ ಬೋಲಾನು ಸೊರ್ಗಾನ ಟಿಥುಕಾನ ಖ್ವಮ್‌ಜೊ”.

5 ಇನಪಾರ್ ಜಮೀನ್‌ಪರ್‌ಬಿ, ದರ್ಯಾವ್‌ನ ಉಪ್ಪರ್‌ಬಿ ಭಿಯಹುಯನಿತರ ಮನ ದೆಖಾಯೊತೆ ದೇವ್‌ದೂತನೆ ಇನೊ ಖಾವಹಾತ್ತ್ ಸೊರ್ಗಭಣಿ ಪಾಡಿನ್,

6 ಸೊರ್ಗನಾಬಿ ಇನಾಮಲ್ಲಾತೆ ಖ್ವಾರಸ್ಸು ಜಮೀನ್ನಾಬಿ ಇನಾಮಲ್ಲಾತೆ ಖ್ವಾರಸ್ಸು ದರ್ಯಾವ್‌ನಬಿ ಇನಾಮಲ್ಲಾತೆ ಖ್ವಾರಸ್ಸು ಉಬ್‌ಜೈನ್ ಜಗ್‌ಜಮಾನಲಗು ಜಿವೊರ್ವವಳಾನ ಉಪ್ಪರ್ ಆಣ್ ಕರೀನ್ “ಬಿಜೂಬಿ ಟಿವವಾನಿ ಜರೂರತ್ ಕೊಯ್ಲಿ.

7 ಖ್ವಾತ್‌ನೊ ದೇವ್‌ದೂತನೆ ಇನಿ ತುತ್ತೂರಿನ ವಜಾಡನ ತಯಾರ್‌ಹುವಾನ ದನೂಮ ದೇವ್‌ಗಪ್ಪಣ್ಣಿಲ್ಲಾತೆ ಖ್ವೂಜ್‌ನ ಚಲಾವ್‌ಷೆ. ದೇವ್ ಇನು ದಾಸ ಹುಯಿರ್ದೆತೆ ಪ್ರವಾದಿ ಖ್ವಾರನ ಸುವಾರ್ತೆ ಖ್ವಮ್‌ಜಾಡಿರಾಖೊಡೊತೆ ಪರಕ್‌ಚಲೈಶ್” ಕರಿ ಬೋಲ್ಯೊ.

8 ತದೆ ಪರಲೋಕ್‌ಥು ಫಾಲ್ತು ಯೋಸ್ ಅವಾಜ್ ಮೆ ಖ್ವಮ್‌ಜೊಯೋ ಗಳು ಮನ, “ತೂ ಜಾ ದರ್ಯಾವ್‌ನಪರ್‌ಬಿ ಜಮೀನ್‌ಪರ್‌ಬಿ ಭಿಯೋತೆ ದೇವ್‌ದೂತರ್‌ನ ಹಾತ್ಮನಿ ಉಧ್‌ಧಿರ್ದೆತೆ ಪುಂಗ್‌ಳಿನ ಲೀಲೆ” ಕರಿ ಬೋಲ್ಯೊ.

9 ಮೆ ಯೊ ದೂತಕನ ಜೈನ್, ನ್ವಾನಿ ಪುಂಗ್‌ಳಿನ ದೇ ಕರಿ ಬೋಲಾಖ್ವತರ್ ಇನೆ ಮನ, ತೂ ಪುಂಗ್‌ಳಿನ ಲೀನ್ ಖೈಲೆ, ಯೊ ತಾರ ಪೇಟ್‌ಮ ಕಡೂ ಉಷೆ, ಕತೋಬಿ ತಾರ ಮ್ಹೋಡಾಮ ಯೋ ಶೇತ್‌ನಿತರ ಮಿರು ಹುಯಿರ್ದೆಶೆ” ಕರಿ ಬೋಲ್ಯೊ.

10 ತದೆ ಮೆ ಯೊ ನ್ವಾನಿ ಪುಂಗ್‌ಳಿನ ದೂತನ ಹಾತ್ಮಥು ಲೀನ್ ಖೈಲಿದೊ. ಯೊ ಮಾರ ಮ್ಹೋಡಾಮ ಶೇತ್‌ನಿತರ ಮಿರುಥು, ಇನ ಖೈಲಾವದಿನ್ ಮಾರು ಪೇಟ್ ಕಡುಹುಯ್ಕು.

11 ಇನಪಾರ್ ಯೊ ದೂತನೆ ಮನ, “ತೂ ಬಿಜೂಬಿ ಕೈಯೆಕ್ ಅದ್ವಿವೋನ, ಬೋಲಿನ ಅಜು ಖಾನ್‌ದಾನ್ ರಾಜಾಪ್‌ನಿ ಬಾರೇಮ ಪ್ರವಾದ್‌ನೆ ಬೋಲೆನು” ಕರಿ ಹುಕುಮ್ ಕರೊಯ್ಲೊ.

ಬೇ ಸಾಕ್ಷಿ

1 ಇನಪಾರ್ ಆಳ್ತ ಕರಾನಿಫೋಣಿನೊ ಏಕ್ ಲಠಾನ ದೀನ್ ಅಮ್ ಖ್ತಮ್‌ಜಾಡ್ಕು, “ತೂ ಉರೀನ್ ದೇವ್ ಮಂದಿರ್‌ನಾಬಿ ಚಾಚ್‌ರನ್ ಆಳ್ತ ಕರ್ ಅಜು ಹಿಜ್ಜಾ ಆರಾದನೆ ಕರಾವಾಳಾನಾಬಿ ಗಣ್ತಿಕರ್.

2 ಕತೋಬಿ ಮಂದಿರ್‌ನ ಭಾರ್‌ಲಾತೆ ಝಗೋನ ಆಳ್ತ ನಾಕರ್ದುತೆ ಮ್ಹೇಲಿದೆ, ಯೊ ಪರೈ ಅದ್ವಿನಖ್ವಾಜೆ ದೆವೈರ್ದುಸ್. ಇವ್ಣೆ ಪರಿಶುದ್ ಖ್ತಯೇರ್ದು ಬೇಲುಪ್ಪರ್ ಚಾಳಿಖ್ವಾ ಮಹಿನಲಗು ಮುಂದಲ್ತುಫಂಡ್‌ಷೆ.

3 ಅತ್ರೇಸ್ ಕಾಹೆತೆ ಮಾರ ಬೇ ಸಾಕ್ಷಿವಾಳ ಟೈನಕೋಥಳಾನ ಹೋಡಿಲಿನ್ ಏಕ್ ಹಜಾರ್ ಬೇಖ್ತೊ ತೀನಿಖ್ವಾ ದನ್‌ಲಗು ಪ್ರವಾದನೆ ಕರಾನಿತರ ಇವ್ಣುನ ಅದಿಕಾರ್ ದಿಶ್.

4 ಧರ್ತಿನ ಪ್ರಭುನ ಖ್ವಾಮ್ಣೆ ಭಿಯುತೆ ಬೇ ತೇಲ್ವುಡಾಡಾವಾಬಿ ಅಜು ಬೇ ದಿವಳ್ಳಿಬಿ ಅವ್ಣೇಸ್.

5 ಅವ್ಣುನ ಕೋಣ್‌ತೋಬಿ ಖರಾಬ್ ಕರ್ನುಕರಿ ಉಷೇತೊ ಇವ್ಣ ಮ್ಹೋಡಾಮಾಥಿ ಆಗ್‌ನಿಕ್ಕಿನ್ ಇನ ವಹೇರ್ದಾನ ಬಾಳಿನಾಕ್‌ಷೆ. ಅವ್ಣುನ ಖರಾಬ್ ಕರ್ನುಕರಿ ಹರ್ಖಾವಳು ಅಮ್ಮಿಸ್ ಪರಕ್ ಮರ್ದು.

6 ಇವ್ಣೆ ಪ್ರವಾದನೆ ಕರಾನ ದನ್ತ ವರ್ಖಾತ್ ನಾಪಡ್ತುತೆ ಆಬ್‌ನ ಮೂಘಾನಿ ಅದಿಕಾರ್ ಇವ್ಣುನ ಥು. ಅಜು ಪಾಣಿನ ಲ್ಲೋಯಿ ಕರಾನಿತರಾಬಿ, ಖ್ವಾರಿ ಧರಾನು ಖ್ತಾಪ್ಪಿಥಿ ಜಮೀನ್ನ ಖ್ತಾವನ ಅದಿಕಾರ್‌ಲ್ಲಾ.

7 ಕತೋಬಿ ಆ ಬೇಜ್ಞಣ ಇವ್ಣಿ ಸಾಕ್ಷಿಯೆವ್‌ನ ಬೋಲಿ ಖತಮ್ ಕರಾದಿನ್, ಪಾತಾಳ್‌ಥೊ ಆವ್‌ಶೇತೆ ಜಾನ್ವರ್ ಅವ್ಣುನ ಜಂಗ್‌ಮ ಹರೈನ್ ಮಾರಿನಾಕ್‌ಶೆ.

8 ಆ ಸಾಕ್ಷಿನು ಬೇ ಮಖ್ವಾಣ್ಯ ಮಹಾ ನಂಗರ್ದುಗಲ್ಲೇಮ ಪಡ್ಕುರ್ದಿಶೆ. ಆ ಖ್ತಯೇರ್ದು ಖ್ತೇದ್‌ಹುಯಿನ್ ಸೊದೋಮ್ ಕರಿಬಿ, ಈಜಿಪ್ಟ್ ಕರಿಬಿ ನಾಮ್ ಲ್ಲಾ. ಇವ್ಣೆ ಪ್ರಭು ಜಿನುಕು ಹಿಜ್ಜಾಸ್ ಶಿಲ್‌ಬೇಪರ್ ಮಾರಾಯೊಥೊ.

9 ಅಮ್ಮಿಸ್ ಅದ್ವಿ ಖೂಮ್, ಬೋಲಿ, ಜಗ್‌ಜಾತ್‌ಮ ಮಳಿಹುಯು

ಆ ಭೇಜಣ ಸಾಕ್ಷಿನ ಮುದರ್ವ್ನ ಖ್ವಡ್ತೀನ್ ದನ್‌ಲಗೂಬಿ ದೇಕ್‌ಷೆ ಅಜ್ಜು ಇವ್ವ ಮುದರ್ವ್ನ ಮಖ್ವಾಣ್ಣು ಕರಾನ ಕೊ ಮ್ಹೇಲ್‌ಶೇನಿ.

10 ಆ ಭೇಜಣ ಪ್ರವಾದಿವ್ನೆ ಧರ್ತಿನ ಲೋಗ್ನ ಖ್ವತಾಪ್ಪಿ ಕರೈಧೂತೆಖ್ವಾಜೆ ಅವ್ಣೆ ಮರೈತೆ ದೇಖಿನ್ ಜಮೀನ್‌ಪರ್‌ನು ಅದ್ಮಿ ಖುಷಿಕರ್ಷೆ ಅಜ್ಜು ಹಾಶಿಖುಶಾಲಿ ಕರಿನ್ ಏಕ್‌ಥಿಏಕ್ ಇನಾಮ್ ಮೋಕಲ್‌ಶೆ.

11 ಕತೋಬಿ ಖ್ವಡ್ತೀನ್ ದನ್ವಪಾರ್ ದೇವ್‌ಥಿ ಜಾನ್ನೊ ವಹಿರೊ ಯೊ ಮುದರ್ವಮ ಪೇಶ್ಯತೊ, ಇವ್ಣೆ ಗೋಡಟೀಕಿ ಭೇರಿಜಾಶೆ. ಇವ್ವುನ ದೇಖ್ವುಹುಯು ಖ್ವಾರು ಡರ್‌ಥಿ ಕಾಪ್‌ಶೆ.

12 ಇನಪಾರ್ ಇವ್ವುನ, “ಹಜ್ಜಾ ಉಪ್ಪರ್ ಲ್ಲಡಿನ್ ಆವೊ” ಕರಿ ಆಬ್‌ಥು ಮೋಟೆ ಅವಾಜ್‌ನೆ ಬೋಲ್ಯು. ಇನ ಖ್ವಮ್‌ಜುತೆ ಇವ್ಣೆ ವಾದ್ಯಮಾಕರಿ ಸೊರ್ಗನ ಲ್ಲಡೀಗು. ಇವ್ಣೆ ಭಾವನು ಇವ್ವ ವಹೇರೈಖ್ವಾರು ದೇಖುಸ್‌ಕರ್ತಧು.

13 ಯೋಸ್ ವೇಳ್ತಮೋಟು ಭೂಕಂಪ್ ಹುಯಿನ್ ಯೊ ಖ್ವಯೇರೈ ದಖ್ವೊಮ ಏಕ್‌ಭಾಗ್ ನಾಶ್‌ಹುಯಿಗು. ಆ ಭೂಕಂಪ್‌ಥಿ ಖ್ವಾತ್‌ಹಜಾರ್ ಜಣು ಮರಿಗು. ಇನಾಮ ಬಚ್ಕೊತೆ ಅದ್ಮಿಖ್ವಾರು ಘಣು ಡರಿನ್ ಸೊರ್ಗಾನ ದೇವ್ವ ಮಹಿಮೆ ಕರೈ.

14 ಬೇನು ಖತ್ರ ನಿಕ್ಕಿಗಯು.ಹಂದೇಕ್, ತೀನ್ನು ವದೇಖ್ ಒಗ್ಗಿನ್ ವಳ್ಳುಆವಸ್.

ಖ್ವಾತ್‌ನಿ ತುತ್ತೂರಿ

15 ಖ್ವಾತ್‌ನೊ ದೇವ್ವದೂತನೆ ಇನಿ ತುತ್ತೂರಿನ ವಜಾಡ್ಕೊ. ತದೆ ಪರ್‌ಲೋಕ್‌ಮ ಮೋಟು ಅವಾಜ್ ಹುಯಿನ್, “ಆ ಜಗತ್ ರಾಜ್ಯನಿ ಅದಿಕಾರ್ ಅಪ್ಪೊ ಪ್ರಭುನಾಬಿ ಇನ ಕ್ರಿಸ್ತನಾಬಿ ಐರೈಸ್.ಯೊ ಜಗ್‌ಜಮಾನಲಗೂಬಿ ಇನ ರಾಜ್‌ನ ಚಲಾವ್‌ಷೆ.” ಕರಿ ಬೋಲ್ಯು.

16 ಅನವಾರ್ ದೇವ್ವ ಜೋಡ್ತ ಇವ್ವ ಇವ್ವ ಸಿಂಹಾಸನ್‌ಪರ್ ಬೇರುಧೂತೆ ಚಾರ್‌ಲುಪ್ಪರ್‌ವೀಖ್ವೊ ಜಣು ಶಾಣು ಇನ ಆಡ್‌ಪಡೆನ್ ಆರಾದನೆ ಕರೈ ಅಜ್ಜು,

17 “ಪ್ರಭು, ಸರ್ವಶಕ್ತನೊ ದೇವ್, ರ್ವವಾಳೊ ತೂ ತಾರಿ ಮೋಟಿ ಅದಿಕಾರ್‌ನ ಲೀಲಿನ್ ಚಲಾಯೊತೆ ಇನಖ್ವಾಜೆ ತುನ ಧನ್ಯವಾದ್ ಕರ್ಯೆಸ್.

18 ಜಗತ್‌ನು ಅದ್ವಿಖ್ವಾರು ಇರಾದೊ ಕರ್ಯ್, ತಾರಿ ಖೀಜ್ ಪಕ್‌ಟ್‌ಹುಯಿ. ಮರ್ಯ್‌ಹುಯಾನ ತೀರ್ಪ್ ಮಳಾನಿ ವಖ್ವತ್‌ಆಯಿ. ತೂ ತಾರ ದಾಸ ಹುಯಿರ್ದೊತೆ ಪ್ರವಾದಿವ್‌ನಾಬಿ, ದೇವ್ ಅದ್ವಿನಾಬಿ, ತಾರ ನಾಮ್ ಡರಾವಾಳ ಶಾಣವ್‌ನಾಬಿ, ಅಡ್ವಾಣಿನಾಬಿ ಪ್ರತಿಫಲ್ ದೈವಾನಿ ವಖ್ವತ್ ಆ ಜಗತ್ ನಾಶ್‌ಕರಾವಳನ ವಿನಾಶ್‌ಕರಾನಿ ವಖ್ವತ್ ಐಗು”. ಕರಿ ಬೋಲಿನ್ ಇನ ಆರಾದನೆ ಕರ್ಯ್.

19 ತದೆ ಸೊರ್ಗಾಮ ಧೂತೆ ಮಂದಿರ್ ನಿಕ್‌ಳ್ಕು, ದೇವ್ ಮಂದಿರ್‌ಮ ಇನು ಒಪ್ಪಂದನೊ ಡಾಬೊದೊಯು. ಆಸ್‌ಕಾಹೆತೆ, ಘಲಾರನು, ಘೂಂಜಾನು, ವಿಭ್‌ಳಿ ಖಡ್ಗಿನ್ ಭೂಕಂಪ್‌ಹುಯು. ಅಜ್ಜು ಮೋಟಿ ಗಾರಾನೊ ವಖ್ವತ್ ಹುಯು.

12

ಅರ್ಘು ಅಜ್ಜು ತಯೇಡ

1 ಸೊರ್ಗಾಮ ಏಕ್ ಮೋಟು ಅದ್ಭುತ್ ದೊಯು. ತಯೇಡ ಏಕ್‌ಣಿ ಚಾಂದ್ ಫೇರಿರಾವಿಧಿ. ಹೈರಿತೆನ ಗೋಡಾನ ಚಂದರ್‌ಮೊ ಥೊ.ಇನ ಮುಡ್‌ಕ್ಯಪರ್ ಭಾರ ತಾರವ್ನಿ ಕಿರೀಟ್ ಥು.

2 ಯೊ ಬೇಜೂನಿ ಹುಯಿರ್ದೊನ್ ಯೋ ಜ್ಞಾತ್ ದರದ್‌ಥಿ ಖ್ವತೀನ್ ರೊವ್‌ಕರ್ತೀಧಿ.

3 ತದೆ ಆಕಾಶ್‌ಮ ಬಿಜೇಕ್ ಅದ್ಭುತ್ ದೊಯು; ಹಿಜ್ಜಾ ಏಕ್ ಅರ್ಘು ಥು. ಇನ ಖ್ವತ್ ಮುಡ್‌ಕ್ಯಾಬಿ ದಖ್ತೊ ಶಿಂಗ್ಡಾ ಥು. ಇನ ಮುಡ್‌ಕ್ಯಾವ್‌ಪರ್ ಖ್ವತ್ ಕಿರೀಟ್‌ಖ್ವಾರು ಥು.

4 ಇನ ಡೋಂಡೇಧಿ ಆಬ್‌ನ ತಾರವ್‌ಮಾನು ತೀನ್‌ಮಾನು ಏಕ್‌ಭಾಗ್‌ನ ಖೇಚಿನ್ ಜಮೀನ್‌ಪರ್ ಫೇಮ್ಕು, ಜ್ಞಾಕರಾತೆ ಯೊ ತಯೇಡ ಜ್ಞಾತಾಸ್ಸು ಇನ ಲಡ್ಕಾನ ಗಳಿಲೇವ್ವುಕರಿ ಯೊ ಅರ್ಘು ಇನ ಖ್ವಾಮ್ಪೆಸ್ ಟಿವೈರ್ದೊಥು.

5 ಇನೆ ಜಗ್‌ಜಾತ್ವ ಲ್ಹೋಡಾನ ಲರೇಥಿ ಚಲಾವ್‌ಣಂತೆ ಏಕ್ ಪರ್ವಾ ಲಡ್ತಾನ ಜಣಿ. ಯೋ ಲಡ್ಕು ತದೇಸ್ ದೇವ್‌ಕನಾಬಿ ಇನ ಸಿಂಹಾಸನ್‌ಕನಬಿ ಪಡೈಗಯು.

6 ಅಜು ಯೊ ತಯೇಡ ಜಂಗಳ್‌ಮ ನಾಶಿಚಲಿಗೈ. ಹಿಜ್ಜಾ ಇನ ಏಕ್ ಹಜಾರ್ ಬೇಖ್ಲೊ ತೀನಿಖ್ ದನ್‌ಲಗು ಪಳಾನಖ್ಜಾ ದೇವ್ ತಯಾರ್ ಕರಿರಾಖ್ಲೊಥೊತೆ ಝಗೋನ ಇನೆ ದೇಖಿ.

7 ಸೊರ್ಗಾಮ ಜಂಗ್ ಹುಯು. ಮೀಕಾಯೇಲಾಬಿ ಇನು ದೂತರ್‌ಬಿ ಅರ್ಘುನ ವಿರೋದ್ ಜಂಗ್‌ಭೀಡ್ಕು. ಇಮ್ಮಸ್ ಅರ್ಘುನ ದೂತರ್‌ಬಿ ಜಂಗ್ ಭೀಡಾಲಗ್ಕು.

8 ಕತೋಬಿ ಯೊ ಅರ್ಘುನ ತಾಖತ್‌ಕೊಂತೆ ಹರಿಗಯು. ಅಮ್ ಸೊರ್ಗಾಮ ಇವ್ಣನಾಬಿ ಝಗೊ ಮಳ್ಕುಕೊಯ್ಕಿ.

9 ಯೋ ಅರ್ಘುನ ಕತೊ ಪಿಶಾಚಿಕರಿಬಿ ಶೈತಾನ್ ಕರೀಬಿ ನಾಮ್‌ರ್ದವಾಳ ಯೊ ಜೂನೊ ಖ್ವಾಪ್ ಧರ್ತಿಪರ್ ಧಕೆಲಾಯೊ ಇನೊ ದೂತಬಿ ಇನ ಜೋಡ್ಕು ಜಮೀನ್‌ಪರ್ ಫೇಕೈಗಯು.

10 ತದೆ ಮೆ ಸೊರ್ಗಾಮ ಏಕ್ ಮೋಟೊ ಅವಾಜ್ ಖ್ವಮ್‌ಜ್ಯೊ; ಯೊ “ಜೀತ್‌ಬಿ, ಶಕತ್‌ಬಿ, ರಾಜ್ಯಬಿ ಹಮಾರ ದೇವ್ನು ಹುಯು, ಯೊ ಅಬಿಷೇಕ್ ಕರೈತೆ ಕ್ರಿಸ್ತನು ಅದಿಕಾರ್ ಹಮ್ಮೆ ಶುರುಹುಯಿರೊಸ್. ರಾತ್‌ದನ್ ಹಮಾರ ಭೇನೆ ಬೈಯೇವ್ನಿ ಬಾರೇಮ ದೇವ್ನ ಖ್ವಮ್ಣೆ ಕೆದೇಬಿ ಛಾಡಿ ಬೋಲುಕರ್ತೊಥೊತೆ ಛಾಡಿಖೋರ್ ಸೊರ್ಗಥು ಧಕೆಲೈಗಯೊ.

11 ಇವ್ಣೆ ಮರಣ್‌ಲಗೂಬಿ ಬೈಯೇ ಭೇನೆನ ಇವ್ಣ ಜಾನ್ ಪ್ಯಾರ್ ಕರೈಕೊಂತೆ, ಮೇಂಡಾನ ಚೆಲ್ಕುಹುಯಿರ್ದವಾಳನ ಲ್ಹೋಯಿಥಿಬಿ ಇನು ಸಾಕ್ಷಿನು ಅಜು ಬೋಲಾಯುತೆ ವಚನ್‌ಥಿಬಿ ಇನ ಜೂತಿಲಿದು.

12 ಇನಖ್ಜಾ ಸೊರ್ಗ, ಇನಾಮ ಜಿವ್ಣುಕರವಾಳಾಫೊ, ಖುಷಿಕರೊ. ಕತೋಬಿ ಜಮೀನ್ ದರ್ರಾವ್ ತುಮಾರಿ ಖರಾಬ್ ಹಾಲ್ವ ಶಾತ್‌ಕರಿ ಬೋಲು ಶನಕತೊ ಶೈತಾನ್ ಇನಲ್ಲಾತೆ ವಖ್ತ ಕಮ್‌ಕರಿ ಮಾಲುಮ್ ಕರಿಲಿನ್ ಘಣು ಚಂಡಾಳ್‌ವಾಳೊ ಹುಯಿನ್ ತುಮಾರಭಣಿ ಉತ್ರಿನ್ ಐರೊಸ್” ಕರಿ ಬೋಲ್ಕು.

13 ಅರ್ಝು ಇನುಯೋ ಜಮೀನ್‌ಪರ್ ಧಕ್ಯೆಲೈನ್ ಪಡಿರ್ವ್ವಾನು ಪರ್ವಿಲಿನ್, ಪರ್ಝೊ ಲಡ್ಕು ಜಣೀತೆ ತಯೇಡನ ಖ್ವತಾವನಖ್ವಾಜೆ ರಪೇಟಿನ್ ಗಯು.

14 ಕತೋಬಿ ಯೊ ತಯೇಡ ಜಂಗಳ್‌ಮ ಥೂತೆ ಇನಿ ಝಗೋನ ಉಡಿಜಾವನಖ್ವಾಜೆ ಇನ ಮೋಟಿಖ್ವಿ ಗರದ್ನಿ ಬೇ ಫಾಕ್ವಿಖ್ವಾರು ದೆವಾಯು. ಹಿಜ್ಜಾಯೊ ಖ್ವಡ್‌ತೀನ್ ವರಖ್ವ್ ದನ್ ಅರ್ಝುನ ಖ್ವಪಡ್ನುನಾತೆ ತಿಮ್ ಪಳಿ.

15 ಅರ್ಝು ಯೊ ತಯೇಡಾನ ವ್ಹವಾಡಿಲಿನ್ ಜಾವ್ನುಕರಿ ಇನ ಪೀಲೆ ನದ್ದಿನಿತರ ಬಾಕಾಮಾಥು ಪಾಣಿನ ಉಡಾಯು.

16 ಕತೋಬಿ ಜಮೀನ್ನೆ ಯೊ ತಯೇಡಾನ ಮದತ್ ಕರ್ಯ್ಕು ಯೋ ಇನ ಬಾಕಾನ ಪಖ್ವಾರಿನ್ ಅರ್ಝುನ ಇನ ಬಾಕೇಥಿ ಮ್ಹೇಲ್ಯೊತೆ ನದ್ದಿನ ಗಳಿಲಿದು.

17 ತದೆ ಅರ್ಝುನ ಯೊ ತಯೇಡಾಪರ್ ಘಣು ಖಿಜೈನ್, ಇನಿ ಪಿಳ್ಳಿಮ ಥೂತೆ ಇವ್ವಾಪರ್ ಕತೊ, ದೇವ್ನಿ ಹುಕುಮ್‌ನ ಪಾಡಿ ಚಾಲಿನ್ ಯೇಸುನಿ ಬಾರೇನಿ ಸಾಕ್ವಿ ಹುಯಿರ್ವ್ವಾಳನಪರ್ ಜಂಗೆ ಭೀಡಿನ್,

18 ದರ್ಯ್ವ ಕನಾರಿನ ರೇತ್‌ಪರ್ ಭೀರಿಗಯೊ.

13

ಬೇ ಜಾನ್ವರ್

1 ತದೆ ದರ್ಯ್ವಾಮಾಥು ಏಕ್ ಜಾನ್ವರ್ ನಿಕಳ್ತು ಆವನು ಮೆ ದೇಖ್ಚೊ ಇನ ಖ್ವಾತ್ ಮುಡ್‌ಕ್ಯಾಬಿ ದಖ್ವ್ ಶಿಂಗ್ಡ ಥು. ಯೊ ಶಿಂಗ್ಡಾವ್‌ಪರ್ ದಖ್ವ್ ಕಿರೀಟ್‌ಬಿ, ತಾಳ್ವಪರ್ ದೇವ್ನ ಗಾಳೆದ್ಯವಾನು ನಾಮ್‌ಅಖ್ಬು ಲೀಖ್ತೆರ್ವ್ವುಡ್ತು.

2 ಮೇ ದೇಖ್ಚೊತೆ ಜಾನ್ವರ್ ಅದೋಗಾನಿತರಾಬಿ ಇನ ಗೋಡ ರೀಚ್‌ನ ಗೋಡಾನಿಫೋಣಿಬಿ ಥು. ಇನು ಬಾಕು ಶುಂಭಾನ ಡಾಚ್‌ನಿತರಾಬಿ ಥು. ಅರ್ಝುನ ಇನ ಶಕತ್‌ಬಿ, ಸಿಂಹಾಸನ್‌ಬಿ, ಮೋಟಿ ಅದಿಕಾರ್‌ನ ದಿದು.

3 ಜಾನ್ಸರ್‌ನ ಏಕ್ ಮುಡ್‌ಕ್ಕು ಫಾವ್‌ಹುಯಿನ್ ಮರ್ದನಿತರ ದೆಖವ್‌ಕರ್ತುಧು. ಯೊ ಮರಣ್ಣೊ ಫಾವ್ ಅಟ್ಟು ಹುಯಿಗು, ಧರ್ತಿನ ಜಗತ್‌ನು ಅದ್ಮಿಖ್ವಾರು ಯೊ ಜಾನ್ಸರ್‌ನ ದೇಖಿನ್ ಆಶ್ಚರ್ಯ ಕರೈ.

4 ಅರ್ಝುನ ಯೊ ಜಾನ್ಸರ್‌ನ ಅದಿಕಾರ್ ದಿರಾಖ್ಣೊತೆಖ್ವಾಜಿ ಇವ್ಣೆ ಯೊ ಅರ್ಝುನ ಆರಾದನೆಕರೈ. ಅಜ್ಜು ಇವ್ಣೆ “ಯೋ ಜಾನ್ಸರ್‌ನಾಬಿ ಆರಾದನೆ ಕರಿನ್, ಆ ಜಾನ್ಸರ್‌ನ ಬರೋಬರಿ ಕೋಣ್ ಲ್ಹಾ? ಅನ ವಿರೋದ್ ಜಂಗ್ ಭಿಡಾನ ಕೋಣ್ ಶಕತ್‌ವಾಳು? ಕರಿ ಬೋಲ್ಯು.

5 ಯೊ ಜಾನ್ಸರ್‌ನೆ ಬಡೈನಿ ವಾತೆಥೀಬಿ ಗಾಳೆಥೀಬಿ ಬೋಲಾನ ಮ್ಹೊಡು ದೆವೈರೈಧು. ಅಜ್ಜು ಬೇಲುಪ್ಪರ್ ಚಾಳಿಖ್ವ ಮಹಿನಲಗು ಇನು ಕಾಮ್‌ಖ್ವಾರು ಚಲಾವನಿ ಅದಿಕಾರ್‌ಬಿ ಇನ ದೆವೈರೈಧು.

6 ತದೆ ಯೊ ಜಾನ್ಸರ್‌ನೆ ದೇವ್ವ ಗಾಳೆದಿದು ಕಾಹೆತೆ ಇನ ನಾಮ್‌ಬಿ, ಯೊ ರ್ವಾಪಾನ ಮಂದಿರ್‌ನಾಬಿ, ಸೊರ್ಗಾಮ ರ್ವಾಳಿಖ್ವಾರಾನ ಗಾಳೆದಿದು.

7 ಆ ನಾಹುಯಿನ್ ದೇವ್ವ ಪರಿಶುದ್ಧ ಅದ್ಮಿವ್‌ಪರ್ ಜಂಗ್ ಭೀಡಿನ್ ಇವ್ಣುನ ಹರಾವನಿ ಅದಿಕಾರ್ ದೆವಾಯು ಅಜ್ಜು ಅಖ್ವೀಸ್ ಖೂಮ್, ಬೋಲಿ, ಲೋಗ್, ಜಗ್‌ಜಾತ್‌ಪರ್ ಇನ ಅದಿಕಾರ್ ದೆವಾಯು.

8 ಜಗತ್ ಉಬ್‌ಜಾನ ಪಹಿಲೆಸ್ ರ್ವೀಖ್ವಾಯೊತೆ ಮೇಂಠಾನ ಚೆಲ್ವು ಹುಯಿರ್ವಾಳನ ಲ್ಹಾತೆ ಜಾನ್ಸ ಹಕ್‌ವಾಳಾನಿ ಪುಸ್ತಕ್‌ಮ ಕಿನುಕಿನು ನಾಮ್‌ಖ್ವಾರು ಲೀಖೈರ್ವೊಯ್ಕಿ ಜಮೀನ್ನು ಯೊ ಅದ್ಮಿಖ್ವಾರೂಸ್ ಯೊ ಭಯಂಕರ್ ಜಾನ್ಸರ್‌ನ ಆರಾದನೆ ಕರ್ತೆ.

9 ಕಾನ್‌ರ್ವಾಳು ಖ್ವಮ್‌ಭಾದೆ;

10 ಕೋಂಡಿಫಾಲವಳೊ, ಇನುಯೋಸ್ ಜೇಲ್‌ಮ ಭಾಶೆ, ತಲ್ವಾರ್‌ಥಿ ಮಾರವಳು ತಲ್ವಾರ್‌ಥೀಸ್ ಮರ್ಶೆ. ಅನಾಮ ದೇವ್ವು ಅದ್ಮಿಖ್ವಾರು ಖ್ವಮಾಳಿನ್ ವಿಶ್ವಾಸ್‌ಥಿ ರ್ವೀವ್ಣು.

11 ಅಜೇಕ್ ಜಾನ್ಸರ್ ಜಮೀನ್‌ಮಾಥು ಆವನು ದೇಖ್ಣೊ. ಅನ ಮೇಂಠಾನಿತರ ಬೇ ಶಿಂಗ್ಲ ಧು, ಯೊ ಅರ್ಝುನಿತರ ವಾತೆ ಬೋಲ್ಯು.

12 ಆ ಜಾನ್ಸರ್ ಪಹಿಲ ಜಾನ್ಸರ್‌ನ ಖ್ವಮ್ಣೆ ಇನಿ ಅಖ್ವೀಸ್ ಅದಿಕಾರ್‌ನ

ಚಲೈನ್, ಮರಣೊಫಾವ್ ಗುಣ್‌ಹುಯುತೆ ಪಹಿಲ ಜಾನ್ವರ್‌ನ
ಜಮೀನ್‌ಪರ್ ರ್ಹವಾಳು ಇನ ಆರಾದನೆ ಕರಾನಿಫೋಣಿ ಕರೈ.

13 ಹೈರುತೆ ಅದ್ಮಿನ ಖ್ವಾಮೈ ಆಬ್‌ಥು ಆಗ್ ಜಮೀನ್‌ಪರ್
ರಂಙಾವನಿತರನು ಅದ್ಭುತ್‌ಖ್ವಾರು ಕರ್ತುಹುಯಿನ್,

14 ಯೊ ಪಹಿಲ ಜಾನ್ವರ್‌ನ ಖ್ವಾಮೈ ಅದ್ಭುತ್‌ಖ್ವಾರು ಕರಾನು
ಅದಿಕಾರ್ ಛಾತೆ ಇನಖ್ವಾಜೆ ಧರ್ತಿನ ಅದ್ಮಿಖ್ವಾರನ ಖ್ವೈಲು ಕರೈ.
ಇವ್ಣುನ ತಲ್ವಾರ್‌ಧಿ ಫಾವ್‌ಹುಯಿನ್ ಮರೈಕೊಂತೆ ಬಚಿರ್‌ವ್ತೆ
ಜಾನ್ವರ್‌ನ ಮರ್ಯಾದಿ ದೈವಾನಖ್ವಾಜೆ ಮೂರತ್ ಬಣಾವ್ಣುಕರಿ
ಹುಕುಮ್ ಕರೈ.

15 ಆ ನಾಹುಯಿನ್ ಆ ಬೇನು ಜಾನ್ವರ್‌ನ ಮೂರತ್ ಜಾನ್ ದೈವಾನಿ
ತಾಖತ್‌ಬಿ ಮಳ್ಳು ಇನ ಖ್ವಲಾಮ್ ಕರಾಕೊಂತೆ ಖ್ವಾರಸ್ಸು ಮರ್‌ನಾಖಿನಿ
ಶಕತ್ ಇನಥು.

16 ಆ ಬೇನು ಜಾನ್ವರ್‌ಬಿ, ಶಾಣು, ಅಡ್ಡಾಣಿ, ಶೌಕಾರ್, ಗರೀಬ್,
ಛುಟಾರ್‌ರ್ಹವಾಳು, ಗುಲಾಮ್‌ಖ್ವಾರು ಅಖ್ವೊಬಿ ಇವ್ಣು ಇವ್ಣು
ಖಾವಹಾತ್ಪರ್ ರ್ಹವೊ, ತಾಳ್ವಪರ್ ರ್ಹವೊ ಖ್ವಣೇದ್ ನಖಾವ್ಣು ಕರಿ
ಜುಲಮ್ ಕರೈ.

17 ಯೊ ಖ್ವಣೇದ್ ಕಿನ ಕೊಯ್ನಿಕಿ ಇವ್ಣೆ ಲ್ಯಾವಾನ ಕೊಹುಯುನಿ ಅಜ್ಜು
ವೇಙ್ಘಾನಬಿ ಹುಯುಸ್ ಕೊಯ್ನಿ. ಯೊ ಖ್ವಣೇದ್ ಖಿವುಕತೊ ಪಹಿಲ
ಜಾನ್ವರ್‌ನು ನಾಮ್ ನತರ್ ಇನ ನಾಮ್ ವತಾಳನು ಗಣ್ತೇನು ಲೀಖ್ನು.

18 ಅನ ಮಾಲುಮ್ ಕರಿಲ್ಯಾವಾನ ಗ್ಯಾನ್‌ಬಿ ಭರೂರತ್ ಛಾ. ಅಕ್ಕಿ
ಯೊ ಜಾನ್ವರ್‌ನ ಗಣ್ತಿನ ಲೀಖ್ನುನ ಗಣಾದೆ, ಯೊ ಏಕ್ ಅದ್ಮಿನ
ವತಾಳನು ಗಣ್ತೇನು ಲೀಖ್ನು ಹುಯಿರ್‌ವ್ತು. ಇನು ಗಣ್ತೇನು ಲೀಖ್ನು
ಛೊಖ್ವೊ ಛೊಪರ್ ತೀನಿಖ್ವೊ.

14

ಮೇಂಡಾನು ಚೆಲ್ಕು ಅಜ್ಜು ಇನು ಅದ್ಮಿಖ್ವಾರು

1 ಅನಪಾರ್ ಮೆ ದೇಖಾಮ ಬಲಿ ಮೇಂಠಾನ ಚೆಲ್ಕುಹುಯಿರ್ವಾಳೊ ಚೀಯೋನ್ ಪರ್ಭತ್‌ಪರ್ ಭಿಯುರ್ವಾನು ದೇಖ್ಯೊ ಇನ ಜೋಡ್ಕ ಏಕ್ ಲಾಕ್ ಚಾರ್‌ಲುಪ್ಪರ್ ಚಾಳಿಖ್ತ್ ಹಜಾರ್‌ಜಣು ಥು. ಇವ್ಣ ತಾಳ್ವಪರ್ ಇನು ನಾಮ್‌ಬಿ ಇನ ಬಾನು ನಾಮ್‌ಬಿ ಲೀಖ್ತಿರ್ವಾಳು.

2 ಆನಾಹುಯಿನ್ ಪರಲೋಕ್‌ಥು ಪಾಣಿನ ತೋಫಾನ್ನಿತರಾಬಿ, ಘಲಾರನ ಅವಾಜ್‌ನಿತರಾನೊ ಏಕ್ ಮೋಟೆ ಅವಾಜ್‌ನ ಖ್ವಮ್‌ಜೊ. ಮೆ ಖ್ವಮ್‌ಜೋತೆ ಯೊ ಅವಾಜ್‌ ಖ್ವಾರಂಗೊ ವಜಾಡಿನ್ ಗೀದ್ ಬೋಲಾವಾಳಾವ್ಣು ಅವಾಜ್‌ನಿತರಥು.

3 ಇವ್ಣೆ ಸಿಂಹಾಸನ್ನ ಖ್ವಾಮ್ಣೆಬಿ ಯೊ ಚಾರ್ ಜೀವಿನ ಅಜ್ಜು ಶಾಣವ್ಣು ಖ್ವಾಮ್ಣೆಬಿ ನವು ಗೀದ್ ಬೋಲ್ಯು. ಆ ಧರ್ತಿಥು ಮೋಲ್ ಲೀರಾಖ್ಯುಧೂತೆ ಏಕ್ ಲಾಕ್ ಚಾರ್‌ಲುಪ್ಪರ್ ಚಾಳಿಖ್ತ್ ಹಜಾರ್ ಅದ್ಮಿನ ಪಣ್ಣಿ ಬಿಜ್ಜು ಕೋಣ್‌ಬಿ ಯೊ ಗೀದ್‌ನ ಶಿಕಾನ ಕೊಲುಷೇನಿ.

4 ಇಮ್ಮತ್ ತಯೇಡಾನಿ ಶವಾಶಿಥಿ ಮೈಲು ಹುಯುಕೊಂತೆ ಕವಾರಿನಿತರ ಥೂತೆ ಅವ್ಣೆಸ್. ಬಲೀನ ಮೇಂಠಾನು ಚೆಲ್ಕು ಹುಯಿರ್ವಾಳೊ ಕಿಚ್ಚಾ ಗಯೊತೋಬಿ ಇವ್ಣೆ ಅನ ಪೀರೆ ಭಾಸ್. ಅವ್ಣೆ ಅದ್ಮಿವ್‌ಮಾಥು ಶೊಂತ್ ಅದ್ಮಿಹುಯಿನ್ ಮೋಲ್ ಲೆವೈಜೈನ್ ದೇವ್‌ನಾಬಿ ಮೇಂಠೊ ಹುಯಿರ್ವಾಳನಬಿ ಪಹಿಲ ಫಲ್ವಿತರಹುಯ.

5 ಅವ್ಣ ಮ್ಹೋಡಾಮ ಝೂಟಿ ಕೋಸ್‌ಥೂನಿ. ಅವ್ಣೆ ನಿರ್ದೋಷ್ ಹುಯಿರ್ವಾಳು.

ತೀನ್ ದೇವ್ನ ದೂತರ್

6 ಬಿಜೇಕ್ ದೇವ್‌ನೊ ದೂತ ಆಬ್‌ನ ಇಚ್ಛೆಮ ಉಡುಕರಾನು ದೇಖ್ಯೊ ಭಮೀನ್‌ಪರ್ ಜಿವ್‌ಕರಾತೆ ಹರೇಕ್ ಜಗ್‌ಭಾತ್, ಖೂಮ್, ಬೋಲಿ, ಅದ್ಮಿಖ್ವಾರನ ಬೋಲಿವತಾಳಾನ ಖ್ವಾಜಿ ಹರ್‌ಹಮೇಶಾನು ಅಲ್ಪಿ ಸಂದೇಶ್ ಇನಾಕನ ಥು.

7 ಯೊ ದೇವ್‌ದೂತನೆ ಜೋರೇಥಿ, “ದೇವ್‌ಥಿ ಡರೊ ಇನ ಮಹಿಮೆಕರೊ. ಶನಕತೊ ಯೊ ಅದ್ಮಿಖ್ವಾರನ ತೀರ್ಪ್ ದೈವಾನಿ

ವಖ್ತತ್ ಐಗಿ. ಇನ ಆರಾದನೆ ಕರೊ ಸೊರ್ಗನಾಬಿ, ಜಮೀನ್ನಾಬಿ, ದರ್ರಾವ್ನಾಬಿ, ಪಾಣಿನ ಚೇಜ್ಞಭಾರನಾಬಿ ಬಣಾವವಾಳನ ಆರಾದನೆ ಕರೊಕರಿ ಬೋಲ್ಯೊ.

8 ಇನ ಪೀರೆ ಬೇನೊ ದೇವ್ವದೂತನೆ ಐನ್, “ರಡ್ಕಿಗೈ, ರಡ್ಕಿಗೈ, ಬಾಬೆಲ್‌ಕರಿ ಹುಯಿರಿತೆ ಮೋಟಿ ನಂಗ್ರಿ ರಡ್ಕಿಗೈ! ಹೈರಿತೆ ಹರೇಕ್ ಜಗ್‌ಭಾತ್‌ವಾಳಾನ ವ್ಯಬಿಚಾರ್‌ಕರಿ ಬೋಲಾನ ದ್ರಾಕ್ಷಿನ ರಖ್ವನ್ ಪಿಡ್ಡೆದಿದಿ” ಕರಿ ಬೋಲ್ಯೊ.

9 ಇನ ಪೀರೆ ತೀನ್ನೊ ದೇವ್ವದೂತನೆ ಅಯಿನ್, “ಕೋಣ್‌ತೋಬಿ ಖೆವತೋಬಿ ಜಾನ್ವರ್‌ನಾಬಿ ಇನು ಮೂರತ್‌ನಾಬಿ ಆರಾದನೆಕರಿನ್ ಇವ್ವ ತಾಳ್ವಪರ್‌ರ್ದವೊ ಹಾತ್‌ಪರ್‌ರ್ದವೊ ಇನು ಖ್ವಣೇದ್ವ ನಖೈರಾಖ್ಯೊತೊ,

10 ಯೋಬಿ ಜಿನುಕು ದೇವ್‌ನೊ ಇರಾದೊಕರಿ ಬೋಲಾನ ಕಟೋರಮ ಶಾಶ್ವಿ ಮಳಾಯುಕೊಂತೆ ನಾಖಹುಯು ದೇವ್ವ ಇರಾದೊಕರಿ ದ್ರಾಕ್ಷಿನ ರಖ್ವನ್ ಪೀಶೆ. ಪರಿಶುದ್ ದೇವ್ವ ದೂತರ್‌ ಖ್ವಾಪ್ಲೇಬಿ, ಬಲೀನ ಮೇಂಡಾನ ಚೆಲ್ಕಾನ ಖ್ವಾಪ್ಲೆ ಅಗ್‌ಥೀಬಿ, ರಂಜಕ್‌ಥಿ, ಖ್ವಿತಾಪ್ಲಿ ಪಡಾಶೆ.

11 ಎಥ್ರಾನವಾಳನೆ ಖ್ವಿತಾಪ್ಲಿನೊ ಧುವೊ ಜಗ್‌ಜಮಾನಮಾಬಿ ಲ್ಲಡುಕರ್ಷೆ, ಜಾನ್ವರ್‌ನ ಅಜ್ಜು ಇನ ಮೂರತ್ವ ಖ್ವಲಾಮ್ ಕರವಾಳು ರ್ದವೊ, ಇನ ನಾಮ್ವ ಖ್ವಣೇದ್ವ ನಖೈರಾಖವಳೊ ರ್ದವೊ ರಾತ್‌ಬಿ ದನ್ ಆರಾಮ್‌ಕೊಂತೆ ರೆಶೆ ಕರಿ ಮೋಟಿ ಅವಾಜ್‌ಥಿ ಬೋಲ್ಯೊ.

12 ಅನಾಮ ದೇವ್ವಿ ಹುಕುಮ್‌ನಾಬಿ, ಯೇಸುನಿ ಬಾರೇನಿ ವಿಶ್ವಾಸ್‌ನ ಪಾಡಿನ್ ಚಾಲುಕರಾವಳ ದೇವ್ವ ಅದ್ಮಿಖ್ವಾರನ ಖ್ವಮಾಳಿರ್ದವಾನು ಹಜ್ಜಾವತಾಳ್ವ ಪಡಾಸ್.

13 ಪರಲೋಕ್‌ಥು ಏಕ್ ಅವಾಜ್ ಮನ ಖ್ವಮಜ್‌ಪಡ್ಕು. ಇನೆ ಹಂಕೇಥು ಪ್ರಭುನ ಭಕ್ತರ್‌ಹುಯಿನ್ ಮರಾವಳು ಧನ್ಯಕರಿ ಲೀಖ್‌ಕರಿ ಮನ ಬೋಲ್ಯು. ಇನ ಆತ್ಮನೆ, ಒಹೊ ಇವ್ವೆ ಧನ್ಯರಸ್. ಇವ್ವೆ ಇವ್ವ ಮ್ಹಿನತ್‌ನ ಖಿತಮ್‌ಕರಿನ್ ಅರಾಮ್ ಕರ್ಶೆ ಅಜ್ಜು ಇವ್ವು ಅಲ್ಫು ಕಾಮ್‌ಖ್ವಾರು ಇವ್ವ ಜೋಡ್ವ ಚಾಲ್‌ಷೆ ಕರಿ ಬೋಲ್ಯೊ.

ಜಮೀನ್ನು ಖುಗ್ಗೀನ ದನ್ನಿ ಬಾರೇಮ

14 ತದೆ ಮೇ ದೇಖಾದಿನ್ ಮಾರಖ್ವಾಪ್ಪೆ ಅದ್ವಿನೊ ಛಿಯ್ಯಾನಿತರ ದೆಖವ್‌ಕರಾತೆ ಏಕ್‌ಣೊ ಧೋಳ ವಾದ್‌ಳಾನ ಉಪ್ಪರ್ ಬೆರೋಥೊ. ಇನ ಮುಡ್‌ಕ್‌ಪರ್ ಖೊನ್ನಾನಿ ಕಿರೀಟ್‌ಥಿ. ಅಜು ಇನ ಹಾತ್ಮ ಫಾಲ್ತಿ ದರಾತಿಥಿ.

15 ತದೆ ಬಿಜೇಕ್ ದೂತನೆ ಮಂದಿರ್‌ಮಾಥು ಭಾರ್ ಆಯಿನ್ ವಾದ್‌ಪರ್ ಬೆರಾತೆ ಇನ, “ಜಮೀನ್‌ಮಾನು ಅನಾಜ್ ಪಕ್ಯೆಗಯು, ವಡಾವ್ಣಿನ ದನ್ ಆಯಿಗ. ತಾರಿ ದರಾತಿನ ಪಾಡಿನ್ ಅನಾಜ್‌ನ ವ್ಹಾಡ್” ಕರಿ ಜೋರೇಖು ಬೋಲ್ಯೊ.

16 ಇಮ್ಮಸ್ ವಾದ್‌ಪರ್ ಬೆರೋಥೋತೆ ಯೊ ಇನಿ ಫಾಲ್ತಿ ದರಾತಿನ ಜಮೀನ್‌ಪರ್ ನಾಖ್ಯೊ. ತದೆ ಜಮೀನ್‌ಪರ್‌ನು ಅನಾಜ್ ವ್ಹಡೈಗು.

17 ಇನಪಾರ್ ಬಿಜೇಕ್ ದೇವ್‌ನೊ ದೂತ ಪರ್‌ಲೋಕ್‌ನು ಮಂದಿರ್‌ಮಾಥೊ ಭಾರ್‌ಆಯೊ. ಇನಕನಾಬಿ ಏಕ್ ಫಾಲ್ತಿ ದರಾತಿ ಥಿ.

18 ಅನವಾರ್ ಬಿಜೇಕ್ ದೇವ್‌ನೊ ದೂತ ಫಾಚರ್‌ಕನಥೊ ಆಯೊ. ಇನ ಆಗ್ನು ಉಪ್ಪರ್ ಅದಿಕಾರ್ ಥು. ಯೊ ಫಾಲ್ತಿ ದರಾತಿವಾಳನ, “ತಾರಿ ಫಾಲ್ತಿ ದರಾತಿನ ಪಾಡಿಲೀನ್, ಜಮೀನ್‌ಪರ್‌ನು ಬಾಗ್‌ನು ದ್ರಾಕ್ಷಿನ ಗುಚ್ಚಾವ್ನ್ ವ್ಹಾಡ್. ಇನು ಪಂಡುಖ್ವಾರು ಅಖ್ವಾಸ್ ಪಕ್ಯೆಗಯು ಕರಿ ಊಚ್ ಅವಾಜ್‌ಥಿ ಚಿಕ್‌ರಯ್ಲೊ.

19 ತದೆ ಯೋ ದೇವ್‌ನೊ ದೂತನೆ ಇನಿ ದರಾತಿ ಥಿ. ಜಮೀನ್‌ಪರ್‌ಲ್ಯು ದ್ರಾಕ್ಷಿನ ವೇಲಮಾನು ದ್ರಾಕ್ಷಿನ ಪಂಡಾನ ವ್ಹಾಡಿಎಕ್ವಕರಿನ್, ದೇವ್‌ನೊ ಇರಾದೊಕರಿ ಬೋಲಾನು ಮೋಟಿ ಬಾನೇಮ ಫೇಕ್ಯೊ.

20 ತದೆ ಯೊ ದ್ರಾಕ್ಷಿನ, ಬಾನೇನ ಖ್ವಯೇರ್ ಭಾರ್ ಲೀಜೈನ್ ಖುಂದ್‌ಲ್ಯು. ಯೊ ಬಾನೆಮಾಥು ಲ್ಹೋಯಿ ನಿಕ್ಕಿನ್ ಘೋಡಾವ್‌ನು ಲಗಾಮೇನ ಛಿಮಾವಯೆತ್ರಿ ಊಚು ಲ್ಹಡಿನ್ ಬೇಖ್ಲೊ ಮೈಲ್‌ಎತ್ರಿ ದೂರ್ ಪಾಚ್ ಅಡಿ ಗಧಾರ್ ವ್ಹಯು.

ಖ್ವರ್ತಿನಿ ಖ್ವತಾಪ್ಪಿನ ಜೋಡ್ವ ದೇವ್ವದೂತರ್

¹ ಪರ್ಲೋಕ್‌ಮ ಮೇ ಘಣು ಆಶ್ವರ್ಯ ಹುಯಿರ್ದಾವನು ಬಿಜೇಕ್ ಅದ್ಭುತನ ದೇಖ್ಚೊ. ತದೆ ಖ್ವತ್‌ಜಣ ದೇವ್‌ದೂತರ್‌ನ ಹಾತ್ತ್ ಖ್ವತ್ ಖ್ವತಾಪ್ಪಿಧು, ಆ ಖ್ವರ್ತಿನಿ ಖ್ವತಾಪ್ಪಿಖ್ವಾರಿ. ಆ ಅಖ್ವಾನ ಜೋಡೆ ದೇವ್‌ನೊ ಇರಾದೊ ಪೂರ ಉಷೆ.

² ಮೇ ದೇಖಾನಿವಖ್‌ತೆ ಆಗ್ ಮಳಿರ್ದೊತೆ ಶಿಖ್ವಾನ ದರ್ದಾವ್‌ನಿ ಘೋಣಿ ಶಾತ್ತ್ರಿ ಏಕ್ ಮನ ದೆಖಾಯು. ತದೆ ಜಾನ್ವರ್‌ಬಿ ಅಜು ಇನ ಮೂರತ್ತ್ ಖ್ವಲಾಮ್ ನಾಕರ್‌ವ್ತೇಬಿ ಇನ ನಾಮ್ ಖ್ವಣೇದ್‌ನು ಲೀಖ್ಯಾನು ಮುದ್ರೊ ನಾನಖಾವ್ಣತೇಬಿ ಜೈಕಾರ್ ಲೀರಾಖವಾಳು, ದೇವ್‌ಥಿ ದೆವಾಯುತೆ ಖ್ವಾರಂಗಾವ್ ಇವ್ಣ ಹಾತ್ತ್ ಧರಿಲೀನ್ ಶಿಖ್ವಾನ ದರ್ದಾವ್‌ಕನ ಭಿಯಾಥ.

³ ಇವ್ಣೆ ದೇವ್‌ನೊ ಸೇವಕ್ ಹುಯಿರೋತೆ ಮೋಶೆನ ಗೀದ್‌ನ ಮೇಂಥಾನು ಚೆಲ್ಕಾನು ಗೀದ್‌ನ ಬೋಲ್ತೊಹುಯಿನ್, ಪ್ರಭು ಹುಯಿರೋತೆ ದೇವ್ ತೂ ಸರ್ವಶಕ್ತನೊ, ತಾರು ಕಾಮ್‌ಖ್ವಾರು ಮಹಿಮೆನಾಬಿ, ಆಶ್ವರ್ಯನೂಬಿ ಹುಯಿರುಸ್. ಅಖ್ವೀಸ್ ಜಗ್‌ಜಾತ್‌ನೊ ರಾಜ. ತಾರೊ ಮಾರಗ್‌ಖ್ವಾರು ನ್ಯಾವ್‌ಬಿ ಖ್ವಾಚೊಬಿ ಹುಯಿರುಸ್ ಕರಿ ಮಾಲುಮ್ ಕರಾವಸ್.

⁴ ಪ್ರಭು, ತುನ ಡರಾಕೊಂತೆ ಅಜು ಅದ್ವಿಖ್ವಾರು ತಾರ ನಾಮ್ ಮಹಿಮೆ ಕರಾಕೊಂತೆ ಕೋಣ್‌ತೋಬಿ ಛಾಕಿಶು? ತೂ ಎಕ್ಕ್‌ಸ್ ಜಣೊ ಪರಿಶುದ್. ತಾರು ನೀತಿನು ನ್ಯಾವ್‌ನು ತೀರ್ಪ್ ಉಜಾಳಮ ಆಯೊತೆ ಖ್ವಾಜೆ ಹರೇಕ್ ಜಗ್‌ಜಾತ್‌ಖ್ವಾರು ತಾರ ಖ್ವಾಪ್ಪೆ ಅಯಿನ್ ತುನ ಆರಾದನೆ ಕರ್ಶೆ.

⁵ ಆಹುವಾದೀನ್ ಮೆ ದೇಖಖ್ವತರ್ ಪರಲೋಕ್‌ಮಾಥು ದೇವ್ವ ದರ್ಶನ್ನು ಡೇರಾನು ಪವಿತ್ರರ್ಪುಗೊ ನಿಕ್ಕಿರ್ದೊಡು.

⁶ ಯೋ ಮಂದಿರ್‌ಮಾಥು ಖ್ವತ್ ಖ್ವತಾಪ್ಪಿನ ಧರಿರಾಖವಾಳ ಯೊ ಖ್ವತ್‌ಜಣ ದೇವ್‌ದೂತರ್ ಆಯು. ಇವ್ಣೆ ಶುದ್ಧಧೀಬಿ, ಉಜಾಖ್ವಾನುಬಿ, ಕೋರುಲುಂಗ್ವಾನ ಫೇರಿರಾಖ್ಪುಧು. ಅಜು ಇವ್ಣ ಛಾತಿಪರ್ ಖ್ವೊನ್ನಾನ ಪಟಾನ ಭಾಂದಿರಾಖ್ಪುಧು.

7 ಯೊ ಚಾರ್ ಜೀವಿಮ ಏಕ್‌ನೆ ಯೊ ಖ್ವಾತ್‌ಜಣ ದೇವ್‌ದೂತವ್ವ ಖ್ವಾತ್ ಖೊನ್ನಾನ ಕಟೋರಾವ್ವ ದಿದು. ಯೊ ಕಟೋರಮ ಜಗ್‌ಜಮಾನಥೂಬಿ ಜಿವೊರ್ವ್ವಾಳೊ ದೇವ್ನ ಚಂಡಾಳ್ ಭರೈರ್ವ್ವಾಳು.

8 ದೇವ್ನ ಮಹಿಮೆಥೀಬಿ, ಇನಿ ಶಕಥಿಬಿ ಹುಯೂತೆ ಧುವ್ವಾಥಿ ಯೊ ಮಂದಿರ್ ಭರೈರ್ವ್ವಾಳು. ಯೊ ಖ್ವಾತ್‌ಜಣ ದೇವ್‌ದೂತರ್ವ್ವ ಹಾತ್ಮಥೂತೆ ಖ್ವತಾಪ್ಪಿಖ್ವಾರು ಖತಮ್ ಹುವಾಲಗೂಬಿ ಯೊ ಮಂದಿರ್ವ್ವ ಮಹಿ ಜಾವನ ಕಿನೇಥೀಬಿ ಕೊಹುಯುನಿ.

16

ದೇವ್ನ ಇರಾದನೊ ಕಟೋರೊ

1 ತದೆ ಮಂದಿರ್‌ಮಾಥು ಆಯೂತೆ ಮೋಟೆ ಅವಾಜ್‌ನ ಖ್ವಮ್‌ಜ್ಯೊ ಯೊ ಅವಾಜ್‌ನೆ ಯೊ ಖ್ವಾತ್‌ಜಣ ದೇವ್‌ದೂತರ್ವ್ವ ತುಮೆ ಜೈನ್ ಯೊ ಕಟೋರಮಾಬಿ ದೇವ್ನ ಇರಾದನ ಧರ್ತಿಪರ್ ರಂಚೋಕರಿ ಬೋಲ್ಯು.

2 ತದೆ ಪೈಲೊ ದೇವ್‌ದೂತನೆ ಜೈನ್ ಯೊ ಇನ ಕಟೋರಮಥೂತೆ ಇನ ಜಮೀನ್‌ಪರ್ ರಂಚಾಖ್ವತರ್ ಜಾನ್ವರ್‌ನ ಖ್ವಣೇದ್ವ ನಖೈರಾಖವಳು, ಇನ ಮೂರತ್ವ ಖ್ವಲಾಮ್‌ಕರಾಸ್ತೆ ಅಖ್ವಾಸ್ನ ಉಪ್ಪರ್ ಗಲೀಜ್‌ಥಿ ರ್ವ್ವಾನು ಘಣು ದರದ್ವ ಫೋಡ ಉತ್ಯ.

3 ಬೇನೊ ದೇವ್‌ದೂತನೆ ಇನ ಕಟೋರಮ ಥೂತೆ ಇನ ದರ್ಯಾವ್‌ಪರ್ ರಂಚ್ಯೊ ತದೆ ದರ್ಯಾವ್ವ ಪಾಣಿ ಮರ್ಯ್‌ಹುಯಾನ ಲೊಯಿನಿತರ ಹುಯಿಗು. ಅಜು ದರ್ಯಾವ್‌ಮಾನು ಹರೇಕ್ ಜಿವ್ವು ಜೀವಿಬಿ ಮರಿಗು.

4 ತೀನ್ನ್ ದೇವ್‌ದೂತಾನೆ ಇನ ಕಟೋರಮ ಥೂತೆ ಇನ ನದ್ದೀವ್‌ಪರ್‌ಬಿ ಪಾಣಿನ ಚೆಜ್‌ಭಾರ ಪರ್ಬಿ ರಂಚ್ಯೊ ತದೆ ಯೊ ಅಖ್ವು ಪಾಣಿ ಲೊಯಿ ಹುಯಿಗು.

5 ಇನಪಾರ್ ಪಾಣಿನ ಅಧಿಕಾರ್ನ್ ದೂತನೆ ಅಮ್ ಬೋಲ್ಯೋಕಿ, “ತೂಸ್ ಕೆದೇಬಿ ರ್ವವವಾಳೊಬಿ, ಥೋತೆ ಪರಿಶುದ್ ದೇವ್. ಶನಕತೊ ತೂ ದೆವ್ಕರಾಸ್ತೆ ತೀರ್ಪ್ ಅಖ್ಖು ನ್ಯಾವ್ನು ಹುಯಿರ್ಲ್ವಸ್.

6 ಯೊ ಅದ್ಮಿಖ್ಹಾರ್ ದೇವ್ನು ಅದ್ಮಿವ್ನು ಅಜ್ಜು ಪ್ರವಾದಿ ಖ್ಹಾರಾನು ಲ್ಹೋಯಿನ ರಂಚ್ಕೊತೆಖ್ಹಾಜೆ ತುನೆ ಇವ್ಣುನ ಯೋ ಲ್ಹೋಯಿನ ಪಿಯಾನ ದಿದೊ. ಇವ್ಣುನ ಯೋಸ್ ಬರೊಬರನ್ ಕಿಮ್ಮತ್ ಕರಿ ಬೋಲಾನು ಮೆ ಖ್ಹಿಮ್ಜೊ.

7 ಅನಪಾರ್ ಚಾಚರ್ಥಿ ಆವಾತ್ ಖ್ಹಿಮಜ್ಪಡ್ಕು, ‘ದೇವ್ ಹುಯಿರ್ಲ್ಹೋತೆ ಪ್ರಭು ತು ಸರ್ವಶಕ್ತನೊ, ತಾರು ನ್ಯಾವ್ನು ತೀರ್ಪ್ ಅಖ್ಖು ಖ್ಹಾಚೊಬಿ ನ್ಯಾವ್ನೊಬಿ ಹುಯಿರ್ಲ್ವಸ್’ ಕರಿ ಬೋಲ್ಕು.

8 ಅನಕೇಡೆಥು ಚಾರ್ನ್ ದೇವ್ನುದೂತನೆ ಇನ ಕಟೋರಮಥೂತೆ ಇನ ಚಾಂದ್ಪರ್ ರಂಚ್ಕೊ ತದೆ ಚಾಂದ್ನ, ಆಗ್ನಿತರನು ತಡ್ಕೇಥಿ ಅದ್ಮಿನ ಭಂಜಾನು ಹುಕುಮ್ ದೆವಾಯು.

9 ಅದ್ಮಿಖ್ಹಾರ್ ಜಾಖ್ಖತ್ ತಡ್ಕೇಥಿ ಬಳ್ಳುತೋಬಿ ಇವ್ಣೆ ಯೊ ಖ್ಹಿತಾಪ್ಪಿ ಅಖ್ಖಾಪರ್ ಅದಿಕಾರ್ ಲೀರಾಖ್ಹೋಥೋತೆ ದೇವ್ ನಾಮ್ನು ಗಾಳೆದಿದು ಕಾಹೆತೆ, ಇವ್ಣೆ ಪಶ್ಚತ್ತಾಪ್ ಕರೀನ್ ದೇವ್ಭಣಿ ಫರ್ಮ್ಕೊಯ್ನಿ ಇನ ಮಹಿಮೆ ಕೋಕರ್ಮ್ನಿ.

10 ಪಾಚ್ಚೊ ದೇವ್ನು ದೂತಾನೆ ಇನ ಕಟೋರಮ ಥೂತೆಯಿನ ಜಾನ್ವರ್ನಿ ಸಿಂಹಾಸನ್ಪರ್ ರಂಚಾಖ್ಹತರ್ ಇನು ರಾಜ್ಯ ಅಖ್ಖು ಅಂಧಾರುಹುಯು. ಅದ್ಮಿಖ್ಹಾರು ಅಜಾಥಿ ದಾತ್ಮಜೀಬ್ ಧರಿಲೀನ್,

11 ಇವ್ಣು ಅಜಾನ ಖ್ಹಾಜೇಬಿ ಫೋಡಾನ ಖ್ಹಾಜೇಥಿಬಿ ಸೊರ್ಗಾನ್ ದೇವ್ ಗಾಳೆದ್ಯವಾನು ಕಾಹೆತೆ ಇವ್ಣೆ ಇವ್ಣು ಕರ್ಮ್ತೆ ಖರಾಬ್ ಕಾಮ್ಥಿ ದೇವ್ಭಣಿ ಫರ್ಮ್ಕೊಯ್ನಿ.

12 ಫೋನ್ ದೇವ್ನುದೂತಾನೆ ಇನ ಕಟೋರಮ ಥೂತೆಯಿನ ಯೂಫ್ರಟಿಸ್ ಕರಿ ಮೋಟಿ ನದ್ವೀಮ ರಂಚಾಖ್ಹತರ್ ಯೋ ಪಾಣಿ ಖ್ಹಿರೀನ್ ಪೂರಬ್ಬು ಬಾಜುಥು ಆವಾಳ ರಾಜಾವ್ನ್ ಮಾರಗ್ ತೈಯಾರ್ಹುಯು.

13 ತದೆ ಅರ್ಝುನ ಮ್ಹೋಡಾಮಾಡುಬಿ ಜಾನ್ವರ್‌ನ ಮ್ಹೋಡಾಮಾಡು ಅಜು ಝೂಟುಪ್ರವಾದಿನ ಮ್ಹೋಡಾಮಾಡು ಮೇಂಡುಕ್‌ನಿತರನು ತೀನ್ ಗಲೀಜ್ ಆತ್ಮಖ್ವಾರು ಆವನು ದೇಖ್ಚೊ.

14 ಆ ಖ್ವಣೀದ್‌ನುಕಾಮ್ ಕರವಾಳು ಭೂತ್‌ನು ಆತ್ಮ ಹುಯಿರ್ದೆನ್ ಧರ್ತಿಪರ್‌ಲ್ಯ ಅಖ್ವಾಸ್ ರಾಜವ್‌ಕನ ಜೈನ್ ಸರ್ವಶಕ್ತನೊ ದೇವ್ ಮಹಿಮೆನ ದನ್ನ ಜಂಗ್‌ನಖ್ವಾಜೆ ಇವ್ಣುನ ಎಕ್ಚು ಕರುಕರ್ತುಡು.

15 “ಹಂದೇಕ್ ಚೋರ್ ಆವಾನಿಘೋಣಿ ವಳ್ಕಾವುಸ್. ಇನುಯೋ ಉಫಾಡೊ ಹುಯಿನ್ ಅದ್ವಿಧಿ ಖ್ವರಮ್ ನಾಕಡೈಲೇವ್ಣುತೆ ಹೊಷಾರ್‌ಧಿ ರ್ದೆನ್ ಇನ ಲುಂಗ್ಡಾನ ಜತನ್‌ಧಿ ಬಚಾಡೈಲ್ಯವಾಳೊ ಧನ್ಯ ಹುಯಿರ್ದೋಸ್.”

16 ತದೆ ಯೊ ಜಮೀನ್ನ್ ರಾಜಾವ್‌ನ ಇಬ್ರಿಯ ಬೋಲಿಮ ಅರ್ಮಗಿದ್ದೋನ್ ಕರಿ ಬೋಲಾನ ಝಗೋಕನ ಮಳಾಯು.

17 ಖ್ವಾತ್ತ್ ದೇವ್‌ದೂತನೆ ಇನ ಕಟೋರಮ ಥೂತೆಯಿನ ವಹಿರಾನ ಗೋಳಪರ್ ನಾಖ್ಚೊ, ತದೆ ಮಂದಿರ್‌ನು ಸಿಂಹಾಸನ್‌ಧು ಮೋಟು ಅವಾಜ್ ಹುಯಿನ್, “ಖತಮ್ ಹುಯಿಗು” ಕರಿ ಬೋಲ್ಚು.

18 ತದೆ ವಿಜ್ಞಳಿಬಿ, ಫಲಾರನೂಬಿ ಹುಯು ಅತ್ರೇಸ್ ಕಾಹೆತೆ ಮೋಟು ಭೂಕಂಪ್ ಹುಯು. ಅದ್ವಿಖ್ವಾರು ಜಮೀನ್‌ಪರ್ ಥೂತೆ ತಪ್‌ಥೂಬಿ ಇಮ್ಮು ಮೋಟು ಭೂಕಂಪ್ ಕೊಹುಯಿರ್ದ್ವೂನಿ.

19 ಮೋಟು ನಂಗರ್ ತೀನ್ ಭಾಗ್ ಹುಯಿನ್ ಚೀರೈಗು ಅಜು ಜಗ್‌ಜಾತ್‌ನು ನಂಗ್ರಿಖ್ವಾರು ಪಡಿಗು. ತದೆ ದೇವ್ ಬಾಬೆಲ್‌ನ ಖ್ವಿಯಾಲ್ ಕರೀನ್ ಇನು ಘಣು ಇರಾದೊ ಕರಿ ಬೋಲಾನು ದ್ರಾಷ್ಟಿನ ರಖ್ವಿಧಿ ಭರಾಯುಹುಯು ಕಟೋರಾನ ಯೊ ನಂಗರ್ದ್ ದಿದೊ.

20 ತದೆ ಹರೇಕ್ ಟಾಪು ನಾಖ್ವಿಜೈನ್ ಛಪಿಗು ಪಹಾಡ್‌ಖ್ವಾರು ಡೋಳೇಧಿ ಲಪಿಗಯು.

21 ಅಜು ಆಬ್‌ಧು ಗಾರಾನೊ ಬಂಡಾನೊ ಪಾಣಿ ರಂಚಾಯೊ. ಏಕೇಕ್ ಗಾರಾನೊ ಬಂಡೊ ಅಡೈವಿಖ್ ಕಿಲೊಯೆತ್ರೆ ವಜನ್ ಥು. ಯೊ ಗಾರಾನ ಬಂಡಾನ ವರ್ಖ್ವಾತ್ತ್ಲಿ ಖ್ವತಾಪ್ಪಿ ಜಾಖ್ವತ್ ಹುಯೂತೆಖ್ವಾಜೆ ಯೊ ವರ್ಖ್ವಾತ್‌ಮ ಖ್ವಪ್‌ಡ್ಯೂತೆ ಅದ್ವಿಖ್ವಾರು ದೇವ್ ಗಾಳಿದಿದು.

17

ವ್ಯಬಿಚಾರ್ ಕರಾವಾಳಿ ತಯೇಡ

1 ಖ್ವಾತ್ ಕಟೋರಾವ್ವ ಧರಿರಾಮ್ಬುಧೂತೆ ಖ್ವಾತ್‌ಜಣ ದೇವ್‌ದೂತರ್‌ಮ ಏಕ್ಲಣೊ ಐನ್ ಮನ ಬೋಲ್ಯೊ, “ಹಜ್ಜಾ ಆವ್, ಘಣ ಪಾಣಿಪರ್ ಬೆರೀತೆ ಮೋಟಿ ವ್ಯಬಿಚಾರಿಣಿನ ಹುವಾನು ನ್ಯಾವ್‌ನ ತೀರ್ಪ್‌ನ ತುನ ವತಾಳುಸ್.

2 ಪಾಪೇಲು ಸಂಬಂದ್ ಕತೊ ಧರ್ತಿನ ರಾಜವಾಬಿ ಇನಿ ಜೋಡ್ಡ ವ್ಯಬಿಚಾರ್ ಕರ್ಯ್ ಅಜು ಜಗತ್‌ನು ಅದ್ಮಿಖ್ವಾರು ಇನ ವ್ಯಬಿಚಾರ್‌ಕರಿ ದ್ರಾಕ್ಷಿನೊರಖ್ವ್ ಪೀನ್ ಮೈಕಮ್ ಹುಯಿಗು” ಕರಿ ಬೋಲ್ಯೊ.

3 ತದೆ ಇನೆ ದೇವ್ನಿ ಆತ್ಮಾಧಿ ಭರ್ತೆರೊಡ್ಡೋತೆ ಮನ ಪಾಡಿಲೀನ್ ಜಂಗಲೊಮ ಗಯೊ. ಹಿಜ್ಜಾ ಮೆ ಲಲೇಲಾಲ್ ರಂಗ್‌ನ ಜಾನ್ವರ್‌ಪರ್ ಬೆರಿಧೀತೆ ಏಕ್ ತಯೇಡಾನ ದೇಖ್ಲೊ ಯೋ ಜಾನ್ವರ್‌ನು ಆಂಗ್‌ತನ್ ಅಖ್ವು ಗಾಳೆ ದೈವಾನು ನಾಮ್‌ಅಖ್ವು ಭರ್ತೆರೊಡ್ಡು. ಇನ ಖ್ವಾತ್ ಮುಡ್‌ಕ್ಯಾಬಿ ದಖ್ವೆ ಶಿಂಗ್ಡಾಬಿ ಥು.

4 ಯೊ ತಯೇಡ ರಾಯ್‌ಜಾಮಣ್ಣ ರಂಗ್‌ನ ಪೇರ್ವಾಖ್ವೊನಾಬಿ ಲಾಲೊಲಂಗ್ಡಾನ ಫೇರಿರಾಖಿಧಿ; ಖ್ವೊನ್ನುಖ್ವರ್‌ಪ್, ಹಿರಾವ್‌ಧಿ, ಶನ್‌ಗಾರ್ ಹುಯಿರೊಡ್ಡಿ. ಅಜು ಯೊ ಇನು ವ್ಯಬಿಚಾರ್‌ನ್ ಕಚಿಂಡ್‌ಧೀಬಿ ಭರ್ತೆರೊಡ್ಡವನು ಖ್ವೊನ್ನಾನು ಕಟೋರೊ ಧರಿರಾಖಿಧಿ.

5 ಇನ ತಾಳ್ವಪರ್, “ಬಾಬೆಲ್‌ಕರಿ ಜುಮೀನ್‌ಪರ್ ಛಾತೆ ವ್ಯಬಿಚಾರಿಣಿವ್ನಿ ಗಲೀಜ್ ಕಾಮ್‌ಕರಾವಾಳಿ ಆಯ” ಕರಿ ನಾಮ್ ಲೀಖ್ತೆರೊಡ್ಡು.

6 ಯೋ ತಯೇಡ ನೀತಿವಾಳನ ಲ್ಲೋಯಿನ ಅಜು ಯೇಸುನ ಖ್ವಾಜೆ ಸಾಕ್ಷಿದೀನ್ ಮರ್ಯ್‌ಹುಯಾನ ಲ್ಲೋಯಿನ ಪೀನ್ ಕಯೇಪ್ ಹುಯಿರೊಡ್ಡವಾಳಿನ ದೇಖ್ಲೊ ಮೇ ಇನ ದೇಖಿನ್ ಘಣು ಆಶ್ಚರ್ಯ ಹುಯೊ.

7 ಕತೋಬಿ ಯೋ ದೇವ್‌ದೂತನೆ ಮಾರಿ ಬಾರೇಮ ಬೋಲ್ಯೊ ಶಾತ್‌ಕತೊ ತು ಶನ ಆಶ್ಚರ್ಯ ಕರುಕರಸ್? ಯೋ ತಯೇಡಾನಿ

ಬಾರೇಮಾಬಿ, ಇನು ಸವಾರಿ ಕರಾನು ಜಾನ್ವರ್‌ನಿ ಬಾರೇಮಾಬಿ, ಖ್ವಾತ್ ಮುಡ್‌ಕ್ಯಾ ದಖ್ತ್‌ಶಿಂಗ್‌ರ್ದವಾನು ಜಾನ್ವರ್‌ನ ಛಾತೆ ಗಪ್ಲತ್‌ನಿ ವಾತೇನ ಬೋಲಿ ವತಾಳುಸ್.

⁸ ಯೋ ಜಾನ್ವರ್ ಪಹಿಲಿ ಹಲ್ಲ ಜಿವ್ತುಧು. ಕತೋಬಿ ಹಮ್ಮೆ ಘಣು ವಖ್ವತ್ ಜಿವ್ತು ಕೊರ್ದಿಶೇನಿ, ಯೋ ಪಾತಾಳ್ನಿ ಗಧಾರ್‌ಮಾಥು ಲ್ಲಡಿ ಅಯಿನ್ ನಾಶ್‌ಭಣಿ ಒಳ್ಳುಜಾಸ್. ಅಜು ಆ ಜಗತ್ ಉಬ್‌ಜ್ಯುತೆ ತಪ್‌ಥೂಬಿ ಕಿನು ನಾಮ್ ಜಾನ್ವ ಹಕ್‌ವಾಳಾನಿ ಪುಸ್ತಕ್‌ಮ ಲೀಖ್ಪಿರ್ದುಕೊಯ್ಲೀಕಿ, ಇವ್ಣೆ ಯೋ ಜಾನ್ವರ್‌ನ ದೇಖಿನ್ ಆ ಪಹಿಲೆ ಥು, ಹಮ್ಮೆ ಕೊಯ್ಲಿ, ಕತೋಬಿ ಅಜು ಖ್ವಾಮ್ಮೆ ಆವಳು ಛಾಕ್ರಿ ಆಶ್ಚರ್ಯಕರ್ದ್ಯು ಅಜು ಎಕ್‌ಕ್‌ಸ್ ಹಲ್ಲ ಜಿವ್ತು ಉಷೆ. ಹಮ್ಮೆ ಯೋ ಜಾಖ್ವತ್ ವಖ್ವತ್ ಜಿವ್ತು ಕೊರ್ದಿಶೇನಿ, ಕತೋಬಿ ಬಿಭೂಬಿ ಖ್ವಾಮ್ಮೆ ವಳ್ಳು ಆವಸ್.

⁹ ಅನ ಮಾಲುಮ್ ಕರಿಲ್ಯಾವಾನ ಗ್ಯಾನ್‌ಬಿ, ಅಕ್ಯಲ್‌ಬಿ ಹೋಣು. ಯೋ ಖ್ವಾತ್ ಮುಡ್‌ಕ್ಯಾ ಯೋ ತಯೇಡ ಬೆರೀತೆ ಖ್ವಾತ್ ಪಹಾಡ್ ಹುಯಿರ್ದ್ಲಾಸ್. ಯೋ ಖ್ವಾತ್ ರಾಜುಖ್ವಾರು ಹುಯಿರ್ದ್ಲಾಸ್.

¹⁰ ಅತ್ರೇಸ್ ಕಾಹೆತೆ ಇವ್ಣಾಮ ಪಾಚ್ ರಾಜು ಪಡಿಗಯ. ಏಕ್ ರಾಜು ಹಮ್ಮೆ ಚಲವ್‌ಕರಸ್. ಅಜೇಕ್‌ಜಣೊ ಬಿಭೂಬಿ ಆಯೊಕೊಯ್ಲಿ. ಯೋ ಆಯೋತೊ ಥೋಡ ಹಗಾಮ್ ಖಲಿ ರಾಜ್ ಚಲಾವ್‌ಷೆ.

¹¹ ಆನಾಹುಯಿನ್ ಪಹಿಲೆ ರ್ದೀನ್ ಹಮ್ಮೆ ಕೊಂತೆ ಯೋ ಜಾನ್ವರ್ ಯೋಸ್ ಆಟೊ ರಾಜು. ಕತೋಬಿ ಯೋ ಹುಯಿರ್ದ್ಲೊತೆ ಯೋ ಖ್ವಾತ್ ರಾಜಾವ್ತು ಎಕ್‌ಜಣೊ ಹುಯಿರ್ದ್ಲೊಸ್, ಯೋ ನಾಶ್‌ಭಣಿ ಜಾಶೆ.

¹² ತುಮೆ ದೇಖ್ಯಾತೆ ಯೋ ದಖ್ತ್‌ಶಿಂಗ್‌ಖ್ವಾರು ಬಿಭೂಬಿ ರಾಜ್ ಲೀರಾಖ್ಯುಕೊಂತೆ ದಖ್ತ್‌ರಾಜುವ್‌ಖ್ವಾರು ಹುಯಿರಾಸ್. ಕತೋಬಿ ಯೋ ಖ್ವಾರು ಜಾನ್ವರ್‌ನಿ ಜೋಡ್ತು ಏಕ್ ಘಂಟಾಲಗು ರಾಜ್ಯ ಚಲಾವನ ಇವ್ಣೆ ಅದಿಕಾರ್ ಲಿಶೆ.

¹³ ಇವ್ಣೆ ಎಕ್‌ಕ್‌ಸ್ ದಿಲ್‌ವಾಳ ಹುಯಿನ್ ಇವ್ಣಿ ತಾಖತ್ನಾಬಿ ಅದಿಕಾರ್‌ನ ಜಾನ್ವರ್‌ನ ದಿಶೆ.

¹⁴ ಇವ್ಣೆ ಮೇಂಡಾನು ಚೆಲ್ಕುಹುಯಿರ್ದವಾಳನ ವಿರೋದ್ಧಿ ಜಂಗ್

ಭೀಡ್‌ಷೆ. ಕತೋಬಿ ಯೋ ಪ್ರಭುನೊ ಪ್ರಭು ರಾಜಾನೊ ರಾಜಾಬಿ ಹುಯಿರ್ದೆಷ್ಟೇತೆ ಇನಖ್ವಾಜೆ ಮೇಂಡಾನು ಚೆಲ್ಕು ಇವ್ಣೇಥಿ ಜೈಕಾರ್ ಉಷೆ ಅಜ್ಜು ದೇವ್ನೆ ಬುಲೈರಾವವಳುಬಿ ದೇವ್ನೆ ಘೋಣಿರಾಖ್ಯೋತೆಬಿ, ಅಜ್ಜು ವಿಶ್ವಾಸ್‌ವಾಳ ಹುಯಿರ್ದೆಷ್ಟೇತೆ ಇನವಾಳು ಮೇಂಡಾನ ಚೆಲ್ಕಾನ ಜೋಡ್ಡ ವಾಟೊವಾಳು ಹುಯಿರ್ದೆಷ್ಟೆ.

15 ಬಿಘೂಬಿ ಯೊ ದೇವ್‌ದೂತನೆ ಮನ ಶಾತ್ ಬೋಲೊಕತೊ, ಯೋ ವ್ಯಬಿಚಾರಿಣಿ ಬೆರಿಥೀತೆ ಪಾಣಿನ ತುನೆ ದೆಖ್ಯೋನಿ, ಯೊ ಅಖ್ಪು ಜಗ್‌ಜಾತ್ತ್ ಅದಿವ್‌ನ ಟೋಳ್ಳ ದೇಖ್‌ವ್‌ನ, ಬೋಲಿಯೇವ್‌ನ ವತಾಳಸ್.

16 ಆ ನಾಹುಯಿನ್ ತುನೆ ದೇಖ್ಯೋತೆ ದಖ್ತ್ ಶಿಂಗ್ಡಾಖ್ವಾರು ಅಜ್ಜು ಜಾನ್ವರ್‌ನ ದೇಖ್ಯೋನಿ? ಯೋ ಖ್ವಾರುಸ್ ವ್ಯಬಿಚಾರಿಣಿನ ವಹೇರ್ ಕರೀನ್, ಇನ ಖ್ವದ್‌ದರ್‌ಕೊಂತೆ ರ್ವಾವಾಳಿನಿ ಘೋಣಿಬಿ ಲುಂಗ್ಡು ನಾರ್ವಾಳಿನಿ ಘೋಣಿಬಿ ಕರೀನ್ ಇನಿ ಬೋಟಿನ ಖೈನ್, ಹೈರಿತೆನ ಆಗ್‌ಮ ಬಾಳಿನಾಕ್‌ಷೆ.

17 ಶನಕತೊ ದೇವ್ನೆ ಇನಿ ವಚನ್ ಭಲಾವ್ಣ ಕರೀಬಿ, ಇನಿ ಮರ್ಜಿನ್ ಇವ್ಣೆ ಭಲಾವನಿ ಘೋಣಿಬಿ ಎಕ್ಕ್‌ಸ್ ದಿಲ್‌ವಾಳಹುಯಿನ್ ಇವ್ಣಿ ಅದಿಕಾರ್‌ನ ಜಾನ್ವರ್‌ನ ದೈವಾನಾಬಿ ಯೋ ಅಖ್ವಾನ ಮನ್‌ಮ ಮಿಠಾಣೊಡೊ.

18 “ಅಜ್ಜು ತುನೆ ಯೊ ತಯೇಡಾನಿ ಘೋಣಿ ದೇಖ್ಯೋತೆ ಆ ಮೋಟಿ ನಂಗ್ರಿ ಹುಯಿರ್ದೆಷ್ಟೆ ಯೊ ಭಮೀನ್ ರಾಜಾವ್‌ನ ಭಲಾವನ ಅದಿಕಾರ್ ಲೀರಾಖಿಸ್”.

18

ಬಾಬೆಲ್ ರಡ್ಡಿಜಾಶೆ

1 ಆ ಅಖ್ಪುಹುವಾನ ವಾರ್ ವಿಶೇಷ್ ಅದಿಕಾರ್‌ನೊ ಬಿಜೇಕ್ ದೇವ್‌ನೊ ದೂತ ಸೊರ್ಗಾಡು ಉತ್ರಿನ್ ಆವಾನು ಮೇ ದೇಖ್ಯೊ ಇನಿ ಉಜಾಖ್‌ನಿ ಶಕಧಿ ಜಮೀನ್ ಉಜಾಳು ಮಳ್ಳು.

² ಇನೆ ಜೋರಾನಿ ಅವಾಜ್‌ಧಿ ಚಿಕರ್ತೊಹುಯಿನ್, “ರಡ್ಕಿಗೈ, ರಡ್ಕಿಗೈ, ಬಾಬೆಲ್‌ಕರಿ ಮೋಟಿ ನಂಗ್ರಿ ರಡ್ಕಿಗೈ! ಯೊ ಹುಯಿರ್ದ್ವೀತೆ ಭೂತನ್ ರಡ್ವಾನಿ ಝಗೋಬಿ, ಖರಾಬ್ ಆತ್ಮಾವ್‌ನಾಬಿ, ಮೈಲು ಅಙ್ಕು ಹರೇಕ್ ಥರಾನು ಗಲೀಜ್ ಜಿನಾವರ್‌ನಾಬಿ ಮ್ಹಾಳೊ ಹುಯಿರ್ದ್ವೀಧಿ.

³ ಅಖ್ವಾಸ್ ದೇಖ್ವೆನು ತಾಖತ್ತಿ ಇನು ವ್ಯಬಿಚಾರ್ ಕರಿ ಬೋಲಾನು ಖಾರಕ್ಕು ದ್ರಾಕ್ಷಿನ ರಖ್ವೆನ ಪೀದು. ಜಮೀನ್ನ್ ರಾಙ್‌ವಾಖ್ವಾರು ಇನಿಜೋಡೆ ವ್ಯಬಿಚಾರ್ ಕರ್ಯ್. ಇನು ಭೋಗ್‌ನು ಖುಷಿಧಿ ಜಮೀನ್ನ್ ಬೇಪಾರಿ ಖ್ವಾರು ಶೌಕಾರ್ ಹುಯಿಗು ಕರಿ ಬೋಲೊ.

⁴ ಸೊರ್ಗಾಥು ಬೋಲಾನು ಅಜೇಕ್ ಅವಾಜ್‌ನ ಮೆ ಖ್ವಮ್‌ಜ್ಯೊ, ಮಾರ ಅದ್ಮಿವೊ ಯೊ ನಂಗ್ರಿನ ಮ್ಹೇಲಿನ್ ಫಾದರ್ ಆವೊ, ಶನಕತೊ ಇನ ಪಾಪ್‌ಮ ವಾಟೊ ಕೊಲುಷೂನಿ. ಇನ ಹುವಾನು ನಿಶತ್ ತುಮುನ ಕೊಲುಷೇನಿ.

⁵ ಇನು ಪಾಪ್‌ಖ್ವಾರು ಏಕ್‌ಧಿಏಕ್ ಮಳಿನ್ ಆಕಾಶ್ ಛೀಮಯೆತ್ರೆ ಊಙ್ಕು ಹುಯಿರ್ದ್ವೀತ್. ದೇವ್ಣೆ ಇನು ಖರಾಬ್‌ಕಾಮ್ ಖ್ವಾರನ ಖ್ವಿಯಾಲ್ ಕರಿರಾಖೊಸ್.

⁶ ಯೋ ನಂಗ್ರಿ ಬಿಭಾವ್ ದಿದೀತೆ ತಿಮ್ಮಸ್ ತುಮೇಬಿ ಇನ ಪಾಳ್ತು ದೆವೊ. ಇನ ಕಾಮ್‌ಖ್ವಾರಾನ ಬರಬ್ಬರ್‌ಧಿ ಇನ ಬೇಪಟ್ ದೆವೊ. ಇನೆ ಕಲ್ಟೆದಿದೀತೆ ರಾಲ್ಹಾಮ ಇನ ಬೇಪಟ್ ಕಲ್ಟೆನ್ ದೆವೊ.

⁷ ಯೋ ಇನುಯೋಸ್ ಖ್ವಿರೈಲಿನ್ ಭೋಗ್‌ನು ಜಿವ್ಣು ಕರೀಕಿ ಎತ್ರೇಸ್ ತುಮೆ ಇನ ಖ್ವಿತಾಪ್ಪಿನ ದುಖ್‌ನ ಇನಾಪರ್ ಲ್ಯಾವೊ. ಕತೋಬಿ ಇನ ದಿಲ್ಮ ಕರಿಲಿದಿಕಿ ಮೇ ರಾಣಿ ಹುಯಿನ್ ಬೇರಿಸ್, ಮೇ ಮುಂಡಚ್ಚಿ ಕಾಹೆ, ದುಖ್‌ನ ಕದೇಬಿ ಮೆ ದೇಖಿಷಸ್ ಕೊಯ್ನಿಕರಿ ಇನುಯೋಸ್ ಬೋಲಿಲಿದಿ.

⁸ ಇನಖ್ವಾಜೆ ಖ್ವಿತಾಪ್ಪಿ ಮರಣ್, ಮೋಟೊ ರೋಗ್, ಎಕ್ಸ್‌ಸ್ ದನ್ತ ಆವಾಶೆ. ಇನ ತೀರ್ಪ್ ದ್ಯವಾಳೊ ಪ್ರಭು ದೇವ್ ಶಕತ್‌ವಾಳೊ ಹುಯಿರ್ದ್ವೀಸ್ತೆ ಇನಖ್ವಾಜೆ ಯೊ ಹೈರ್ದ್ವೀತೆ ಆಗ್‌ಧಿ ನಾಶ್ ಹುಯಿಜಾಶೆ

⁹ ಇನಿ ಜೋಡೆ ವ್ಯಬಿಚಾರ್ ಪಾಪ್ ಕರೀನ್ ಇನ ವೈಭೋಗ್‌ಮ ವಾಟೊ ಹುಯಿರ್ದ್ವೀತೆ ಜಮೀನ್ನ್ ರಾಙ್‌ವಾಖ್ವಾರು ಯೊ ಬಳಾನು ಶೇಙ್‌ಧಿ

ಉಪ್ಪರ್ ಲ್ಲಡಾನ ಧುವ್ವಾನ ದೇಕ್‌ಷೆ. ಯೊ ಮರಾನು ದೇಖಿನ್ ರದನ್ ರೆಂಟ್ಲೆನ್ಯಾಬಿ ದುಖ್ ಕರ್ತೆ.

10 ಯೋ ಹಾಲ್ವ ದೇಖಿನ್ ರಾಜವ್‌ಖ್ವಾರು ಡರಿನ್ ದೂರ್ ಭೀರಿನ್ “ಅಲಿ ಮೋಟಿ ನಂಗ್ರಿ ಬಾಬೆಲ್ ಖ್ವಯೇರ್ ತುನ ದೆವಾಯುತೆ ತೀರ್ಪ್ ಎಕ್ಯಸ್ ಘಡೀಮ ಅಯಿಗೂನಿ” ಕರಿ ಪಸ್ತಾವ್‌ಷೆ.

11 ಆ ನಾಹುಯಿನ್ ಧರ್ತಿನ ಬೆಪಾರಿಖ್ವಾರ್ ಬಾಬೆಲ್‌ನಖ್ವಾಜಿ ದುಖ್‌ಧಿ ರದನ್ ಕರೀನ್,

12 ಅವ್ಲೆ ಖ್ವೊನ್ನು, ರೂಪು, ಹೀರೊ, ಮುತ್, ಕೋರು ಲುಂಗ್ವು, ರಾಯಿಜಾಮಣ್ಣ ರಂಗ್ವು ಲುಂಗ್ವು, ರೇಖ್ವಮ್‌ನುಲುಂಗ್ವು ಅಜ್ಜು ಲಲೇಲಾಲ್ ಪೇರ್ವಾಖ್ವನಾಬಿ ಅಖ್ವೀಸ್ ಧರಾನು ಲಾಕ್ವಾನ್ ರಾಳ್ವು, ಅಜ್ಜು ಹತ್ತಿನದಾತ್ವು ಜಿನಖ್ವ್ ಘಣ ಮೋಲ್ವುರ್ಯಾಡ್, ತಾಂಬು, ಲ್ಲೋಡು, ಅಮೃತಶಿಲೆ ವೇಚುಕರ್ತುಧು.

13 ಅಜ್ಜು ಲೋಂಗ್‌ಪಟು, ಮಖ್ವಾಲೊ, ಖ್ವಾಲರಕ್ವೊ, ರಕ್ತಬೋಳ, ವಾನುತೇಲ್, ದ್ರಾಕ್ಷಿನೊ ರಖ್ವ್ ತೇಲ್, ಕವ್‌ಳೊ ಆಟೊ, ಘವ್, ಡಾಂಡು, ಮೇಂಡು, ಘೋಡೊ, ರಥ್, ಗುಲಾಮ್, ಅದ್ವಿಜಾನ್ ಅಖ್ವು, ಆ ಖ್ವಾರು ಅಪ್ಪ ಜಿನಖ್ವ್‌ನಲ್ಯಾವಳು ಕೊಯ್ತಿಕರಿ ಬೋಲ್ತುಹುಯಿನ್ ದುಖ್ ಕರ್ತೆ.

14 “ತುನೆ ತರಾಖ್ವೊತೆ ಫಲ್‌ಖ್ವಾರು ತುನ ಮ್ಹೇಲಿನ್ ಚಲಿಗಯು. ತಾರು ಅಖ್ವೊಸ್ ವೈಭೋಗ್‌ಖ್ವಾರು ಬಿಜ್ಜು ಖುಷೀನ ಜಿವ್ವಾನಿ ಶನ್‌ಗಾರ್ ಖ್ವಾರು ತಾರೇಧಿ ನಾಶ್‌ಹುಯಿಗು. ಯೋ ತುನ ಪಾಳ್ವು ಕೆದೇಬಿ ಮಳ್‌ಶೇಸ್ ಕೊಯ್ತು”.

15 ಯೋ ಖ್ವಾರು ಜಿನಖ್ವ್‌ವೇಚಿನ್ ಇನೇಧಿ ಶೌಕಾರ್ ಹುಯೂಧೂತೆ ಬೇಪಾರಿ ಖ್ವಾರು ದೂರ್‌ಮ ಭೀರಿನ್ ಯೊ ಹುಯಿರಿತೆನ ಅಜ್ಜಾನಿ ಕುರಲ್ಟಾಟಿನ ಖ್ವಾಜಿ ಡರಿನ್ ದುಖ್‌ಧಿ ರದನ್ಯ ಕರ್ತೊಹುಯಿನ್;

16 ‘ಹಾಯ್! ಹಾಯ್! ಮೋಟಿ ನಂಗ್ರಿ ತುನ ಕೆಧ್ರಾನಿ ಖರಾಬ್ ಹಾಲತ್! ರಾಯ್‌ಜಾಮಣ್ಣ ರಂಗ್ವು ಅಜ್ಜು ಲಲೇಲಾಲ್ ರಂಗ್ವು ಪೇರ್ವಾಖ್ವ್‌ನ ಫೇರಿಲಿನ್, ಖ್ವೊನ್ನು ಹೀರೊ, ಮುತ್, ಆ ಅಖ್ವಾಜಿ ಶನ್‌ಗಾರ್ ಹುಯಿರಕ್ವೊತೆ ಇನ ಕಿಮ್ಮಿ ಖರಾಬ್ ಹಾಲ್ ಚಾಲಿಗಿ.

17 ಎತ್ತು ಧನ್‌ದಾಲತ್‌ಬಿ ಎಕ್ಕ್‌ಸ್ ಘಡೀಮ ನಾಶ್ ಹುಯಿಗೀನಿ ಕರಿ ಪಶ್ತಾವ್‌ಷೆ. ಅತ್ರೇಸ್ ಕಾಹೆತೆ ಭಹಾಜ್‌ನೊ ಮಾಲಿಕ್ ಖ್ವಾರು ಅಜ್ಜು ಇನಾಮ ಜಾವಾಳುಬಿ, ಚಲಾವಾಳುಬಿ, ದರ್‌ಯಾವ್‌ಮ ರಾಬಿನ್ ಜಿವ್ಪು ಕರವಾಳು ಖ್ವಾರುಸ್ ದೂರ್ ಭೀರಿನ್,

18 ಯೊ ಹುಯಿರ್ದೀತೆ ಭುಂಜಾವನು ಧುವ್ವಾನ ದೇಖಿನ್ ಆ ಮೋಟಿ ನಂಗ್ರಿನ ಸಮಾನ್ ಖಿವು? ಕರಿ ಅವಾಗ್‌ಮಾಂಡ್‌ಷೆ.

19 ತದೆ ಇವ್ಣೆ ಮಾಥಪರ್ ಮಾಟಿನ ರಂಚಿಲಿನ್ ಚಿಕರ್ತುಹುಯಿನ್, ಹಾಯ್, ಹಾಯ್, ದರ್‌ಯಾವ್‌ಪರ್ ಜಾವಾಳು ಭಹಾಜ್‌ವಾಳು ಅಖ್ವಾಬಿ ಇನ ಮೋಲ್ನು ಧನ್‌ದಾಲತ್‌ಥೀಸ್ ಶೌಕಾರ್ ಹುಯುಥೂನಿ, ಆ ಹೈರ್ದೀತೆ ಎಕ್ಕ್‌ಸ್ ಘಡೀಮ ನಾಶ್ ಹುಯ್ಗೀನಿ' ಕರಿ ದುಖ್‌ಥಿ ರದನ್‌ಕರ್ದು.

20 ಸೊರ್ಗಾಮ ರ್ದವಾಳ ಅದ್ಮಿವೊ, ಅಪೊಸ್ತಲ ಖ್ವಾರಾವೊ, ಪ್ರವಾದಿಖ್ವಾರವೊ, ಯೊ ಹುಯಿರ್ದೀತೆನ ಇನಖ್ವಾಜೆ ಖುಷಿ ಕರೊ. ಶನಕತೊ ಆ ಹೈರಿತೆ ತುಮುನ ಠಗಾಯ್ತೆ ಇನಖ್ವಾಜೆ ದೇವ್ಣೆ ಇನ ಬರೋಬರ್‌ಥೀಸ್ ತೀರ್ಪ್ ಕರ್ದೊ.

21 ತದೆ ಘಣಿ ಶಕತ್ತ್ ಏಕ್ ದೇವ್‌ದೂತನೆ ದಳಾನಿ ಘಟ್ಟಿನಿತ್ತರಾನು ಏಕ್ ಮೋಟಿ ಬಂಡಾನ ಪಾಡಿಲೀನ್ ದರ್‌ಯಾವ್‌ಮ ಫೇಕಿನ್ ಅಮ್‌ಬೋಲ್ಯೊ; ಮೋಟಿ ನಂಗ್ರೀನು ಬಾಬೆಲ್ ಆ ವದೇಖ್‌ಥಿ ಫೇಕೈಕಿ ಬಿಜ್ಜು ಕೆದೇಬಿ ದೆಖಾವ್‌ಶೇಸ್ ಕೊಯ್ತೆ.

22 ಬಾಬೆಲ್ ತಾರಾಮ ಖ್ವಾರಂಗ ವಾಳುಬಿ, ವಾಜವಜಂತ್ರಿವಾಳುಬಿ, ವಾಖ್ವೊಳಿ ವಜಾಡವಾಳುಬಿ, ತುತ್ತೂರಿವಾಳು ಆ ಅಖ್ವಾನು ಅವಾಜ್ ಬಿಜ್ಜು ಕೆದೇಬಿ ಖ್ವಮಜ್‌ಪಡ್‌ಶೆ ಕೊಯ್ತೆ. ಖಿವೀಬಿ ಥರಾನು ಬೇಪಾರಿಬಿ ತಾರಮ ಬಿಜ್ಜು ಕೆದೇಬಿ ದೆಖಾವ್‌ಶೆ ಕೊಯ್ತೆ. ದಳಾನಿ ಘಟ್ಟೀನು ಅವಾಜ್ ತಾರಮ ಅಜ್ಜು ಕೆದೇಬಿ ಕೊ ಖ್ವಮಜ್‌ಪಡ್‌ಶೇನಿ.

23 ದೀವಾನು ಉಜಾಳು ತಾರಮ ಅಜ್ಜು ಕೆದೇಬಿ ಉಜಾಖ್ವೊ ದಿಶೆಕೊಯ್ತೆ. ವ್ಯತುಲ್ಯೊ ವ್ಯತುಲ್ಡೀನು ಗಳು ತಾರಮ ಅಜ್ಜು ಕೆದೇಬಿ ಖ್ವಮಜ್‌ಮ ಕೊಆವ್‌ಶೇನಿ. ತಾರು ಬೇಪಾರಿ ಖ್ವಾರು ಜಮೀನ್‌ಪರ್

ದೌಲತ್‌ವಾಳು ಹುಯಿರ್ದೊನಿ. ತಾರಿ ಜ್ಹಾದಾನಿ ಶಕಧಿ ಅಖ್ಬಾನ್ ದೇಖ್ವಾಳು ಶೈಗೈಗಯು.

24 ಪ್ರವಾದಿಖ್ವಾರಾನು, ದೇವ್ ಅದ್ಮಿವಾನು ಲೋಯಿ ಅಜ್ಜು ಜಮೀನ್‌ಪರ್ ಮರೈಗಯ ಹುಯಾನು ಲೋಯಿಬಿ ಇನಮಾಸ್ ಮಳ್ಳುನಿ ಕರಿ ಬೋಲ್ಯೊ.

19

1 ಆ ಹುಯಿಜ್ಹಾವನ ಪರ್ ಸೊರ್ಗಾಮ ಮೋಟಿಬೀಡ್‌ಣು ಟೊಕಾನಿತರ ಏಕ್ ಮೋಟಿ ಅವಾಜ್ ಖ್ವಮ್‌ಜೊ. ಇವ್ಣೆ “ಹಲ್ಲೆಲೂಯಿ! ಆಖ್ವೊರೋಬಿ, ಮಹಿಮೆಬಿ, ಶಕತ್‌ಬಿ ಹಮಾರ ದೇವ್‌ಮ ಛಾ.

2 ಇನು ನ್ಯಾವಾನು ತೀರ್ಪ್‌ಖ್ವಾರು ಖ್ವಾಚುಬಿ ನ್ಯಾವುಬಿ ಹುಯಿರುಸ್. ಅಪ್ಪ ದೇವ್ ವ್ಯಬಿಚಾರ್‌ನಿ ತಯೇಡಾನ ದಂಡನೆದೊ, ಯೋ ಮೋಟಿ ವ್ಯಬಿಚಾರ್‌ನಿ ಇನ ಪಾಪೇಲ ಕಾಮ್‌ಥಿ ಧರ್ತಿನ್ ಗಂಧು ಕರುಕರ್ತಿಥಿ. ಆ ಹೈರಿತೆ ಇನ ಸೇವಕರ್‌ನ ಮರೈನಾಖಿ ದಿದೀತೆ ಇನಖ್ವಾಜೆ ದೇವ್‌ಯಿನ ಬದಲ್ ತೀರ್ಪ್‌ದಿದೊ”. ಕರಿ ಬೋಲ್ಯೊಹುಯಿನ್,

3 ಭೇನೆಹಲ್ಲ, ಹಲ್ಲೆಲೂಯ ಕರಿ ಘಣು ಚಿಕ್ರಿನ್ ಯೋ ಬಳುಕರಸ್ತೆ ಧುವೊ ಜಗ್‌ಜಮಾನಮಾಬಿ ಉಪ್ಪರ್ ಅವುಸ್‌ಕರ್‌ಷೆ ಕರಿ ಬೋಲ್ಯು.

4 ತದೆ ಸಿಂಹಾಸನ್‌ಪರ್ ಬೆರೂತೆ ದೇವ್ ಚಾರ್ ಉಪ್ಪರ್‌ವೀಖ್ವೊ ಜಣು ಶಾಣೂಬಿ, ಯೋ ಚಾರ್ ಜೀವಿಬಿ ಆಡ್‌ಪಡೆನ್ ಆರಾದನೆ ಕರ್ತುಹುಯಿನ್, ಆಮೆನ್, ಹಲ್ಲೆಲೂಯಕರಿ ಬೋಲ್ಯು.

ಮೇಂಡಾನ ಚೆಲ್ಕಾನು ವ್ಯಹಾನು ಮಿರ್ಝಾವಾನ್

5 ಇನಪಾರ್ ಸಿಂಹಾಸನ್ ಭಣೇಥು ಏಕ್ ಟೆಹುಕೊ ಆಯು. ಯೋ ಅವಾಜ್‌ನೆ, “ಅಪ್ಪ ದೇವ್ ಚಾಕ್ರಿಕರಾವಾಳ ಅದ್ಮಿವೊ ದೇವ್ ಧನ್ಯವಾದ್ ಕರಲ್ಯು ಇನೇಥಿ ಡರಾವಾಳ ನ್ಹಾನ, ಮೋಟಾವೊ ಇನ ಧನ್ಯವಾದ್ ಕರೊ”. ಕರಿ ಬೋಲ್ಯು.

6 ಇನಾವಾರ್ ಮನ ಬಿಜೀಕ್ ಅವಾಜ್ ಖ್ವಮಜ್‌ಪಡ್ಕು ಯೋ ಘಣುಮೋಟು ಅದ್ವಿನ ಭೀಡ್‌ಣು ಅವಾಜ್ ಮೋಟು ಪಾಣಿನು ಕಹಾರ್‌ನಿ ತರಾಬಿ ಜ್ಞಾಖ್ತ್ ಘಲಾರನ ಅವಾಜ್‌ನಿತರ ಧೂತೆ ಏಕ್ ಅವಾಜ್‌ನ ಖ್ವಮ್‌ಜೊ ಯೋ, ಹಲ್ಲೆಲೂಯ, ಮಹಾನ್ ಶಕತ್‌ವಾಳೊ ದೇವ್ ಹುಯಿರೋತೆ ಅಪ್ಲೊ ಪ್ರಭು ಆಳ್‌ಷೆ.

7 ಮೇಂಡಾನು ಚೆಲ್ಕು ಹುಯಿರ್ದವಾಳನು ವ್ಯಹಾನಿ ವಖ್ತ್ ಐಗಿಕರಿ ಶಂತೋಖ್ತ್ ಕರಿಯೆ; ಖುಷಿ ಕರಿಯೆ ಇನ ಮಹಿಮೆಕರಿಯೆ, ಶನಕತೊ ಇನ ವ್ಯಹಾ ಕರಾವಳಿ ಕವಾರಿ ಇನುಯೋಸ್ ಖ್ವಾರಿರಾಖಿಸ್‌ಕರಿ ಬೋಲ್ಕು.

8 ಉಜ್ಜಾಖ್ತ್‌ನುಬಿ ಶುದ್ಧಬಿ ಕವ್‌ಳು ಕೋರುಲುಂಗ್ಡು ಫೇರಾನಯಿನ ವಾರ್‌ಖ್ಲೊ ಮಳ್ಳು. ಯೋ ಕೋರುಲುಂಗ್ಡು ಕತೊ ದೇವ್ನು ಅದ್ವಿವ್‌ನು ನ್ಯಾವ್‌ನು ಕಾಮ್‌ಖ್ವಾರುಸ್ ಹುಯಿರುಸ್.

9 ಅತ್ರೇಸ್ ಕಾಹೆತೆ ಇನೆ ಮಾರೇಥಿ ವಾತೆ ಬೋಲ್ತೊಹುಯಿನ್ ಮೇಂಡಾನು ಚೆಲ್ಕು ಹುಯಿರ್ದವಾಳನ ವ್ಯಹಾನ ಮಿರ್ಚುವಾನ್‌ಮ ಬುಲೈರ್ದವಳು ಧನ್ಯರ್ ಕರಿ ಬೋಲಾನು ಲೀಖ್‌ಕರಿ ಬೋಲಿನ್, “ಆ ಖ್ವಾರಿವಾತೆ ದೇವ್ನು ಖ್ವಾಚು ವಚನ್ ಹುಯಿರುಸ್.” ಕರಿ ಬೋಲ್ತೊ.

10 ತದೆ ಮೇ ಇನ ಆರಾದನೆ ಕರ್ನುಕರಿ ಇನ ಪಗ್‌ಪರ್ ಅಡ್‌ಪಡ್ಲೊ ಕತೋಬಿ ದೇವ್ನು ದೂತಾನೆ, ಮನ ಅಮ್ ಆರಾದನೆ ನಕೊಕರ್. ಯೇಸುನ ಖ್ವಾಚನ ಲೀರಾಖ್ಯಾಸ್ತೆ ತಾರಿನಿತರಾಬಿ ತಾರ ಭೈಯೇನಿತರಬಿ ಮೇಬಿ ಏಕ್ ಭಾಕ್ರಿವಾಳೊ. ಇನಖ್ವಾಜೆ ದೇವ್ನು ಆರಾದನೆಕರ್, ಯೇಸುನಿ ಸಾಕ್ಷಿಸ್ ಪ್ರವಾದನೆನು ಆತ್ಮಕರಿ ಬೋಲ್ತೊ.

ಧೋಳ ಘೋಡಾಪರ್ ಏಕ್ ಸವಾರಿ

11 ಇನಪಾರ್ ಪರ್‌ಲೋಕ್ ನಿಕ್ಕಿರ್ದವನು ಮೇ ದೇಖ್ಲೊ ತದೆ ದೇಕ್, ಧೋಳೊ ಘೋಡೊ ಮನ ದೆಖಾಯು. ಇನಾಪರ್ ಬೆರೊರ್ದವಾಳಾನ ವಿಶ್ವಾಸ್‌ವಾಳೊ, ಖ್ವಾಚೊಕರಿ ನಾಮ್. ಯೊ ನೀತಿಧಿ ನ್ಯಾವ್‌ನ ಫೇಡವಾಳೊ, ನೀತಿಧಿ ಜಂಗ್‌ಭೇಡವಾಳೊ ಹುಯಿರೊಸ್.

12 ಇನ ಭೇ ಡೋಳ ಆಗ್‌ನಿ ಝಲ್‌ಪಟ್‌ನಿತರ ಛಾ. ಇನ ಮಾಥಾಪರ್ ಕೈಯೆಕ್ಕಿ ಕಿರೀಟ್‌ಖ್ವಾರು ಛಾ, ಇನ ಏಕ್ ನಾಮ್ ಲೀಖೈದೆವೈರ್ದ್ವಾಸ್, ಯೊ ಇನ ಪಣ್ಣಿ ಬಿಜು ಕಿನಾಬಿ ಮಾಲುಮ್ ಕೊರಿಷೇನಿ.

13 ಯೋ ಲ್ಹೋಯಿಮ ಭಿಗೈರ್ದ್ವಾನು ಲುಂಗ್ಡಾನ ಫೇರಿರಾಖ್ಯೊಥೊ. ಇನು ನಾಮ್ ದೇವ್ನು ವಚನ್‌ಕರಿ.

14 ಸೊರ್ಗಾನ್ ಸಿಪಾಯಿಖ್ವಾರು ಧೋಳ ಫೋಡಾಪರ್ ಬೇಶಿನ್ ಇನ ಪೀರೆ ವಳ್ಳಾವ್ತು. ಇವ್ಣೆ ಶುದ್ಧ ಪೇರ್‌ವಾಖ್ವಾಬಿ, ಖ್ವಾಜ್‌ನುಥೂತೆ ಕವಾಳು ಕೋರುಲುಂಗ್ಡು ಫೇರಿರಾಖ್ಯು.

15 ಜಗ್‌ಜಾತ್ ಕತ್ರಾನಖ್ವಾಜೆ ಇನ ಮ್ಹೋಡೇಮ್ನು ಚಾಲ್ತಿ ತಲ್ವಾರ್ ನಿಕ್ಕಿಆವಾಸ್. ಯೊ ಇವ್ಣುನ ಲ್ಹೋಡಾನ ಡಂಡೇಥಿ ಆಳ್‌ಷೆ. ಸರ್ವಶಕ್ತನೊ ಹುಯಿರೋತೆ ದೇವ್ನಿ ಘಣಿ ಮೋಟಿ ಖೀಜ್‌ಕರಿ ಬೋಲಾನ ದ್ರಾಕ್ಷಿನ ಬಾನೇಮ ರ್ದ್ವಾಳನ ಮುಂದ್ಲಿನಾಕ್ಷೆ.

16 ಇನ ಲುಂಗ್ಡಾಪರ್‌ಬಿ, ಟಾಂಗ್‌ಪರ್‌ಬಿ, “ರಾಝಾನೊ ರಾಝಾಬಿ ಪ್ರಭುನೊ ಪ್ರಭು” ಕರಿ ನಾಮ್ ಲಿಖೈರ್ದ್ವಾಸ್.

17 ಇನಪಾರ್ ಏಕ್ ದೇವ್‌ದೂತನೆ ಚಾಂದ್‌ಪರ್ ಭಿಯುರ್ದ್ವಾನು ದೇಖ್ಯೊ. ಯೊ ಊಚ್ ಗಳೇಥಿ ಚಿಕ್ರಿನ್ ಆಕಾಶ್‌ಮ ಉಡಾವಳ ಅಖ್ವಾಸ್ ಜಿನಾವರ್‌ನ, ಆವೊ, “ದೇವ್ ಕರವಾಕರಾಸ್ತೆ ಮೋಟಿ ಮಿರ್ಘಾವಾನ್ನ್ ಖಾಣನ ಮಳಿನ್ ಖಾವೊಕರಿ ಬೋಲುಕರ್ತೊಥೊ.

18 ರಾಝವ್ಣಿ ಬೋಟಿನಾಬಿ, ಶಿಪಾಯ್ ಮೋಟಾನಿ ಬೋಟಿನಾಬಿ, ಅಜ್ಜು ಶಿಪಾಯ್ ಬೋಟೀನ, ಫೋಡಾವ್ಣಿ ಬೋಟೀನ, ಫೋಡಾನು ಸವಾರಿವ್ಣು ಬೋಟೀನ, ಛುಟ್ಕಾರ್ ಹುಯಿರ್ದ್ವಾಳನು, ಗುಲಾಮ್‌ಖ್ವಾರನು, ನ್ಹಾನಾವ್ಣು ಅಜ್ಜು ಮೋಟಾವ್ಣು ಬೋಟೀನ ಖಾವನ ಆವೊ” ಕರಿ ಬೋಲ್ಯೊ.

19 ತದೆ ಯೊ ಜಾನ್ವರ್‌ಬಿ, ಜಮೀನ್ನ್ ರಾಝವ್‌ಬಿ, ಇವ್ಣು ಶಿಪಾಯಿಖ್ವಾರೊಬಿ ಯೊ ಫೋಡಾಪರ್ ಬೆರೊರ್ದ್ವಾಳನಪರ್ ಅಜ್ಜು ಇನ ಶಿಪಾಯ್ ಉಪ್ಪರ್‌ಬಿ ಜಂಗ್ ಭೀಡಾನಖ್ವಾಜೆ ಮಳಿನ್ ಐರ್ದ್ವಾನು ದೇಖ್ಯೊ.

20 ತದೆ ಯೊ ಜಾನ್ವರ್‌ನು ಧರಿಲಿದು. ಅತ್ರೇಸ್ ಕಾಹೆತೆ ಜಾನ್ವರ್ ಭಣೀಧು ಅದ್ಭುತ್ ಕಾಮ್‌ಖಾರು ಕರೀನ್, ಜಾನ್ವರ್‌ನು ಖ್ವಣೇದ್ ನಖಾಯಹುಯನ, ಅಜ್ಜು ಇನ ಮೂರತ್ಯ ಆರಾದನೆ ಕರವಾಳನ ಪೊಖ್ವಲ್ಟೆರಾಖ್ಯೊಥೊತೆ ಯೊ ಝೂಟುಪ್ರವಾದಿಬಿ ಇನ ಜೋಡೆ ಧರೈಗಯೊ. ಯೋ ಭೇಜಣಾನ ಜಾನ್ವಖ್ವಮೇದ್ ರಂಜಕ್‌ಧಿ ಬಳಾನು ಆಗ್ಸ ತಲಾವ್ತು ಫೇಕ್ಸು.

21 ಇವ್ಲು ಶಿಪಾಯಿಖ್ವಾರನ, ಫೋಡಾಪರ್ ಬೆರೊರತ್ವಾಳಾನ ಬಾಕೇಧಿ ಆಯೂತೆ ಬೇಮ್ವೊಡಾನಿ ತಲ್ವಾರ್‌ಧಿ ಮರೈಗಯು, ಅಜ್ಜು ಜಿನಾವರ್‌ಖಾರು ಇವ್ಲು ಬೋಟಿನ ಪೇಟ್‌ಭರಿನ್ ಖಾದು.

20

ಹಜಾರ್ ವರಖ್ವೊ

1 ತದೆ ದೇವ್‌ದೂತನೆ ಪಾತಾಳ್ ಬೀಗಾನು ಕೀಲಿನ ಅಜ್ಜು ಮೋಟಿಖ್ವೊ ಖ್ವಿಂಕಳೆನ ಹಾತ್ಮ ಧರಿಲೀನ್ ಸೊರ್ಗಾಧು ಉತ್ರಿನ್ ಆವಾನು ದೇಖ್ವೊ.

2 ಯೋ ದೇವ್ ದೂತಾನೆ ಕುಟ್‌ಣ್ಯೊಬಿ ಶೈತಾನ್‌ಬಿ, ಹುಯಿರೋತೆ ಜೂನೊ ಖ್ವಾಪ್ ಕತೊ ಅರ್ಘ್‌ನ ಧರೀನ್ ಹಜಾರ್ ವರಖ್ವೊಲಗು ಕೋಂಡಿರಾಖ್ಯೊಥೊ.

3 ಯೋ ಹಜಾರ್ ವರಖ್ವೊ ಖತಮ್ ಹುವಾಲಗು ಬಿಜೂಬಿ ಅದ್ವಿವ್‌ನ ಠಗಾವ್ಣುನಾತೆಯಿಮ್ ದೇವ್ ದೂತಾನೆ ಇನ ಪಾತಾಳ್ ಧಕೇಲಿನ್ ದರತ್ವಾಜ್ಜು ಲಗಾಡಿನ್ ಇನ ಮುದ್ರೊಮಾರ್‌ಚೊ ಯೋ ಹಜಾರ್ ವರಖ್ವೊ ನಿಕ್ಯಾದಿನ್, ಥೋಡ ಹಗಾಮ್ ಇನಝುಟ್ಕಾರ್ ಮಳ್‌ಶೆ.

4 ಇನಪಾರ್ ಸಿಂಹಾಸನ್‌ಖಾರು ದೇಖ್ವೊ. ಯೋ ಖ್ವಾರಪರ್ ಬೆರೊರತ್ವಾಳಾನ ತೀರ್ಪಕರಾನಿ ಅದಿಕಾರ್ ದೆವಾಯು. ಅತ್ರೇಸ್ ಕಾಹೆತೆ ಯೇಸುನಿ ಸಾಕ್ಷಿನ ಖ್ವಾಜೇಧಿಬಿ, ದೇವ್ ವಚನ್‌ಖ್ವಾಜೇಧಿಬಿ ಮುಂಡ್ ರತ್ವೊಖ್ವಾವಳಾನು ಆತ್ಮವ್‌ನಾಬಿ, ಜಾನ್ವರ್‌ಬಿ, ಇನ ಮೂರತ್ಯ ಆರಾದನೆ ಕೋಕರತ್ವೊಂತೆ ಇವ್ಣ ತಾಳ್ವಪರ್ ಅಜ್ಜು ಹಾತ್‌ಪರ್ ಇನು

ಖ್ವಣೇದ್ ನಖಾಯುಕೊಂತೆ ಇವ್ವುನ ದೇಖ್ಯೊಇವ್ವೆ ಪಾಳ್ತು ಜಿವ್ತು ಉರಿನ್ ಹಜಾರ್ ವರಖ್ವ್ತಿಸ್ತನ ಜೋಡ್ ಆಳ್‌ಷೆ.

⁵ ಮರೈಥೂತೆ ಬಿಜುಖ್ವಾರು ಯೋ ಹಜಾರ್ ವರಖ್ವ್ತು ಖತಮ್ ಹುವಾಲಗು ಜಿವ್ತು ಕೋಹುಯೂನಿ ಆಸ್ ಪಹಿಲು ಪಾಳ್ತು ಜಿವ್ತುಹುವಾನು.

⁶ ಪಹಿಲ ಪಾಳ್ತು ಜಿವ್ತುಹುಯಿನ್ ಉರಾಮ ಮಳಿಹುಯು ಧನ್ಯರಾಬಿ ಅಜು ಘಣು ಆಶೀರ್ವಾದ್‌ಬಿ ಹುಯಿರೈಸ್. ಅಥಾನವಾಳಪರ್ ಬೇನಿ ಮರಣ್ಣ ಅದಿಕಾರ್ ಕೊಯ್ತು. ಕತೋಬಿ ಇವ್ವೆ ದೇವ್‌ನಾಬಿ ಕ್ರಿಸ್ತನಾಬಿ, ಯಾಜಕವ್‌ಹುಯಿನ್, ಕ್ರಿಸ್ತನಿ ಜೋಡ್ ಯೋ ಹಜಾರ್ ವರಖ್ವ್ತು ಆಳ್‌ಷೆ.

ಶೈತಾನ್ನಿ ಹಾರ್

⁷ ಯೋ ಹಜಾರ್ ವರಖ್ವ್ತು ಖತಮ್ ಹುಯಿಚಾವದಿನ್ ಶೈತಾನ್ನ ಜೇಲ್‌ಮಾಥು ಛುಟ್ಕಾರ್‌ವುಶೆ.

⁸ ಯೋ ಭಾರ್ ಐನ್ ಜಮೀನ್ನ ಚಾರ್ಡಿ ಆಡಿಮ ಛಾತೆ ಅಖ್ವಾಸ್ ದೇಖ್ವ್ತಿನ ಠಗೈನ್ ಗೋಗ್ ಅಜು ಮಾಗೋಗ್ ಕರಿ ಅದ್ವಿನ ಝೂಂಡ್‌ನ ಪೊಖ್ವ್ಲೆಲೀನ್ ಜಂಗ್‌ನ ಮಳಾವ್‌ಷೆ. ಇವ್ವು ಗಣ್ಣಿ ದರೈವ್ವು ರೇತ್ತಿತರ ರಿಶೆ.

⁹ ಇವ್ವೆ ಜಮೀನ್‌ಖ್ವಾರು ಪೈಲೈಜೈನ್ ದೇವ್ನ ಅದ್ವಿನ ಟಾಂಡಾನಾಬಿ ಪ್ಯಾರ್‌ನ ನಂಗರ್‌ನಾಬಿ ಕೋಂಡಿಲಿಷೆ. ಕತೋಬಿ ಸೊರ್ಗಾಥು ಆಗ್ ಉತ್ರಿಅಯಿನ್ ಇವ್ವುನ ಬಾಳಿನಾಕ್‌ಷೆ.

¹⁰ ಅತ್ರೇಸ್ ಕಾಹೆತೆ ಇವ್ವುನ ಠಗಾಯೊತೆ ಶೈತಾನ್ ಆಗ್ ರಂಜಕ್‌ಖ್ವಾರು ಲಾಗುಕರಾನ ತಲಾವ್ವ ನಾಖಿದಿದು ಹಿಜ್ಜಾ ಜಾನ್ವರಾಬಿ ಝೂಟುಪ್ರವಾದಿ ಖ್ವಾರೂಬಿ ಹಿಜ್ಜಾ ಥು. ಇವ್ವೆ ರಾತ್‌ದನ್ ಜಗ್‌ಜಮಾನಮಾಬಿ ಖ್ವತಾಪ್ಪಿ ಪಡುಕರ್ಷೆ.

ಖ್ವರ್ತಿನ್ ತೀರ್ಪ್

11 ಇನಪಾರ್ ಧೋಳುಫಟ್ ಧೂತೆ ಮೋಟಿ ಸಿಂಹಾಸನ್‌ಬಿ ಇನಪರ್ ಬೆರೊರ್ದಾವಳನಾಬಿ ದೇಖ್ಯೊ ಇನಖ್ವಾಪ್ಪೇಡು ಸೊರ್ಗ ಧರ್ತಿ ನಾಶಿಗಯು. ಕತೋಬಿ ಇವ್ಣುನ ಜಾವನ ಝಗೋಕೋಡೂನಿ.

12 ಅತ್ರೇಸ್ ಕಾಹೆತೆ ಮರೈಹುಯು ನ್ಯಾನ್ ಮೋಟು ಖ್ವಾರುಸ್ ಸಿಂಹಾಸನ್ನ ಖ್ವಾಪ್ಪೆ ಬೆರುರಾವನು ದೇಖ್ಯೊ ತದೆ ಪುಸ್ತಕ್ ಅಖ್ವಾಸ್ ಛೋಡಾಯು. ಜಾನ್ ಹಕ್‌ವಾಳಾನಿ ಪಟ್ಟಿ ಕರಿ ಅಜೇಕ್ ಪುಸ್ತಕ್‌ಬಿ ಛೋಡಾಯು. ಆ ಪುಸ್ತಕ್‌ಮ ಲೀಖೈರ್ದೊಸ್ತೆ ಪರಕ್ ಯೋ ಮರೈಹುಯು ಖ್ವಾರನ ಇವ್ಣು ಇವ್ಣು ಕಾಮ್ ಕಿಮ್ಮಿ ತಿಮ್ಮತ್ ತೀರ್ಪ್‌ಹುಯು.

13 ದರೈವ್ ಇನಾಮ ಮರೈಧೂತೆ ಅದ್ವಿನ ದಿದು. ಮರಣ್‌ಬಿ ಪಾತಾಳನೆ ಇನಾಮ ಮರೈಧೂತೆ ಅದ್ವಿಖ್ವಾರನ ದಿದು. ಹರೇಕ್ ಜಣಾನಾಬಿ ಇವ್ಣು ಕಾಮ್ ಪರಕ್ಮಾಸ್ ತೀರ್ಪ್‌ಹುಯು.

14 ಇನಪಾರ್ ಮರಣ್‌ಬಿ ಪಾತಾಳನಾಬಿ ಆಗ್ನ ತಲಾವ್ಕ ಭರ್ಕಾಯು. ಯೊ ಆಗ್ನ ತಲಾವಸ್ ಬೇನಿ ಮರಣ್.

15 ಯೋ ಜಾನ್ ಹಕ್‌ವಾಳಾನಿ ಪುಸ್ತಕ್‌ಮ ಕಿನುನಾಮ್ ಲೀಖೈರ್ದಾವನು ದೆಖಾಯು ಕೊಯ್ನಿಕಿ ಇನ ಆಗ್ನ ತಲಾವ್ಕ ಭರ್ಕಾಯು.

21

ನವು ಸೊರ್ಗ ಅಜು ನವಿ ಧರ್ತಿ

1 ಇನ ಪಾಲ್ಲಳ್ ಮೆ ನವು ಸೊರ್ಗ ಅಜು ಜಮೀನ್ ದೇಖ್ಯೊ ಪಹಿಲೇನು ಆಕಾಶ್ ಅಜು ಪಹಿಲೇನು ಜಮೀನ್‌ಕೊಂತೆ ಹುಯಿಗಯು. ಹಿಜ್ಜಾ ದರೈವ್‌ಬಿ ಕೋಡೂನಿ.

2 ಅತ್ರೇಸ್ ಕಾಹೆತೆ ಸೊರ್ಗಾಡು ಪರಿಶುದ್ ನಂಗರ್ ಯೆರೂಸಲೇಮ್ ದೇವ್‌ಕಂಡು ಉತ್ರಿ ಆವನು ಮೇ ದೇಖ್ಯೊ ಯೋ ಇನ ಬಾವ್ತಿನಖ್ವಾಜೆ ತಯಾರ್ ಹುಯಿರ್ದವಾಳಿ ವ್ಯತುಲ್ದಿನಿ ಘೋಣಿ ಶನ್‌ಗಾರ್ ಹುಯಿರ್ದು.

3 ಆ ನಾಹುಯಿನ್ ಸಿಂಹಾಸನ್‌ಡು ಏಕ್ ಮೋಟು ಅವಾಜ್ ಮೆ ಖ್ವಮ್‌ಜೊ. ಯೊ ಅವಾಜ್ ದೇಖೊ, ದೇವ್ನು ಘರ್ ಅದ್ವಿನಿ ಜೋಡ್.

ಲ್ಲಾ. ಯೊ ಇವ್ವಿ ಜೋಡ್‌ಮರ್ದೆಪ್ಪೆ. ಇವ್ವೆ ಇನವಾಳ ಹುಯಿರ್ದೆಪ್ಪೆ ಅಜ್ಜು ಯೊ ಇವ್ವೊ ದೇವ್ ಹುಯಿರ್ದೆಪ್ಪೆ.

4 ಯೊ ಇವ್ವ ಆಂಝಾನ ನೂಫಿನಾಕ್ಲೆ. ಹಿಜ್ಜಾ ಪಾಲ್ತು ಮರಣ್ ರೆಶೆಕೊಯ್ತಿ ಪಾಲ್ತು ದುಖ್ ರೆಶೆಕೊಯ್ತಿ ಖ್ವರಪ್‌ಗೋಳ್ ಕೊರೆಶೆನಿ, ಅಜ್ಜು ವದೇಖೊ ಕೊರೆಶೆನಿ ಜೂನೊ ಮಾರಗ್‌ಖ್ವಾರು ಚಲಿಗಯ್” ಕರಿ ಬೋಲ್ಯೊ.

5 ತದೆ ಸಿಂಹಾಸನ್‌ಪರ್ ಬೆರೊಥೋತೆ ಇನೆ, “ದೇಖ್ ಮೇ ಖ್ವಾರುಸ್ ನವೇಥಿ ಉಬ್‌ಜಾವುಸ್” ಕರಿ ಬೋಲ್ಯೊ. ಅಜ್ಜು ಏಕ್ ಜಣಾನೆ ಮನ, ತೂ ಅನ ಲೀಕ್. ಶನಕತೊ ಆ ವಚನ್‌ಖ್ವಾರು ಖ್ವಾಳುಬಿ ವಿಶ್ವಾಸ್ ಕರಖ್ಕೂಬಿ ಹುಯಿರ್ದೆಪ್ಪೆ” ಕರಿ ಬೋಲ್ಯೊ.

6 ತದೆ ಸಿಂಹಾಸನ್‌ಪರ್ ಬೆರೊಥೋತೆ ಇನೆ, “ಅಖ್ವಾಸ್ ಕರಿಹುಯ್ಕ; ಮೇಸ್ ಪಹಿಲೋಬಿ, ಖ್ವರ್ತಿಬಿ, ಶುರುವಾತ್‌ಬಿ, ಖತಮ್‌ಬಿ ಹುಯಿರ್ದೆಪ್ಪೆ. ತಖ್ವೆವಾಳನ ಜಾನ್ನ್ ಪಾಣಿನೊ ಚೇಜ್‌ಭಾರನ ಮೋಲ್‌ಕೊಂತೆ ಪುಗಟ್‌ಥಿ ಪಿಯಾನ ದಿಶ್.

7 ಜೂತವಾಳನ ಆ ಖ್ವಾರುಸ್ ಮಳಾಶೆ. ಮೇ ಇನ ದೇವ್ ಹುಯಿರ್ದೆಪ್ಪೆ. ಯೊ ಮನ ಥಿಯೊ ಹುಯಿರ್ದೆಪ್ಪೆ.

8 ಕತೋಬಿ ಡರ್‌ಪೋಕ್‌ಖ್ವಾರು, ವಿಶ್ವಾಸ್‌ಕೊಂತೆ ಖ್ವಾರು, ಗಲೀಜ್ ಕಾಮ್ ಕರವಾಳು, ಖೂನಿಖ್ವಾರು, ವೈಬಿಚಾರ್ ಕರವಾಳು, ಜಾದುಕರಾವಳು, ಮೂರತ್ವ ಆರಾದನೆ ಕರವಾಳು, ಅಖ್ವಾಸ್ ಜ್ಞೂಟು ಬೋಲವಾಳು ಅವ್ವುನ ಮಳಾಶೆತೆ ವಾಟೊ ಆಗ್ ರಂಜಕ್‌ಥಿ ಬಳ್ವಾನು ತಲಾವಸ್; ಯೋ ಬೇನು ಮರಣ್” ಕರಿ ಮನ ಬೋಲ್ಯೊ.

ನವು ಯೆರೂಸಲೇಮ್

9 ಖ್ವರ್ತಿನು ಖ್ವಾತ್ ಖ್ವತಾಪ್ಪಿಥಿ ಭರೈರುತೆ ಖ್ವಾತ್ ಕಟೋರವ್ವ ಧರಿದಾಖ್ಯತೆ ಖ್ವಾತ್‌ಜಣ ದೇವ್‌ದೂತರ್‌ಮ ಏಕ್‌ಜಣೊ ಐನ್ ವಾತೆ ಬೋಲ್ಯೊಹುಯಿನ್, “ಮಾರಿ ಜೋಡ್ ಆವ್, ಮೇಂಠಾನ ಚೆಲ್ವಾನ ಬಾವಣ್ ಹುವಾಳಿ ವೈತುಲ್ದಿನ ತುನ ವತಾಳುಸ್” ಕರಿ ಬೋಲ್ಯೊ.

10 ಯೊ ದೇವ್ವದೂತನೆ ಪವಿತ್ರಾತ್ಮಾಧಿ ದಾಬುಕ್ಮ ಧೋತೆ ಮನ, ಘಣೋಮೋಟೊ ಅಜು ಊಚೊ ಪಹಡ್ಕನ ಲೀಜೈನ್, ಪರಿಶುದ್ ಖ್ವಿಯೇರ್ ಯೆರೂಸಲೇಮ್, ಸೊರ್ಗಮಾಥು ದೇವ್ಕಂಥು ಉತ್ರಿ ಉಳ್ಳಾವತೆ ಯೊ ಮನ ವತಾಳ್ಳೊ.

11 ಯೋ ಖ್ವಿಯೇರ್ ದೇವ್ವಿ ಶಕಡ್ಲಿ ಉಜಾಖ್ವ್ ದೆವ್ಕರ್ತೋಥೊ. ಅಜು ಝಗೇಗುಕರಾತೆ ವಜ್ರನಿತರ ಉಜಾಖ್ವ್ ದೆವ್ಕರ್ತೋಥೊ. ಘಣ ಮೋಲ್ವ ಐರಾನಿತರ ಜಮ್ಮು ಕರ್ತುಂಥು.

12 ಯೋ ಖ್ವಿಯೇರ್ ಲೂಚು ಭೀತ್ ತು. ಯೋ ಅಖ್ವಾ ಬಾಕಲ್ಕನ ದೇವ್ಕದೂತರ್ ಥಾ. ಅಖ್ವಾನ ಬಾಕಲ್ಕನ ಉಪ್ಪರ್ ಇಸ್ರಾಯೇಲ್ನು ಭಾರ ಖೂಮ್ಮು ನಾಮ್ ಲೀಖ್ಪಿರೊಡ್ಲೊ.

13 ಪೂರಬ್ ದಿಕ್ಮ ತೀನ್ ಬಾಕಲ್, ಉತ್ತರ್ ದಿಕ್ಮ ತೀನ್ ಬಾಕಲ್, ದಕ್ಷಿಣ್ ದಿಕ್ಮ ತೀನ್ ಬಾಕಲ್, ಪಶ್ಚಿಮ್ ದಿಕ್ಮ ತೀನ್ ಬಾಕಲ್ ಥು.

14 ಯೋ ಖ್ವಿಯೇರ್ ಭೀತ್ನ ಭಾರ ಹದಿಪಾಯನುಬಂಡೊ ಥು. ಇನಪರ್ ಮೇಂಥಾನು ಚೆಲ್ಕಾನು ಭಾರಜಣ ಅಪೊಸ್ತಲರ್ ನಾಮ್ ಥು.

15 ಮಾರೇಥಿ ವಾತೆ ಬೋಲು ಕರ್ತೋಥೋತೆ ದೂತನೆ ಯೊ ಖ್ವಿಯೇರ್ನಾಬಿ ಇನ ಬಾಕಲ್ನಾಬಿ ಅಜು ಇನು ಭೀತ್ನ ಆಳ್ತಿಕರಾನಖ್ವಾಜೆ ಇನ ಹಾತ್ಮ ಖೊನ್ನಾನೊ ಆಳ್ತಿನೊಲಲ್ಯೊ ಧರಿಸಾಖೊಥೊ.

16 ಯೋ ಖ್ವಿಯೇರ್ ಚಾರ್ಕೂರಿ ಥು. ಯೊ ಕೆವ್ವು ಲಾಂಬುಕಿ ಎತ್ರೇಸ್ ಚೌಡುಥು. ದೇವ್ವದೂತನೆ ಖ್ವಿಯೇರ್ ಇನ ಆಳ್ತಿನಲಥೊಥಿ ಗಣ್ಯೊ ಯೊ ಖ್ವಿಯೇರ್ ಏಕ್ ಹಜಾರ್ ಪಾಚ್ಖೊ ಮೈಲ್ ಲಾಂಬು, ಏಕ್ ಹಜಾರ್ ಪಾಚ್ಖೊ ಮೈಲ್ ಚೌಡು, ಬಿಜು ಏಕ್ ಹಜಾರ್ ಪಾಚ್ಖೊ ಮೈಲ್ ಊಚುಥು.

17 ದೇವ್ಕದೂತನೆ ಯೋ ಭೀತ್ನ ಆಳ್ತಿಕರೊ ಯೊ ಬೇಖೊ ಖೊಳ್ ಅಡಿಯೆತ್ರಿ ಆಳ್ತೆ ಥು. ಆ ಗಣ್ತಿಮ ಅದ್ಮಿನು ಹಾತ್ಯೆತ್ರಿ ಕತೊ ದೇವ್ವದೂತಾನ ಹಾತ್ಯೆತ್ರಿ.

18 ಯೋ ಭೀತ್ ವಜ್ರಾನಬಂಡೇಥಿ ಭಂದೈರೃಥು ಯೋ ನಂಗರ್ ಐರಾನಿತರನು ಅಶ್ಲಿ ಖ್ವೊನ್ನು ಹುಯಿರೃಥು.

19 ಖ್ವೆಯೇರೃ ಭೀತ್‌ನು ಹದಿಪಾಯನ ಕೈಯೇಕ್ ಥರಾನು ಮುತ್ನೊ ಕಾಕ್ರೊರೊಥೊ, ಪೈಲೊ ಕೋಣಾನೊ ಬಂಡೊ ವಜ್ರಾಥಿ, ಬೇನೊಬಂಡೊ ವೈಡಾರೃ, ತೀನ್ನೊ ಪಚ್ಚೆ. ಚಾರೃ ಪದ್ಮರಾಗ್,

20 ಪಾಚ್‌ನು ಗೋಮೇಧಿಕ, ಛೋನು ಮಾಣಿಕ್ಯ, ಖ್ವಾತ್ನು ಪೀತರತ್ನ, ಆಟ್ಟು ಬೆರುಲ್ಲ, ನೌನು ಪುಷ್ಪರಾಗ್, ದಖ್ವೊನೊ ಗರುಡಪಚ್ಚೆ, ಫ್ಯಾರಾನೊ ಇಂದ್ರನೀಲ, ಬಿಜು ಭಾರಾನೊ ಬಂಡೊ ನೀಲಸ್ವಟಿಕ.

21 ಭಾರ ಬಾಕಲ್‌ಖ್ವಾರು ಭಾರ ಮುತ್ ಹುಯಿರೃಥು. ಹರೇಕ್ ಬಾಕಲ್ನಾಬಿ ಏಕೇಕ್ ಮುತ್‌ಥಿ ಬಣೈರಾಖ್ವು. ನಂಗರೃಗಲ್ಲಿ ಪಾಕ್‌ಥಿ ರೃವಾನ ಶಿಖ್ವಾನಿತರನು ಅಶ್ಲಿ ಖ್ವೊನ್ನೇಥಿ ಬಣೈರೃಥು.

22 ಮೆ ಖ್ವೆಯೇರೃಮ ಮಂದಿರ್‌ಬಿ ದೇಖ್ಯೊ ಕೊಯ್ನಿ. ಶನಕತೊ ಸರ್ವಶಕ್ತನೊ ದೇವ್‌ಹುಯಿರೃಡ್ವಿತೆ ಪ್ರಭು ಅಜು ಮೇಂಠಾನು ಚೆಲ್ವುಹುಯಿರೃವಾಳೊ ಯೊ ಇನು ಮಂದಿರ್ ಹುಯಿರೃಡ್ವಿಸ್.

23 ಖ್ವೆಯೇರೃ ಉಜಾಳು ದೈವಾನ ಚಾಂದ್‌ರೃವೊ ಚಂದರ್‌ಮೊರೃವೊ ಹೋಣುಡುಕೊಯ್ನಿ ಶನಕತೊ ದೇವ್ವಿ ಮಹಿಮೆಸ್ ಉಜಾಖ್ವ್ ದೇವ್‌ಕರ್ತೊಥೊ. ಮೇಂಠಾನು ಚೆಲ್ವುಸ್ ನಂಗರೃ ದೀವೊ ಹುಯಿರೃಡ್ವೊಥೊ.

24 ಇನ ಉಜಾಖ್ವ್‌ಮಾಸ್ ಹರೇಕ್ ಭಗ್‌ಭಾತ್ ಚಾಲ್‌ಷೆ. ಭಮೀನ್ನ ರಾಜವ್‌ಖ್ವಾರು ಇವ್ವ ಧನ್‌ದಾಲತ್ನ ಖ್ವೆಯೇರೃಕನ ಲೀನ್ ಆವ್‌ಶೆ.

25 ಖ್ವೆಯೇರೃ ದರೃಜುಖ್ವಾರು ದನ್ಮ ಮುಚ್ಚಾವ್‌ಶೇಸ್ ಕೊಯ್ನಿ. ಹಿಜ್ಜಾ ರಾತ್‌ಕತೊ ಕೊಯ್ನಿಸ್ ಕೊಯ್ನಿ.

26 ಭಗ್‌ಭಾತ್‌ನು ಧನ್‌ದಾಲತ್‌ಬಿ ಮರ್ಯಾದೀಬಿ ಹಿಜ್ಜಾ ಲೀನ್‌ಆವ್‌ಶೆ.

27 ಕತೋಬಿ ಅಶುದ್ಧ ರೃವಾನು ಖಿವು ಏಕ್‌ಬಿ ಕೊಪೇಖ್ವ್‌ಶೇನಿ. ಇಮ್‌ಸ್ ಕಚಿಂಡ್‌ಕಾಮ್ ಕರಾವಳೊಬಿ ಠಗಾವವಾಳೋಬಿ ಇನಾಮ ಪೇಖ್ವ್‌ಶೆ ಕೊಯ್ನಿ. ಕತೋಬಿ ಮೇಂಠಾನು ಚೆಲ್ವು ಹುಯಿರೃವಾಳನ

ಜಾನ್ನ ಹಕ್‌ವಾಳಾನಿ ಪುಸ್ತಕ್‌ಮ ಕಿನುಕಿನು ನಾಮ್‌ಖ್ವಾರು ಲೀಖ್ಪಿರ್ದೆಸ್ಕಿ ಇವ್ಣೆಖಲಿ ಯೊ ಖ್ವಯೇರಾಮ ಪೇಖ್ವಾಶೆ.

22

1 ಅನಕೇಡೆಥು ದೇವ್‌ದೂತನೆ ಫಟೆಕ್‌ಡಿನ್‌ಫೋಣಿ ಉಜಾಖ್ವ್ ದೈವಾನು ಜಾನ್ನ ಪಾಣಿನ ನದ್ದೀನ ಮನ ವತಾಳ್ಕೊ ಯೊ ನದ್ದಿ ದೇವ್ ಬಿಜು ಮೇಂಡಾನ ಚೆಲ್ಕಾನು ಸಿಂಹಾಸನ್‌ಕಂಥು ಉಬ್ಜಿನ್,

2 ಖ್ವಯೇರ್ದಿ ಮೋಟಿ ಗಲ್ಲಿನ ಇಚ್‌ಮ ವ್ಹವ್‌ಕರ್‌ಧು. ಯೊ ನದ್ದೀನು ಭೇ ಕನಾರಿಪರ್ ಜಾನ್ನ ಝಾಡುಖ್ವಾರು ಥು. ಯೊ ವರಖ್ವ್ ಭಾರ ಮಹಿನಾಬಿ ಫಲ್ ದೇತುಹುಯಿನ್ ಭಾರ ಮಹಿನಾಬಿ ಭಾರ ಥರಾನು ಪಂಡುಖ್ವಾರು ದೇಸ್. ಯೊ ಝಾಡನ ಪಾಂದ್ವಾನ ದವೈಥಿ ಖ್ವಾರ ಜಗ್‌ಜಾತ್‌ವಾಳಾನ ಖ್ವುದ್ರಾವಸ್.

3 ದೇವ್‌ಥಿ ಶಾಪ್ ಲಿದುಹುಯು ಖಿವೂಬಿ ಯೊ ಖ್ವಯೇರಾಮ ಕೊರ್ದಿಶೇನಿ. ಹಿಜ್ವಾ ದೇವ್ನ ಅಜು ಬಲೀನ ಮೇಂಡಾನ ಚೆಲ್ಕಾನು ಸಿಂಹಾಸನ್ ರ್ದಿಶೆ. ಇನ ಸೇವಕರ್‌ಯಿನ ಆರಾದನೆ ಕರ್ತೆ.

4 ಇವ್ಣೆ ಇನು ಮ್ಹೋಡು ದೇಕ್‌ಶೆ ಇವ್ಣ ಮುಡ್‌ಕ್‌ಪರ್ ಇನು ನಾಮ್ ಲೀಖ್ಪಿರ್ದಿಶೆ.

5 ಅಜು ರಾತ್ ಬೋಲಾನುಸ್ ಕೊರ್ದಿಶೇನಿ. ಇವ್ಣುನ ದೀವೊನು ಉಜಾಳುಬಿ ಚಾಂದ್‌ನು ಉಜಾಳುಬಿ ಹೋಣುಕೊಯ್ನಿ. ಪ್ರಭುಹುಯಿರ್ದೊತೆ ದೇವಸ್ ಇವ್ಣುನ ಉಜಾಳು ಹುಯಿರ್ದಿಶೆ. ಇವ್ಣೆ ಜಗ್‌ಜಮಾನಮಾಬಿ ಜಿವಿರ್ದಿಶೆ.

ಯೇಸು ಬಿಜುಪಾಠು ಆವಾನು

6 ಇನಪರ್ ದೇವ್‌ದೂತನೆ ಮನ, ಆ ವಾತೆಖ್ವಾರು ವಿಶ್ವಾಸ್ ಕರಖ್ವುಕೊಬಿ ಖ್ವಾಚೊಬಿ ಹುಯಿರ್ದಿಶೆ. ಪ್ರವಾದಿ ಖ್ವಾರನ ಆತ್ಮಾನ ಪ್ರಭುಸ್ ದೇವ್ ಹುಯಿರೊಸ್. ಒಗ್ಗಿಸ್‌ಮ ಚಾಲನಯೊತೆ ವಾತೆಖ್ವಾರಿ ಇನ ಸೇವಕರ್‌ನ ವತಾಳನ ದೇವ್‌ಯಿನ ದೂತನ ಮೋಕ್ಲಿರಾಖೊಸ್.

7 ಖ್ವಮ್‌ಜೊ, ಮೆ ಘಣು ಜಲದಿ ಆವುಸ್! ಆ ಪುಸ್ತಕ್‌ಮ ಲೀಖ್ಪಿರ್ದೊತೆ ಖ್ವಾರಿ ವಚನ್ ಪಾಡಿಚಾಲವಾಳೊ ಧನ್ಯ ಹುಯಿರ್ದೊಸ್ ಕರಿ ಬೋಲ್ಯೊ.

8 ಯೋಹಾನಕರಿ ಮೇಸ್ ಆ ಅಖ್ವಿ ವಾತೆನ ಖ್ವಮ್‌ಜೊಹುಯೋಬಿ ದೇಖೊಹುಯೋಬಿ ಹುಯಿರ್ದೊಸ್. ಮೆ ಅಖ್ವೀಸ್ ವಾತೆವ್‌ನ ಖ್ವಮ್‌ಜಿನ್ ದೇಖಾಮ, ಆ ಬಾರೆವ್‌ಮ ಮನ ವತಾಳ್ಯೊತೆ ದೇವ್‌ದೂತನ ಖ್ವಲಾಮ್ ಕರ್ನುಕರಿ ಇನ ಪಗ್‌ಪರ್ ಪಡ್ಲೊ.

9 ಕತೋಬಿ ಯೋ ದೇವ್‌ದೂತನೆ, “ಮನ ಖ್ವಲಾಮ್ ನಕೊಕರ್. ಮೇಬಿ ತಾರಿನಿತರಾಸ್ ಆ ಪುಸ್ತಕ್‌ಮ ಛಾತೆ ಅಖ್ವಿ ವಚನ್ ಪಾಡಿ ಚಾಲ್ಯಾಹುಯ ಅದ್ಮಿನಿತರಸ್. ಅಜು ತಾರ ಬೈಯೇ ಹುಯಿರ್ದೊತೆ ಪ್ರವಾದಿನಿ ಘೋಣಿ ಮೇಬಿ ಖಲಿ ಏಕ್ ಸೇವಕ್ ಹುಯಿರ್ದೊಸ್. ತೂ ದೇವ್ ಖ್ವಲಾಮ್ ಕರ್” ಕರಿ ಬೋಲ್ಯೊ.

10 ಆನಾಹುಯಿನ್ ದೇವ್‌ದೂತನೆ ಮನ, “ಆ ಪುಸ್ತಕ್‌ಮ ಛಾತೆ ದೇವ್‌ಧಿ ಆವಾನು ವಚನ್ ಅಖ್ವಾನ ಗಪ್ಲತ್ ನಕೊಕರ್. ಶನಕತೊ ಆ ಅಖ್ವಿ ಚಾಲಾನ ದನ್ ಖನ್ನೆ ಐಗು.

11 ರಗಾವವಾಳೊ ಅಜೂಬಿ ರಗಾವ್ಲೊಸ್ ರ್ವಾವಾದೆ. ಮೈಲು ರ್ವಾವಾಳೊ ಇನ ಬಿಜೂಬಿ ಮೈಲು ಕರಿಲಾವದೆ, ನೀತಿವಾಳೊ ಬಿಜೂಬಿ ನೀತಿವಾಳೊ ಹುವಾದೆ ಅಜು ಪರಿಶುದ್ ಹುಯಿರ್ದಾವಳೊ ಇನ ಅಜೂಬಿ ಪರಿಶುದ್ ಕರಿಲ್ವಾವಾದೆ.

12 ‘ದೇಖ್ ಮೇ ಜಲ್ದೀಸ್ ವಳ್ಳಾವ್‌ಸ್. ಮೆ ಹರೇಕ್ ಜಣಾನ ಇವ್ಣ ಇವ್ಣ ಚಾಲ್‌ನಿತರಸ್ ದೈವಾನಿತರಾನು ಪ್ರತಿಫಲ್ ಮಾರಕನ ಛಾ.

13 ಮೇಸ್ ಪಹಿಲೋಬಿ ಖ್ವರ್ತಿಬಿ, ಪಹಿಲೋಬಿ ಕಡ್‌ಶಿನೋಬಿ, ಶುರುವಾತ್‌ಬಿ, ಖತಮ್‌ಬಿ ಹುಯಿರ್ದೊಸ್.

14 ಇವ್ಣ ರ್ಲುಗ್ಗಾವ್‌ನ ದೊಹಿಲಿನ್ ಶುದ್ ಹುಯಿರ್ದವಾಳು ಧನ್ಯರ್. ಇವ್ಣೆ ಜಾನ್ನ್ ರ್ಲುಗ್‌ಡ್‌ನು ಪಂಡು ಖಾವನ ಹಕ್‌ದಾರ್ ಹುಯಿರ್ದಿಶೆ. ಇವ್ಣೆ ಬಾಕಲ್ವ ವಾಟಿಕರಿ ಯೋ ಖ್ವಯೇರ್ನ್ ಮಹಿ ಜಾವಳು ಹುಯಿರ್ದಿಶೆ.

15 ಕತೋಬಿ ಕುತ್‌ರ್ಯಾವ್‌ನಿತರ ರ್ವಾವಾಳುಬಿ, ಜಾದು ಕರವಾಳುಬಿ,

ವ್ಯಬಿಚಾರ್ ಕರವಾಳುಬಿ, ಖೂನಿಖ್ವಾರುಬಿ, ಮೂರತ್ನ ಖ್ವಲಾಮ್ ಕರಾವಳುಬಿ, ಝೂಟಾನ ಪ್ಯಾರ್ಕರೀನ್ ಭಾಲವಾಳು ಅಜ್ಜು ಬೋಲವಾಳು ಯೊ ಖ್ವಯೇರ್ನ್ ಭಾರ್ ರಶ್ಶೆಕರಿ ಬೋಲ್ಯೊ.

16 “ಯೇಸು ಕರಿ ಮೇಸ್ ಮಾರು ಖ್ವಾರ ಸಬೇವ್ನಿ ಬಾರೇಮ ತುಮುನ ಸಾಕ್ಷಿ ಬೋಲಾನಖ್ವಾಜೆ ಮಾರ ದೂತನ ಮೋಕ್ಲಿರಾಖ್ಯೊಸ್. ಮೇ ದಾವೀದನು ಖೂಮ್ ಕರಿ ಬೋಲಾನು ಬಡ್ಡೇಥು ನಿಕ್‌ಳ್ಳುತೆ ಚಿಗುರ್‌ಬಿ, ಇನಿ ಸಂತಾನ್‌ಬಿ ಉಜಾಖ್ವಾಧಿ ನಿಕ್ಯಾನೊ ಶುಕ್ಕರ್‌ಬಿ ಹುಯಿರೊಸ್.

17 ಆತ್ಮ ಅಜ್ಜು ವ್ಯತುಲ್ಡಿಬಿ, ಆವ್ವುಕರಿ ಬೋಲ್‌ಶೆ. ಖ್ವಮ್‌ಜಾವಾಳೊ, ಆವ್‌ಕರಿ ಬೋಲಾದೆ. ರೋಖ್ವ್ ರ್ವಾವಾಳೊ ಆವಾದೆ, ಆಖ್ವ್ ರ್ವಾವಾಳೊ ಜಾನ್ವಪಾಣಿನ ಮೋಲ್‌ಕೊಂತೆ ಫುಗಟ್‌ಥಿ ಲಿಲ್ಯಾವದೆ.

ಖತಮ್

18 ಆ ಪುಸ್ತಕ್‌ಮ ಲೀಖ್ವೆರ್ನ್ವೆ ಪ್ರವಾದನೆನು ವಚನ್‌ಖ್ವಾರು ಖ್ವಮ್‌ಜಾತೆ ಹರೇಕ್ ಭಣಾನಾಬಿ ಮೇ ಬೋಲಾನಿ ಸಾಕ್ಷಿ ಶಾತ್‌ಕತೊ, “ಕೋಣ್‌ತೋಬಿ ಅನಾಮ ಶಾತ್ತೋಬಿ ಮಳಾಯೊತೊ, ದೇವ್ ಇವ್ವಪರ್ ಆ ಪುಸ್ತಕ್‌ಮ ಲೀಖ್ವೆರ್ನ್ವೆ ಖ್ವತಾಪ್ಪಿಖ್ವಾರು ಆವಾನಿತರ ಕರ್ಶೆ.

19 ಖಿವೊತೋಬಿ ಆ ಪ್ರವಾದನೆನು ವಚನ್‌ಮ ಏಕ್ವತೋಬಿ ಕಾಡಿನಾಖ್ಯೊತೊ, ಆ ಪುಸ್ತಕ್‌ಮ ಬೋಲ್ವೆರ್ನ್ವೆ ಜಾನ್ವ ಝಾಡಮಾಬಿ ಪರಿಶುದ್ಧ ಖ್ವಯೇರ್‌ಮಾಬಿ ಇನಲ್ಲಾತೆ ವಾಟಾನ ದೇವ್ ಕಾಡಿನಾಕ್‌ಶೆ.

20 ಆ ಬಾರೇಮ ಸಾಕ್ಷಿ ಬೋಲವಾಳೊ, “ಒಹೊ, ಮೇ ಖ್ವಾಚಮಾಸ್ ವಗ್ಗಿಸ್ ಆವುಸ್” ಕರಿ ಬೋಲಾಸ್. ಆಮೆನ್. ಪ್ರಭು ಹುಯಿರ್ನ್ವೆತೆ ಯೇಸು, ಆವ್.

21 ಪ್ರಭು ಹುಯಿರ್ನ್ವೆತೆ ಯೇಸುನಿ ವಾರ್‌ಖ್ವೊ ಅಖ್ವಾಸ್ನಿ ಜೋಡ್ಡ ರ್ವಾವಾದೆ. ಆಮೆನ್!

ದೇವ್ವಿ ಖಾಜಿ ವಚನ್
The New Testament in the Vaagri Booli language of
India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06